

# TRAITE NOUVEAU DE

*l'Hysterotomotokie,* 34743  
OV

Enfantement Cæsarien.

QVI EST

*Extraction de l'enfant par incision laterale du  
vètre, & matrice de la femme grosse ne pou-  
uant autrement accoucher. Et ce sans preiu-  
dicier à la vie de l'un, ny de l'autre; ny em-  
pescher la fécondité maternelle par après.*

PAR

François Roussel Medecin.





A PARIS,

Chez Denys du Val, au cheual volant  
rue S. Jean de Beauvais

M. D. LXXXI.

*Avec privilege du Roy.*

*Quignon*



SONNET DE L'AVTHEVR  
AV LECTEUR CHIRVRGIEN.

Q Vi le nœud Gordien iadis eust peu deffaire  
Le denoiant tout beau, l'Oracle l'assuroit,  
Que de toute l'Asie aisément iouyroit,  
Mais qu'autrement iamais n'esperast de le faire.


Alexandre voyant (resueux sur cet affaire)  
Qu'à plus y essayer en vain travailleroit,  
Quoy qu'il en d'eust venir, resolut qu'il feroit  
Son desseing au Conteau (presage sanguinaire.)

Amy, l'enfantement, qui se presente icy,  
Est un nœud Gordien : son Alexandr' aussi,  
En secours plus humain, point cruel, hors d'enuie.

A ce grand n'apporta l'Asie onc tant d'honneur,  
Qu'au monde t'en donna des Césars ce bon heur,  
Que leurs meres, & eux tiendront de toy la vie.



A TRESILLVSTRE  
PRINCE, MONSEIGNEVR,  
Messire Iacques de Sauoye,  
Duc de Geneuois, &  
de Nemours.

ONSEIGNEVR, voyant  
que vous practiqués aussi biē  
en petites, que grandes actiōs,  
ce que vous louēs le plus en  
vn Prince, qui est adiouster à son bon na-  
turel l'imitation par dits, & par faits de  
ce, qui a esté singulierement loué en tous  
ceux, auxquels vertu a donné avec le tiltre  
de grandeur les louanges d'auoir esté hu-  
mains, & accessibles aux leurs; i'ay de là  
pris occasiō de ne craindre point, pour ma  
petitesse de vous offrir ce present: qui est  
vn petit liuret né en mon estude, intitulé

*l'Enfantement Cæsarien, esperât que vous le receurés de bon visage, à l'exemple de ce grand Roy de Perse, ne dedaignât la pomme qu'un sien rustique luy presentoit, ou de Iuppiter aymât iadis autant le peu d'encens du simple populaire, voire mesme ses petites tartelettes en defaut d'encens, que les somptueuses Hecatombes des plus riches; ou à l'imitation de Dieu mesme, qui n'estime pas moins en l'Evangile le petit denier de la pauvre bone femme, que la solemnelle offrande des gros Rabins, estant le superflu de leur trop. Et de fait, ie voy iournellement que si quelque fruit, qui pour sembler nouveau, ou venir hors de saison, a accoustumé de plaire (quoy qu'il ne soit des plus excellens) vous est offert par quelqu'un de vos iardiniers, qui l'a enté; ou si quelque terre medicale, ou marcasite de nouvelle mine (quoy qu'elle ne soit des plus exquisés) vous est apportee par celuy qui l'a descouuerte, vous voulez que l'un & l'autre ait libre*

*accez*



accez à vous. Je n'en dois donc moins espérer, vous estant tres-humble seruiteur, & Medecin ordinaire, en vous apportant ce petit don; lequel toutefois il m'eschappe de dire n'estre pas si petit, qu'il apparait de prime face. Qui me fait esperer qu'il vous sera finalement ( quand vous l'aurez bien congneu ) comme un bon fruit; n'estant à vray dire pas bien meur, & tenant encor quelque peu du saulageon, mais au demourant de bonne garde, & ne cedant en rien à la plus belle pomme de vos citrôniers, quoy qu'ils fussent iadis le vray be-  
 Zoard des anciens Medois, desquels il a tiré le nom. Je m'attends que quelque iour vous n'estimerés pas dauantage les plus exquisés terres medicales, que vous ait onc fait voir vostre paternelle Sauoye, cōbien que ce ne soit icy qu'une rude masse, encor mal purifiée, ains la prefererés aux pierres les plus precieuses, que nous enuoye l'Oriēt, cōme estant chose suffisante à mieux payer

*une haute rençon pour la vie d'une Prin-  
 cesse, Roynie, ou Imperatrice, avec leur tres-  
 illustre lignee (quand la necessité y eschet).  
 que ne seroit toute une mine d'or, ou d'ar-  
 gent. En quoy ie ne doute pas, que ce ne me  
 fust une trop ridicule arrogance de si haut  
 loüer par magnifiques paroles, enuers vous  
 si clair-voyant ce present, sil n'estoit de  
 fait apparent tel, que ie vous le loüe: mais  
 aussi serois-ie ingrat enuers Dieu, & les  
 hommes, & traistre à mon estat mesme, si  
 ayant avec son ayde descouuert en fort  
 long temps, & par grand labeur, la vertu  
 de ce nouveau present utile à tout le genre  
 humain, ie ne le reuelois; & principale-  
 ment à vous, qui le pouuez garder de pe-  
 rir, si vous l'aduoiés une fois estre vostre.  
 Vray est que la nouveauté, & rarité (que  
 nostre France admire par trop) pourroient  
 pour un tēps quelque peu recoder ce subiet;  
 Mais il est à craindre, que le nom d'estre  
 plus tost de nostre creu (chose peu estimee  
 parmy*

*parmy les nostres) que estranger, avec l'in-  
 finie qualité de l'auteur peu cogneu, luy  
 face incontinent perdre credit enuers nos  
 François, n'approuuâs rien moins aujour-  
 dhuy, que ce que leur maternelle regio leur  
 produit: tesmoing ceste excellëte terre Frã-  
 çoise, par eux si peu estimee, qu'on la des-  
 honore par l'inaduertence des bons esprits,  
 à ne seruir qu'aux degraisseurs de bonnets  
 à Paris; estant neantmoins (si on la consi-  
 dere sans passion & preiugé) en tous exa-  
 mens, & effects infiniment meilleure, que  
 la plus souueraine des sigillees Lemnien-  
 nes, & autres barbaresques, qu'on nous  
 vend plus chair qu'au pois de l'or; Et seu-  
 lement pour auoir esté loüee par ceux de ce  
 païs là, & nommémēt par Galen auteur  
 Grec, n'ayāt onc veu les nostres; Combien  
 toutefois que celle qui nous vient de par  
 dela, soit maintenant tiree d'un autre lieu,  
 que celuy qu'il décrit, & qu'elle n'est pres-  
 que iamais semblable l'une à l'autre, encor*

qu'elle apparaisse marquée du sigil vray, ou faulx faire d'un mesme Bascha, en mesme année : qui monstre la grande sophistication de ce qui ne vaut pas le sophistiquer, encor' qu'il fust du plus naturel. Je ne veux pas icy discourir sur une infinité d'autres abus, desquels l'estrange imposteur vient de bien loing à nos despends beffler nostre ignorance : seulement cela soit dit (comme en passant) pour le regard de ce petit present. Mais quant à moy, qui en suis le presentateur, i'ay pensé qu'il me failloit gouverner en cecy, suyuant le conseil de ce Seigneur Grec, qui voulut que le sage, & utile aduis d'un simple homme priué, pour estre trouué bon (comme il estoit) fust proposé en public par la bouche d'un grãd magistrat, ou de quelque autre personnage signalé; apprenant par cela aux petits, de se pourvoir de protecteur, pour conseruer l'efect de leurs utiles labours. Ce que deliberant ensuyure, après communication faicte de ce  
petit

petit opusculé à messieurs de la faculté de  
 medecine à Paris, & veu iceluy estre re-  
 ceu, & approuué par eux, i'ay pensé ne luy  
 pouuoir obtenir meilleure sauuegarde, pour  
 se tenir paisiblement en ce Royaume, ou  
 plus forte escorte pour surement en sortir,  
 que le saufconduit de vostre nom; dequoy  
 il a tout besoing, estât sans cela en hazard  
 d'estre mal receu de plusieurs, par-ce qu'il  
 ne semble promettre que chose nouuelle,  
 peu oye, iamais escrite, mal-aisémēt croya-  
 ble, mesme presque à qui la void: Et con-  
 sequemment tenuë iusques à huy pour im-  
 possible, mesmement par les plus doctes, &  
 experimentés medecins, & chirurgiës des  
 plus fameuses uniuersités qui soient en ce  
 monde. Or estant en cecy question de grã-  
 de consequence, non seulement pour la per-  
 mission de ce nouueau conseil, que i'appa-  
 rte (en cas qu'il soit estimé utile, & quelque-  
 fois necessaire, comme il est) mais aussi pour  
 l'inhibition qu'on en pourroit faire à tort,


*fil en suruenoit fascheux inconuenient  
 (pour auoir esté inconsiderément executé)  
 Il est bien raisonnable, de me porter resson-  
 dant, comme ie fais deuant Dieu, deuant  
 vous, & deuant tous les hommes; quant à  
 la pure verité de toutes les circonstances de  
 ce, que i'escris auoir ouy, leu, ou veu, avec  
 submission par moy volontairement faicte  
 à toutes peines arbitraires, en cas qu'il ap-  
 paroisse du contraire. Je supplie à Dieu  
 MONSEIGNEUR vous donner, &  
 aux vostres, en bonne vie & heureuse  
 santé, sa sainte grace pour tousiours.*

Vostre tres-humble seruiteur &  
 fidele medecin Fr. Rouffet.

AV LE-



## AV LECTEUR.

 E n'auois entrepris ( Amy Lecteur ) au commencement, que de mettre en escrit vne simple histoire, & quelques petites disputes, que mōsieur Paré, & moy auions par cy deuant amiablement eües ensemble sur l'enfantement, que ie luy baptisois lors du nom de Cæsarien; & ce en stile François, duquel il vse plus volontiers en ses conferences, & escriptures. Mais après que la veüe de mon allegué luy eut descouuert la verité du fait historial, & que la probabilité de mes raisons sembloit luy auoir persuadé ce, qu'il tenoit pour impossible; ie deliberay n'en escrire rien du tout. Ores quelques doctes & gra-

ues personnages s'estas mis en sa place pour me contrarier plus que deuant, m'ont contraint (pour ne l'aifser perir vne telle vtilité par crainte, ou nonchalance) de reprēdre la protection de ce subiet, & entrer encores plus auant en autres matieres à ce appartenantes. A cause dequoy, i'en ay dressé vn plus ample traitté que parauant; & ce en Latin, tant pour ainsi satisfaire plus decentement à leur respectable qualité, que pour obeir au commandement qu'il pleut à l'excellence de feu Madame & maistresse, Madame RENE E de FRANCE, Duchesse de Ferrare, de m'en faire, quelque peu auant son decez, afin que les nations estranges (& specialement entre les Italiennes la Ferraroise) en eussent la communication. Je pense par la lecture priuee d'iceluy auoir desia en particulier satisfait à la  
 plus



plus part de mes contrariâns, delibérant d'en faire copie en bref au public, pour estre vne chose tres-necessaire, non seulement à la chirurgie, & medecine, mais à toute la republique humaine. Or pour-ce que ce pendant la surceance de l'operation, que ce plus ample opuscule Latin (n'ayât encor' voulu partir de mes mains) met en auant, peut estre dommageable à vne infinité de pauvres femmes grosses de nostre France, qui cependant meurent par faute d'un tel ayde, que nous esperons leur amener, & aussi que plusieurs de nos chirurgiens François peu ou point exercez en lecture Latine, me pressent de leur en faire part, leur voulant satisfaire, & ne retarder pas le necessaire & hatif secours, duquel peuuēt auoir besoing les dames reduittes (comme il aduiēt après tous autres remedes tentés en

vain) à ce dernier refuge, i'ay mis en cet abrégé François vne bõne partie des principaux poincts de ce plus lóg discours la, auquel (comme à cestuy-cy) ie proteste d'auoir esté contraint de mettre la main non par curiosité, ou presomptueuse ambition, mais pour le merite du necessaire sujet; principalement voyant que nul de ceux qui l'eussent peu mieux façonner que moy, après auoir esté par moy-mesme semons à ce faire, n'y vouloient entendre comme ils deuoient, ains y resistoient comme à chose absurde, & impossible. Mais plus que tout m'a fait venir à ce poinct le piteux spectacle des angoisses, estonnemens, prieres, piteux regards de ces pauvres creatures ainsi gehennees, criâtes au meurtre, & ne s'adressantes lors qu'à nous autres, pour en obtenir à ioinctes mains tel secours, qu'il

nous

nous plaira leur ordonner : Car c'est bien icy plus qu'en toute autre necessité, que les plus grandes se soubmettent à tout. Soit donc aussi de nostre part à faire, que defaillans tous autres moyens, après auoir essuié la larme de l'œil, nous prenions courage pour retirer sous l'ayde de Dieu, avec discretion, par tel secours qui seul nous reste, les vies de la mere, & de l'enfant du tombeau tantost prest à deualer en terre : de laquelle pitié le seul recit est horrible (voire en absence) au plus barbare du monde. Je te promets donc ( pour ces causes ) bien tost t'en communiquer dauantage ( Amy Lecteur ) si i'apperçoy ce sommaire redigé en quelque ordre t'estre aussi à plaisir, cōme ie t'asseure qu'il est tres-veritable, & que ie te le dōne de bon cueur : duquel cependant tu te seruiras au nom de Dieu, qui que tu sois,

soit pour y faire besongner sûrement  
 avec discretion & maturité (comme  
 il appartient en affaire de si grande  
 importance) quâd besoing sera pour  
 ta maison, ou tes amis; soit que tu  
 l'exerces toy-mesme pour autrui, cō-  
 me chirurgien sage, & bien aduisé,  
 sans precipitation: non pour le gain,  
 ou vaine gloire (car mal-heur & hō-  
 te t'en viendrait) mais par miséricor-  
 de, & charité chrestienne tendante à la  
 gloire de Dieu; Auquel soit hōneur,  
 & action de grâces par Iesus-christ  
 son fils nostre Seigneur. Ainsi soit il.

## PREMIERE



## PREMIERE SECTION.

### *Definition de l'enfantement Cæsarien.*

**N** O U S entendons proprement par l'enfantement Cæsarien, vne extraction dextremēt faicte de l'enfant par le costé de la mere, ne pouvant autrement accoucher, que par suffisante incision tant de l'epigastre (ou ventre exterieur,) que du corps matrical : Sans toutefois preiudicier à la vie de l'un, ny de l'autre : (pourveu que d'ailleurs ne leur suruienne mal) voire mesme sans que la mere laisse pour cela de porter enfant apres. Ce qui s'entend pour l'enfant encore vif dans le ventre de la mere.

Sous cestuy cy est aussi compri-  
se vne autre pareille extraction de  
l'enfant desia mort dedans la mere,  
quãd par autre aide de sage-femme,  
ou de medecine, ou de chirurgie plus  
facile, plus seure, & plus commune,  
il n'y a moyen de l'auoir, & qu'autre-  
ment on void qu'il doit emporter la  
mere avec soy; Comme de iour à au-  
tre il aduient par tout en femmes de  
toutes qualitez, apres auoir esté pour  
neant euentrees & rompues misera-  
blement.

Quant à l'extraction des enfans  
restans encores vifs dans le ventre de  
la mere desia morte, (laquelle on  
pouuoit sauuer par ce moien) pour  
ce qu'il en a esté escrit par les anciẽs,  
& modernes plus curieusement qu'il  
n'estoit necessaire, & qu'il n'y a pas  
grand artifice en cela, ie n'entends en  
toucher icy : combien que de telle

incisiō ait prins nom le premier des Cæsars ( qui fut Scipion l'Africain) ainsi mis au monde, & que de luy nous ayons ainsi nommé ceste incision, Cæsarienne . Laquelle neantmoins nous esperons estre executee, (aidant Dieu) avec plus heureux succez, sçauoir est sans la mort de la mere, ce qui ne fut en luy, comme on peut colliger de Sillius Italicus poëte Latin.

*De l'vtilité, & necessité de ceste  
section Cæsarienne.*

**Q**UANT non seulement à l'vtilité, mais aussi à la necessité de ceste operation, faut noter qu'aduenant que les enfans vifs, ou morts, forts ou foibles, ne peussent autrement sortir ( pour les raisons que dirons cy apres) il faut passer par la : ou bien eux & les meres mourront ensemble irremediablement, fussent el-

les encores fortes : Et encores plus, si elles sont desia foibles, & à l'extremité : parquoy est besoing absolument de les ouurir.

Le profit en est double, par ce que lors l'enfant se tire tout vif, qui autrement fust mort prisonnier estouffé, & la mere nō seulemēt n'en meurt pas, comme elle eust faict ( i'entends si elle est biē ouuerte, & à heure, estāt encore forte) mais aussi elle n'en vaudra pas moins que deuant, mesme à porter enfant . Que si elle est lors desia foible, & abandonnée, encor sera elle en quelque espoir de rchapper, si apres protestation faicte, elle est dextrement incisee : qui est meilleur (quoy qu'il soit incertain) qu'un desespoir euident . Cecy (dis-ie) sert non seulement à la continuation des mariages, alliāces, & autres commoditez , qui particulièrement en viennent



nent à vn chacun, mais auffi aux Re-  
 publiques, & polices mondaines;  
 pour eſtre par ce moyen cōſeruee la  
 poſterité de ceux, à la race deſquels  
 viennēt par ſucceſſiō de pere en fils,  
 ou de prochain à prochain quelques  
 biens, dignitez, royaumes, empires,  
 qui ſouuent prennēt changemēt par  
 faute de ceſte aide, au detrimēt des  
 eſtats, & au grand regret des ſubiets.  
 Pour moindre cauſe que cela a bien  
 eſcrit Hippocrates l'Aphoriſme cin-  
 quāte neuſieme du cinquieſme liure  
 cōmençant, *Si mulier non concipit, &c.*  
 Comme on peut colliger de l'inter-  
 pretation de Galien ſur ce lieu.

*Les cauſes d'impoſſibilité és accouche-  
 mens naturels, d'ou procede la ne-  
 ceſſité de ceſtuy cy.*

**L** E s cauſes qui empeschēt tout au-  
 tre accouchemēt, & qui ſont oc-

casionales de rendre cestuy cy necessaire , sont diuerses . Les vnes de la part de l'enfant, les autres du costé de la mere. Quant à l'enfant comme s'il est enormément gros , & grand , ou accôpagné d'un , ou de plusieurs gemmeaux s'entrenuisans à sortir, ou d'une mole charneuse , ou qu'il soit difforme, & monstreux, ou si venât mal il ne se peut de soy, ou par aide redresser, & mieux cōduire: Ou si pour estre mort, il ne s'ayde plus à sortir, cōme il deust: Ou s'il est desia si bouffi, qu'il ne puisse passer par le lieu naturel . Quant à la mere , si elle est par trop estroicte, ce qui aduiét en diuerses façōs : Cōme de premierē cōformation, estant les vnes plus serrees que les autres: comme aussi les hommes ne sont pas mesmes en leurs parties genitales tous faicts à vne mesure. Item à cause de l'aage tédret

aux trop ieune-mariees, & encor peu ouuertes, ou bien trop vieilles, & ia endurcies, principalement quand elles ont esté mariees fort tard; voire mesme quelques vñes, qui ont desia eu plusieurs gesines non continuees; La lógue intermission desquelles les rend plus refermees, avec le rendurcissement de leur aage. A cause de quoy l'os peniller, ou barré accoustumé de se disioindre lors, ( quoy qu'on die du contraire ) s'ouure plus malaisement.

Quelquefois cela aduient accidentairement, & contre le naturel ordinaire des autres par vn vice originel, quand des le cōmencement de leur natiuité elles ont à l'entree, ou au milieu, ou au profód du corps matrical quelque empeschemēt, par lequel elles sont comme bouclees, & si bouchees, quela geniture qui y est

à peine peu entrer, estant depuis lors par neuf mois entiers creüe en grandeur d'enfant, ne peut sortir pour ceste closture. Par vice acquis, i'entēds aussi quelque inconuenient suruenü depuis la naissance à la femme, ayant esté illec offensée par vlcere, qui se soit cicatrizé & endurci bien estroitement en cesdictes parties la, soit d'accouchements precedents, soit de l'extraction calculaire mal faiçte, soit de flueurs acres, qui y ayent fait excoariatiō, soit d'aposteme illec né, & suruenü. Desquels accidens nommez generalement par les Grecs *φιμώσις*, & vulgairement embouclures, ont escrit Celse, Æginete, & les autres vieux, & nouueaux chirurgiens tenans vne bōne partie d'iceux pour incurables, encore qu'ils fussent cogneus: ce que ne veut permettre l'hōnesteté des dames. Or est il encor, que

combien que quelques vns soiēt de  
foy curables aux femmes nō grosses,  
( si elles s'en vouloient descouurir à  
tēps) toutesfois la grosseſſe (durāt la-  
quelle on n'y oſe toucher) les met  
comme les autres hors d'eſpoir de  
guarifon, & conſequemmēt de puis-  
ſance d'accoucher. En tous ces cas  
donc ſuruenants ſouuent, & à plu-  
ſieurs, eſt non ſeulement profitable,  
mais abſolument neceſſaire la ſectiō  
Cæſarienne. Par faute deſquels acci-  
dents bien recognoiſtre, & d'y prati-  
quer pour tous autres aides ceſte ſec-  
tion ( qui y eſt le ſeul remede ) il en  
meurt tous les iours vne infinité de  
pauures dames, tant du peuple, que  
des Princeſſes meſmes, avec regret  
aux plus grands de perdre le don de  
poſterité; Et aux ſubiets ( comme il  
eſt predict ) d'eſtre fruſtrez de la race  
de leurs Princes anciens, & naturels.

Auec les susdictes causes ie mets d'abondant vne infinité de tumeurs soudaines, inflammations, descentes, apostemes, schirrhes, loupes, & autres duretez, qui peuuent, & ont accoustumé en ces lieux (côme en autre part) estoupper ces voyes la, & sur la fin de la grossesse engarder les femmes d'enfanter, ne pouuants attendre le temps auquel ces maux la creuent, ou soient guaris pour la haste de l'accouchement qui se presente, & qui pour cela ne peut succeder.

*Trois sortes de probations pour ce subiect.*

**O**R ce subiect n'ayant (tel qu'il est proposé) onc esté mis en lumiere par aucun ancien, ou moderne; & n'estant encor' à present pratiqué, sinon trefrarement, & par peu de barbiers ruraux, & (qui plus est) estant tenu pour faux, & impossible  
par

par les medecins mesmes, & chirurgiens plus renommez en sçauoir, & experiēce, par lesquels il d'eust estre aduancé; il est besoing pour le faire receuoir, & venir en credit & vsage, d'y emploier tous les moiens de persuader, qui se peuuent trouuer: qui sont communémēt trois: experience seure, raison pertinente, & suffisante autorité, s'il s'en trouue. Quāt au premier, il se fera icy par histoires approuuees: Le second, par disputes medicales: Le tiers nous de faut, par ce que nul n'en a iamais riē escript, qui soit venu en nos mains: Mais en lieu de cela nous y procederons par analogie ou production de pareilles, ou plus dangereuses operations en ces mesmes parties, & autres voisines, voyre plus principales, & aussi plus interessees, ayās eu neantmoins bon succez, & consequemment le pro-

mettans encor' meilleur en ceste cy: desquelles i'en ay moymesme fait ex-  
ecuter quelques vnes, & retiré les au-  
tres en partie des pratiques de cele-  
bres medecins encor' viuâts, en par-  
tie des escrits d'aucuns autheurs, tant  
anciens que modernes.

*Histoire du recit de gens fideles.*

**Q**VANT d'oc premieremēt aux hi-  
stoires, cōme ie ne m'en suis pas  
tant fié au recit des experiences d'au-  
truy, que ie ne m'en fois encor' mieux  
asseuré, & satisfaiēt par les miennes:  
Aussi n'ay-ie voulu tāt presumer des  
miennes, que ie n'en aye voulu con-  
firmer aux autres la persuation, par la  
cōformité de pareilles soigneusemēt  
par moy recherchees de personnages  
non suspects: lesquelles ie reciteray  
en premier lieu briefuement, pour  
venir incontinent à celles, que ie nō-  
me miennes, pour les auoir en partie  
conseil-



conseillees, en partie oculairement remarquees avec leurs particulieres circóstances sur les femmes incisees mesmes, & ce és lieux de leurs domiciles, par la testification non seulement des operateurs : mais aussi de leurs maris, enfans, domestiques, & tesmoings, qui y ont assisté en bon nombre.

*Premiere histoire.*

**N'**A pas long temps que i'ay suffisammét descouuert par le recit de quelques anciens preudhommes prés Milly en Gastinois cela estre vray, dont encore on ne fait doute sus le lieu, que la femme d'un Godart demeurant lors au Mesnil, parroisse de Milly, auoit quelques ans au parauant enfanté par six fois en ceste mode, & iamais autremét, tousiours enfans viuant. L'opérateur fut Nicolas Guillet barbier de Milly, après

la mort duquel par faute de secours accoustumé elle mourut ne pouuant accoucher. Argument vray semblable, que cestoit vne profonde phimose, ou embouclure naturelle, suffisante à receuoir la geniture, mais non à rendre l'enfant.

*Seconde histoire.*

**I'**AY sçeu veritablement par maître Ambroise le Noir, chirurgiẽ de nostre Pithuiers fort expert, & par Gilles le Brun, qu'ils auoient ensemblẽt tiré à plusieurs fois par le costé trois enfans viuans à vne pauvre femme pres Merinuille en Beaussẽ, vers laquelle me voulant transporter pour veoir le lieu de l'incisiõ, ie sçeu quelle estoit vn peu au parauãt morte de peste, lors fort contagieuse & violente en ce païs la.

*Tierce histoire.*

**I'**AY vne docte epistre de monsieur  
Aliboux

Aliboux medecin à Sens, desduisant longuement, & par bon ordre cōme Iëan des Marais chirurgien à la Chastre en Berry, fils de Loys des Marais chirurgien ordinaire de l'Archeuesque de Sens Salazar, tira par le costé à sa femme mesme vn fils nōmé Symon des Marais, depuis aussi chirurgien, & valet de chambre de la Royne mere du Roy. Apres quoy elle ne laissa vne autre fois d'accoucher biē, & naturellemēt d'une fille nommee Renee, depuis mariee à vn grenetier. D'iceluy Symō (qu'on surnommoit sans mere) & de Roze Gallardet sortirēt Claude espousee à maistre François Artus d'Yffoudun, & Françoise mariee à Oliuier Gannier : toutes deux suffisantes testificatrices de la naissance paternelle, tant par le commun bruit, que par le frequēt, & domestique recit de leur dit pere.

*Quatriesme histoire.*

**M**ONSIEUR Pelion fameux medecin à Angers, ayāt par cy deuāt recité à maistre Laurent Collot chirurgien cystotomique de Paris, vne telle operation en Anjou, luy en a de nouveau ratifié la verité par vne missiue qu'il m'a baillee portant cela auoir esté executé par vn Mathurin Debonnaire chirurgien, ne specialisant autre chose.

*Histoires oculaires.*

**A**M Y lecteur à fin que tu ne m'accuses d'estre inepte, & ennuieux en particularisant trop longuement plusieurs petites circōstances, saiche que le curieux soing de les specialiser par le menu, duquel i'vse, n'est qu'autant de peine pour moy. Mais à toy soulagement pour t'asseurer de la verité par recherche, que tu en feras s'il te plaist sus les lieux, qui te sont specifies,

cifiez, & pour la plus part des tesmoings oculaires, en cas que tu en doutes.

*Premiere histoire.*

**M**AISTRE Denys Armenaut medecin à Gian, & moy, auons veu ensemblément vn peu auant les premiers troubles, à l'hospital de Chastillon sus loing, vne femme y estant malade de fieure continue, ayant au costé fenestre du petit vêtre vne grande hargne, & en icelle vne longue cicatrice, avec apparentes marques de poincts d'aiguilles, restās de l'ouuerure d'icelles parties recousuë, par laquelle son mary & elle testifioient luy auoir esté tiré quelque temps au parauant vn fils d'environ sept ans, qu'ils nous monstrerent, n'ayant peu naistre autrement. Cela fut faict en Bourgongne par vn vieil barbier de leur village mesme, expert (à leur di-

re) en telles operations, duquel i'auois escrit le nom pour m'en enquerir encor' plus asseurement par lettres & amis, & en retirer de luy telle pratique qu'il en auoit par experience: mais la difficulté des temps m'a faict perdre le memorial des noms du lieu, & personnage, & osté l'occasion d'en apprendre ce que ie desirois retirer: Et toutefois elle n'auoit point conceu, ne porté depuis lors, combié qu'ils fussent tous deux ieunes. Cela peuuét auoir ouy compter plusieurs-fois audit Armenault ses familiers, luy estant chose au parauāt incroiable, comme aux autres, mais deslors indubitable, & de laquelle il deliberoit vser en conseil, si la necessité en amenoit l'occasion.

*Seconde histoire.*

**B**ERNARDE Arnoul, femme d'Estienne Massicauld de Nangeuille,  
entre

entre Estāpes, Puiseaux, & Pithuiers, après vn extreme, & vain trauail de quatre iours à enfanter, me recerchāt par son mary mesme sur le dernier aduis de son secours, eut bien le courage contre le gré de sondit mary de se faire par mon conseil ouurir, voire si hastiuement après auoir ouy la resolution, qu'elle ne voulut pas attendre ledit Ambroise le Noir, que ie luy promettois enuoier, comme ja experimenté en telle operation, parce que ie ne m'y pouuois trouuer, pour estre lors au liēt griefuement malade : mais y employa le premier trouué, qui fut Iean Lucas, ieune bar- bier demourant lors, comme encor à present, à Bunou, (petit village prochain) qui executa dextrement ceste operation à luy nouuelle, és presen- ces de plusieurs, aucūs desquels sont (encor comme luy) tesmoings de ce

fait: ce fut le iour de Pasques mil cinq cens cinquante six. L'incision (qui est bien à noter pour s'en seruir d'exemple en lieu de precepte) commençoit à la partie dextre du ventre, vn doigt plus bas que l'endroit du nombril, & plus de quatre doigts à costé d'ice-luy; & de là descendoit directement iusques près du penil, sans toucher nullement aux muscles droicts, desquels elle estoit par le haut distante d'environ trois doigts, & par le bas quelque peu moins. Apres les muscles, & le peritoine aussi de haut en bas incisez sans gueres saigner, apparut manifestement l'amarris, laquelle il incisa aussi à part, voire assez amplement, à fin que la playe fust suffisante pour en tirer plus aisémēt l'enfant encores vif, avec sa secundine. Puis il recousut, non pas gastroraphiquement, mais à la façon commune  
des



des playes, non la matrice, mais les muscles, & le peritoine avec cinq poincts d'aiguille, comme ie notay bien, y estant expressement allé pour la visiter, si tost que ie fus releué du liect. Ce que i'ay souuent depuis remarqué à loisir en elle mesme, luy cuidant faire guarir vne hargne, qui luy en a tousiours depuis resté, pour n'auoir pas esté biē cousue, ou s'estre trop tost releuee, car elle ne garda pour tout que quarante iours la couche. Enuiron vn an & demy apres estant son mary decedé, & elle remariee à Pierre Chanclou, encor illec viuāt, redeuint grosse, & enfanta naturellement vne fille, à present mariee pour la seconde fois, demourant maintenāt à Nangeuille, auquel lieu sont encor plusieurs tesmoings de ce spectacle.

*Troisiesme histoire.*

**A** V R Y en Biere , pres Fontaine-bleau, à deux lieües de Nemours, Collette Berâger, femme de Symon de la Garde , outrepassant desia le dixiesme mois de sa grossesse, & portant de long temps son fruiçt mort, sans que pour le rendre les parties basses s'ouurissent, mãda en fin Vincent Valleau chirurgiẽ de Nemours (iadis mon familier :) lequel n'ayant autre moyen apparent de luy aider, l'incisa sur la fin de Ianuier , mil cinq cens quarãte deux, non au costé dextre (comme l'autre,) mais au fenestre; quelque peu plus haut, que n'auoit esté celle de Nangeuille, couppant premierement l'abdomen (ou vètre exterieur) puis la matrice; de laquelle il tira le fruiçt mort, enflé, & puant, avec la secóndine ia pourrie. Puis sans recouldre la matrice, reprint (côme

par

par aquit & à la defesperade) par cinq poinçts d'aiguille la peau avec quelque petite partie des muscles, comme encor il apparoiſt aſſez, n'y ayāt que le ſimple cuir cicatřiſé ſur les inteſtins, comme y eſtāt expreſſément allé avec Paue chirurgien de Nemours, (iadis ſeruiteur dudit Val-leau,) i'ay veu à l'œil, & manié à la main, à l'endroit de la cicatrice hargneuſe, qu'elle ſupporte ſans ennuy, pourueu qu'elle ſ'ayde avec quelque legere compreſſe, & bandage, ne laiſſant de trauailler pour gagner ſa vie comme elle peut, quoy que ſa rompure ſoit grande; qui eſt bien à noter, pour donner à entendre que ce n'eſt pas choſe neceſſaire de parfaire icy la gaſtroraphie abſolument, de peur de gaſter tout, en ſ'amuſant trop à ſe vouloir monſtrer en choſe peu cogneuë ſuffiſant maiſtre, ſans qu'il en

soit grād besoing. Sa geline fut pour tout d'un mois & demy; deux ans apres lequel temps elle accoucha naturellement d'une fille, & deux autres ans apres d'un fils nommé Pierre de la Garde, à present mareschal. Elle est encor demourante audit Vry, faisant estat de sage-femme à recevoir les enfans.

*Quatriesme histoire.*

**A**GNES Boyer, femme de Jean Cópain laboureur encor à present, comme lors, demourāt à Ville-reau, pres Neuville en Beauffe, apres auoir esté par quatre iours toute rōpue par l'importunité des sages-femmes, sans rien y profiter, fut (ainsi cōme les autres) ouuerte, & ce au costé dextre, par Philippe Migneau barbier de Neuville, l'an mil cinq cens quarante quatre: puis recousuë aux muscles, & cuir sur le lourd, & com-  
me

me il peut! De laquelle incision elle fut tost guarie au ventre: mais les meurtrisseures, que les matrones auoient faictes à la nature, empescherent le chirurgien plus de sept mois à les guarir. Elle eut aussi vne belle fille, qui vescut sept mois & plus, biẽ saine: mais au huietieme deuint malade à nourrice, au village mesme, dõt elle mourut. Peu de tẽps apres elle redeuint grosse, portant l'enfant presque tousiours pendant vers la hargne, qui luy restoit comme aux autres, sans douleur neantmoins: Mais elle ne pouuoit nõ plus que deuant accoucher, pour quelqu'vne des susdictes causes & obstacles (comme il est à cõjecturer.) Parquoy volontairement requit d'estre incisee comme deuant, ce qu'elle ne peut (pour priere quelle feist) obtenir de deux autres ieunes chirurgiẽs illec

expressement mandez de Neufville, ou ils se tenoient après la mort pestilentielle dudit Philippot : qui fut cause qu'elle, & son fruiçt moururent pitreusement ensemble par leur pusillanimité : si toutefois la foiblesse, ou quelque autre fascheux accident ne les empescha de ce faire.

*Cinquiesme histoire.*

**D**E nouveau, l'an mil cinq cens septante six, le vingt deuxiesme de Juillet, à Ambedoye, près saint Brissou, au terroier de Gian, fut aussi ouuerte Antoinette André, femme de Loys Garnier manœuvre, par maistre Adam Aubry, natif de Pithuiers, chirurgien demourant à Aubigny, qui m'en a rapporté par le menu & au vray, la testification de tout le succez, pour recognoissance d'avoir au paravant souuent avec luy conféré de ceste operation, Auquel  
cognois-

cognoissant la dexterité, & bon heur qu'il a en ses operations, i'auois conseil (à mō adueu) de n'en faire point de difficulté quand tous autres remedes cessants, il en faut venir là; non-obstant les aduis cōtraires, voyre des medecins mesmes, pour veu que ce soit avec discretion, & protestation faicte apres y auoir imploré l'ayde de Dieu: Cōsideré que la haste que lon a en ces hazards si precipitans, ne permet pas qu'on attende arriuer la responce du conseil venant de loing, comme on est contrainct de rechercher en lieux, & villes champestres, & que nuls d'iceux ne veulent, ou osent estre de c'est aduis; les vns pour n'en croire riē, les autres de peur d'estre blasmez, cōme auteurs du mal, s'il en bastoit pour quelque autre occasiō que ce soit, autremēt que bien. Depuis icelle deuenue grosse, & na-

turellemēt deliuree, fut quelque tēps apres contraincte de fuiure son mary, cerchans tous deux en temps de famine autrepert moyen de gaigner ensemblément leur vie.

*Sixiesme histoire.*

**E**N C O R' de plus fraische memoire, le premier iour de Feurier, mil cinq cens foixāte & dixhuiēt, Ieanne Michel, natifue d'Argent, femme de George Renauld, demourant aux faulxbourgs d'Aubigny, auancee en sa grossesse plus que du dixiesme mois, portoit de long tēps son fruiēt mort, ne laissant neantmoins de tracasser à ses affaires, tant qu'en fin elle fut contraincte s'arrester au liēt, ou apres auoir esté tourmētee long tēps sans effect és mains des sages-femmes, manda ledit maistre Adam Aubry, & maistre Guillaume Collas dōcte chirurgiē, lesquels ayās couppé à  
l'enfant



l'enfant vn bras tout mort, & liuide, qui sortoit de long temps au parauāt par la nature de la mere, mais ne pouuās auoir prinse sur le reste du corps, inciserent le costé dextre d'icelle, vn peu orbiculairement, & d'ouuerture assez estroicte, pour espargner la mere : qui fut cause à l'extractiō de l'enfant de causer fort grandes douleurs à ladicte mere, par ce que la matrice ne pouuant quitter l'enfant (pour l'estroicte ouuerture) suiuoit le traict du petit, comme si on l'eust voulu arracher elle mesme. Lesquelles douleurs neātmoins cesserent incōtinent que l'enfant & sa suitte furent mis hors. Ainsi apres les descharges ordinaires de la gesine (qui vindrent aussi bien que si elle eust accouché naturellement) peu de temps apres elle se releua, & eut ses mois accoustumez au bout de cinq sepmaines ; & incō-

tinent apres se trouua grosse, sçauoir est à la fin de May, se souciant desia (pour la fraische memoire du passé) de ce qui aduiendroit en fin de ceste grossesse. Auquel temps elle accoucha naturellement, & combien que l'enfant presentast vne des iambes seulement la premiere (qui est tres-mauuais commencement de demarche en telle danse) toutefois icelle estât remise par la sage-femme, le tout succeda tresbié. Depuis lequel temps elle est encor deuenüe grosse, n'esperant pas moindre secours de Dieu à l'aduenir qu'elle a experimenté par le passé, à present est deliuree naturellement de ceste seconde grossesse, vacant ordinairement à ses affaires, aussi bien qu'elle fit onc.

S E C O N -

## SECONDE SECTION.

*Probation seconde par raison.*

PRES CESTE premiere preuue par experiēces historiques, vient la seconde par dispute ; qui prend ses raisons de la nature, ou substance du subject examinee par ordre, & methode sur chacune des trois parties, qui seules se presentent à inciser, auāt que paruenir à l'enfant qu'on va chercher, lesquelles sont,

1 Les muscles du ventre exterieur, dict epigastre en Grec, & abdomen en Latin.

2 Le peritoine : qui est la membrane, ou taye dudit abdomen estāt sous lesdits muscles.

3 Le corps matrical. Quant à la vessie, combien qu'elle gise entre le peritoine & la matrice, à l'endroit de

la situation naturelle; toutefois elle ne se presente pas ou on faiët l'incision Cæsariëne, mais plus bas à l'hypogastre, & notamment en femmes prestes d'accoucher; esquelles la matrice fort estendue la deprime; principalement en leur trauail, auquel tēps elle est presque tousiours vuide, pour l'affiduelle enuie de pisser qu'elles ont: à cause dequoy elle tiët alors encores moindre & plus basse place que n'est le lieu de ceste section.

## DES MUSCLES DE L'ÉPIGASTRE.

*Premiere partie à inciser, & premieremēt pour la playe, & grandeur d'icelle.*

**E**N premier lieu il apparoißt qu'ils se peuuent sans danger de mort inciser; & ne fust-ce que par ce que Galen en la Methode monstre la fa-  
çon

çon d'en recouldre la playe par artificieuse gastroraphie.

Si on replique sur l'amplitude de l'incision, y auoir dāger par trop apparent ; le mesme autheur mōstre assez, que telle grandeur de playe n'est pas dangereuse, commandant qu'on agrādisse lesdites playes en tout l'abdomen, si elles semblēt trop petites, pour reduire les intestins, ou l'omentum s'ils sont sortis, & si autrement ne se peuuent remettre. Et si nonobstāt cela on fait encor' instance, que ce n'est de mesme, veu qu'elle est icy de grandeur par trop enorme, (consideré qu'il y faut faire passer vn grād enfant vif sans le blesser, ou mort desia tout bouffi avec ses secōdines :) Il y a responce, que la playe (quoy qu'elle semble fort grande, voire près d'vn bon demy pied, si tant en failloit couper) toute fois soudain après

l'enfant tiré, elle se racourcit iusques à moins, que de quatre ou cinq doigts; s'appetissant encor' tousiours de plus en plus, suiuant la retraction du ventre total rabaisé.

*Pour l'hæmorrhagie desdicts muscles.*

**M**AIS combié qu'ainsi soit, encor' semblera il à quelqu'un y auoir danger en telle incision des muscles, pour la grande effusion de sang: (qui toutesfois y apparut fort petite aux operateurs) mais il est à noter que fort peu de veines insignes se récon-trent és lieux, ou l'ouuerture de ces muscles la se fait: car on n'approche point des veines māmillaires ascen-dâtes, qui suiuent les muscles droicts, & lesquelles seules en ceste region icy semblent pouuoir faire grande hæmorrhagie suspecte.

Or encores qu'on les incisast iadis quelquefois par inaduertēce aux cu-rations

rations ramicales, faictes en lieu plus d'agereux que cestuy cy; si n'en mourroit on pas necessairement. Ce que toutefois Celse commande d'eiter, ioinct à tout cecy, que lesdictes veines, & autres de ce lieu se resserrent aux bouches, & aux canaux d'icelles, à proportion des autres parties de labdomen, se retirant soudain après l'extractiō de l'enfant; qui fait qu'elles desgorgent moins de sang. Mais bien qu'il en peust sortir abondance, à cela peut on aussi biē remedier par restreintifs, que Paul Æginete fait par ses enhæmes aux curatiōs calculaires, dont il en escrit en son liure sixiesme.

*Pour le lieu ou l'hemorrhagie des  
muscles doit couler.*

**O**R soit que peu ou beaucoup de sang en-sorte; encor me dira quelcun, iceluy (comme aussi le pus,

qui après sortira de la playe) deuoir couler après l'incision du Peritoine, (lequel il faudra aussi incontinent ouurir) dans la cauité du ventre; & que se corrompant là, comme dit Hippoc. en l'Aphorif. x x. du v l. li-ure, il infectera les entrailles, y faisant maints fascheux symptomes. Aquoy y a respõse; que cela ne peut estre, par ce que ceste cauité n'est capable, que pour y tenir les entrailles, avec ce qui doit entrer & estre quelque temps arresté naturellement, pour diuerses fins en aucunes d'icelles; comme dans l'estomach, les intestins, & la matrice; de mode, que si quelque autre corps (principalemēt liquide) y estoit enclos au parauant ceste incision, on le verroit (soudainement que la playe est faicte) impetueusemēt sortir cōme chose estrange, voire mesme les intestins, & l'epiploon,



ploon, quoy qu'ils soient corps solides (au pris du sang) & illec naturellement attachez. Comme tout cela se void és piqueures des hydropiques, és bleffez en ce lieu, és hargneux par rupture, ou l'intestin tend à sortir dehors, comme de fait il feroit, n'estoit bien souuent le cuir seul qui l'engarde.

## DV PERITOINE, SECONDE PARTIE A INCISER.

*De son incision, & de l'amplitude d'icelle.*

**Q**VANT au peritoine, les mesmes autoritez de Galen, avec celles de Celse, & Æginete, escriuans de ladicte gastroraphie, monstrét assez qu'il se peut de mesme inciser sans mort, puis qu'ils enseignent la curation d'iceluy incisé.

Quant à l'amplitude aussi de la

playe, ils l'admettent assez curable, puisqu'ils commandent de l'amplifier, si elle est trop estroicte pour y faire r'entrer ce qui en est yssu.

Mais outre cela les anciennes curation des grandes hargnes, faictes par dilaceration, ou rupture d'iceluy (qui sont pires operations quant au peritoine, que n'est nostre incision) le monstrent encor' mieux; dequoy parle Celse, & les autres; pour lesquelles guarir, on incisoit iadis ledit peritoine, & les muscles qui le couurent, voire avec perdition nouvelle de bonne partie de sa substance; retrenchant tout à l'entour encor' plus largement, qu'il n'estoit rompu, & couppant en haut & en bas, & aux costez sur les bords (tant qu'ils sont longs) de grands filets, afin de rafraichir la playe, comme on faict en la rejonction des leures de ceux qu'on

nomme

nomme, bec de lieure : par ce que le-  
dit peritoine autrement ne se pour-  
roit consolider sous la gastroraphie :  
qui estoit iadis vne operation fre-  
quente, & maintenāt si peu, ou point  
pratiquee, qu'il semble que ce soit  
vn songe, nonobstāt que de nouveau  
vn maistre florent vallee natif d'Or-  
leans, & vn Borliuet de Montargis,  
operateurs courāts pays, l'aient pra-  
tiquee en maints endroiĉts hureu-  
sement.

*Pour la seureté du spāsme, en la  
section du peritoine.*

**O**R n'est il pas à craindre ( com-  
me on peut objecter) de spāsme  
pour estre ceste partie icy membra-  
neuse, voire (si on veut) aucunement  
nerueuse, & sensile : veu que tel ac-  
cident n'y suruiuent pas alors mesme  
qu'on l'a blessé en picquant : Et par  
plus forte raison n'aduiēdra il, quand

on l'incise en taillant, considéré que l'incisiō est (pour la plus part) la guérison de spasme fait par poincture. Ce qui apparoiſt encor' plus euidēt, par ce que tel spasme n'aduient pas mesme es bien grandes dilacerations d'iceluy cassé en endroits plus dangereux, que celuy ou nous l'incisons à la Cæsarienne, en tel lieu, qui nous semble estre le plus commode, & à nostre chois. Or est il que dāger prouenant de spasme (voire le spasme mesme quel quil soit) n'aduient pas volontiers, sinon quand quelques fibres vrayement nerueuses (comme ne sont pas celles de nostre peritoine) tiennent d'esgale fermeté, aussi biē à l'vne qu'à l'autre de leurs extremittez; & se retirent naturellement (pour quelque fascheuse cause) à leur commencemēt, avec extension violente, & douloureuse. Ce qui ne peut estre

estre au peritoine, pour ce que la fin  
anterieure de l'un ou de l'autre de ses  
costez (laquelle se termine ensemblé-  
mēt avec l'autre son opposite à l'en-  
droit de la ligne blanche) est plus la-  
sche, & obeissante sur le deuant, que  
n'est son principe, qui tiēt ferme par  
derriere aux ossemens, & ce par pru-  
dence naturelle; afin que les finales  
extremitez, (vne & autre) de deuant,  
qui se viennent rencontrer, & ioin-  
dre ensemble, se puissent (sans offen-  
se) librement retraire, ou allonger,  
comme il est tousiours necessaire, tāt  
en santé, que maladie; à ieun, comme  
à plein ventre; en gros & en ventrus,  
cōme en maigres & plats; en hydro-  
piques, cōme en hectiques; en gros-  
ses femmes, comme en non encein-  
ctes, tant pour la necessité de rece-  
voir ce qui nous enfle, que pour eui-  
ter l'inconuenient de vacuité, si ainsi

ne se faisoit, qui est chose absurde en philosophie naturelle.

*Pour l'accident de hernie, qui reste de ceste partie incisée.*

**Q**UE si on allegue (pour nous contrarier) le mal, & ennuy estre fort à craindre, lequel reste après l'incision guarie, pour la hargne qui y demeure à cause du peritoine diuisé, & mal reconsolidé; Je responds qu'elle est euitable, si la gastroraphie bien faicte se remet en vsage, par la diligence des chirurgiës de bon esprit. Mais encor' que cela n'aduienne, si est-ce que tel mal est fort tolerable, principalement aux femmes, pourueu qu'elles la soustiennēt, & repoulsent par brayers, ou par seules bādes, sanglettes, ou larges ceintures appropriées sous la robbe, sans douleur, ennuy, ou diformité apperceuable, voi-

re (qui plus est) avec grand aduantage, si estoit befoing de reuenir à vne grossesse d'après, à pareille section, comme il est quelquefois aduenu. Car ce feroit autāt esparagner de peine à l'inciseur, & de mal euité aux femmes, qui ne pourroiet autrement accoucher. Et posé le cas encor', que cela ennuye, ou empesche, ou face quelque douleur, si est-ce vn grand bien par ce peu de mal, en euitervn, voire deux infiniment plus grands, & autrement irremediables; qui est la miserable, & presente mort de la mere, & de l'enfant.

Quant à l'hæmorrhagie, elle n'est icy à craindre à cause de la partie, veu qu'elle est de foy exangue, & n'a pas grād compagnie de notables veines.

*Du corps matrical, tierce partie à inciser.*

SI ON fait icy (comme auparauāt)

instance sur ce, que la playe ne peut estre que bien grāde, & consequemment perilleuse, y estant passé librement vn tel corps, ie di (comme deuant) conformément avec Galen, au lieu ou il traicte de la dissection d'icelle, qu'elle se retire soudain après l'enfantement. Ce qu'elle fait encore plus, que l'abdomen: par ce que l'enfant, & la secondine estants retirez, elle n'a plus rien en soy qui l'engarde de s'approcher en elle mesme de toutes ses parties: Et est cela suffisante cause, qu'elle n'a que faire de coustures, s'approchāt costé à autre si à propos, qu'il semble qu'elle se consolide par premiere intention; avec quelque autre ayde de telle chaleur naturelle, & humidité radicale, qu'elle cōmunicoit à l'enfant; aydee aussi de la suaue fomētation des parties prochaines, & ce naturellemēt, & mieux  
que



que par attifice, comme nous traitōs en autre lieu, par forme de problème à l'academique.

*Pour l'hæmorrhagie uterine, qu'elle n'est pas grande.*

**I**L reste de respondre (comme deuant) à l'hæmorrhagie de ceste partie, ayant manifestement vne infinité de veines & arteres. En quoy est premieremēt à considerer, qu'au recit des chirurgiens il en sort peu de sang en l'operation, le tesmoignage desquels est conforme à raison : estāt à presumer, que l'enfant ja grand en doit auoir consumé beaucoup pour sa nourriture, & qu'une autre grande quantité se diuertist lors es mammelles, pour y estre changé en nature de laiēt. Car ce n'est qu'un celuy duquel est faiēt le laiēt, & celuy duquel l'enfant viuoit en l'amarris, estants tous deux faiēts du menstrual, qui pour

ceste raison cesse presque tousiours aussi bien aux nourrices (pour en faire du laict) comme il fait aux meres enceintes ( pour seruir d'aliment à l'embryon ) leur estant pour ceste fin baillé de nature aux aages aptes à porter, ou nourrir enfant, comme auant ces temps là il n'est pas octroyé aux fillettes, & après iceluy il est osté aux vieilles.

Que si on m'allegue, que nonobstāt cela, encor ne peut il estre pourtant, & tant de vaisseaux qui y sont, qu'il n'en sorte sang à ruisseaux ; Je respōds qu'ainsi soit ( par hypothese ) aussi bien cela aduient il, & doit aduenir aux accouchees naturellemēt, ou bien elles feroient en danger . Or est-ce vn mesme sang aux vnes comme aux autres ; parquoy ceste abondante hæmorrhagie non seulement n'est pas dāgereuse icy, non plus que là ;

là ; mais au contraire elle oste le danger ; par ce que ce sang n'est que le reste de la nourriture , & le residu de la prouision de l'enfant retenu encor en la matrice , ou il ne peut plus seruir à la mere que de nuisance , comme retenāt l'ancienne nature du mēstrual , dont elle a accoustumé de se descharger de mois en mois , sur peine de danger . Or posé encor' le cas , que tel sang fust bon & vtile , voire à la mere mesme , Je responds qu'encor n'en est pas dangereuse à mort la perte , par l'aduis mesme de Celse , disant en la section vesicale , qu'il ne faut pas s'espouanter és femmes de l'abōdante perte du sang : Et toutefois celuy duquel il parle en ce lieu là , & qui lors se perd des lieux sains , & nets de la vessie , ( i'entends si elle n'est pas ulcerée , comme souuent elle n'est ) de laquelle le col est incisé , est plus sain ,

& necessaire, que celuy de la matrice, partie de moindre importance à l'indiuidu, que ladicte vefcie.

Et n'est à dire que pour ceste large effusio de sang, l'amarris en soit mortellement debilitée; car ce sang n'y estoit pas enuoyé pour elle, mais en faueur de l'enfant, qui en est tiré (cōme est predict.) En tesmoignage de quoy quand nature n'y enuoye rien en aage trop ieune, ou trop vieil (ou elle ne permet d'auoir enfant) ladicte matrice s'appetisse & desseiche si fort, quelle est es vicilles appelée morte, mesme en la saincte Escriture.

*Du lieu ou doit confluere le  
sang matrical.*

**Q**U E si on m'objecte, que ce sang de là issu, tenant de telle impurité s'espand, & retient avec danger en la cavitée du ventre, au dommage des entrailles; Il y a double responce, l'vne

l'vne ja rendue pour le sang sorti des muscles de l'abdomen, cest à sçauoir qu'il ne peut arriuer là, qu'il ne soit tout soudain mis hors : L'autre plus pertinente pour ce sang icy est, qu'il y a assez d'esgoust plus à propos par l'orifice, & col matrical, lors naturellement, & par les maniéments des sages-femmes assez ouuerts pour l'euacuer; comme aussi il aduiét aux accouchees naturellement. Et sert de beaucoup alors ceste ample ouuerture non seulement à ceste fin, mais aussi pour faire (si besoing est) en l'vne & l'autre gesine injections medicales, tendantes à consolider la matrice incisee, selon l'occurrence des indications: dequoy toutefois on ne eust que faire és precedētes incisios.

*Que spasme n'est à craindre pour  
cette section de matrice.*


**P**OVR ce que quelquefois peu de

nuifance en la matrice (prouenāt de quelque peu d'humeur vicieux qui y croupit) ou quelque leſion petite de ſes parties inferieures (cōme les douleurs ſont en icelles plus ſenſibles qu'aux hautes & biē interieures) apporte, & cauſe de merueilleux accidens iuſques aux parties nobles, & à tout le corps: Il pourroit ſembler que tels, & pires maux d'euffent icy aduenir, quand elle eſt ſi notablement bleſſee en ſa propre ſubſtance interieure, mais l'experience eſtant à ce contraire, & le peu ou point de douleur, que reſſentent les Cæſariennes en ce lieu, quand on les y coupe, nous fait apprendre le contraire; & nous apprend de meſme, que ceſte instrumentaire partie eſt en ce lieu là où inſenſible, ou de ſentimēt fort obſcur; & conſequemmēt moins ſubjecte à dāger quāt à ce poinēt. De laquelle

quelle raison avec d'autres qui consistent en dispute plus subtile, de paradoxe estant vray, ie me contenteray à present de renuoier à vn plus long discours fait de ceste matiere, pour n'allonger cet abregé.

### TIERCE SECTION.

*Troisiesme espece de probation  
par authoritez.*

 OMBIEN que ceste tierce partie de preuue par authoritez en semblables, ou plus hazardeuses operations semble tenir des deux autres, qui se font par exemple, & ratiocination en argumētant de pareil à pareil, ou du plus grand au moindre; Toutefois nous nous en feruirōs icy comme d'un tiers, en pareilles, ou pires affections, pour n'en auoir point

d'autres de mesme nature, quant au desseing final, & à la cōduicte de l'operation, & à la qualité de l'effect. En quoy nous auons icy voulu suiure le conseil du sage Periandre, pour n'introduire riē de nouueau (encor' qu'il mene sa raison avec soy) qui n'ait cōformité à quelque loy annancienne, ou coustume du pays, ou notable fait bien remarqué en chose pareille, ou bien peu dissemblable.

*Des muscles epigastriques, par  
authoritez historiales.*

Pour suiure pareil ordre que cy auant, nous reprendrōs les muscles epigastriques; Et en premier lieu produirons l'autorité de Galen au cinquiesme liure des lieux malades, d'un grād & profond abscez en iceux, par luy descouuert pour tel qu'il estoit, cōtre l'opinion d'autres medecins: Auquel lieu ie renuoye celui  
qui



qui en doutera. Ledit<sup>r</sup> sieur Paré, & autres en ont veu (comme moy) vn en pareil lieu, estant de merueilleuse grandeur, & danger mesme au iugement des plus fuffisans medecins & chirurgiens de ce Royaume y appelez : qui furent messieurs Hollier, de Gorris, Duret, Budé d'Orleans, Antoine François d'Estampes, Flexelles medecins; de Nimes, Paré, Gerard, le Brun, Tramot chirurgiës, en presence : & du Monceau, Fernel, Race le pere, & autres en absence recherchez de leur aduis. Cet abscez auoit des sa naissance prins commencement au hault du dextre muscle long, trois doigts dessus l'endroit du nombril; (lieu voyfin du fonds du ventricule, & prochain de la regiõ du foyé) duquel lieu fort profond & en grande estëdue plein de matiere crasse, outre les autres signes faisoit foy la dou-

leur s'augmētant en ce lieu à l'extension du ventre, & à l'erection de la poictrine, quand ce muscle s'estendoit en ses actions là, auquel le mal estoit premieremēt suruenu par forme d'inflānation œdemateuse, fort profonde sur la fin de plusieurs, diuerfes, & longues maladies succedātes l'vne à l'autre, & se finissantes par cet enuoy d'humeurs heterogenees symptomatiquement, en region indeuē. Ce fut en feu illustre damoiselle, Loyse de Humieres, dame d'Enragues, au boys Mallesherbes : duquel abscez ouuert ( après estre finalement venu à telle maturité, qu'on auoit peu esperer) sortit impetueusemēt vn incredible amas de purulēce, iallissant outre les pieds du liēt, qui coula abōdammēt plus d'vn mois & demy, par vn ample orifice, fait d'vn caustique actuel, espois d'vn demy doigt,

doigt, large de deux, profondât plus de trois, auant que pouuoir atteindre au lieu ou croupissoit vn tel boubier de fœteur insupportable, ne restant plus que le peritoine à percer, ou rōpre, que tout cela estant de long tēps largement espendu entre iceluy, & presque tous les muscles, ne fallast loger avec les entrailles, comme il estoit facile à veoir par la profondeur de l'ouuerture, tentes, sondes, & canules qu'on y inferoit. Ce mal estoit pire infiniment (quant aux muscles epigastriques) que nostre incisio, duquel neantmoins graces à Dieu elle guarit en assez peu de iours. Tels personnages, desquels aucuns viuent encor', valent bien pour tesmoignage, & autorité les plus suffisans du siecle passé.

*Du peritoine, par autoritez.*

Q V A N T est du peritoine, ie laisse

à vn chacun confiderer la punction des hydropiques, iadis fort en vfage, & tant celebree par Hippocrates, en laquelle fil aduient danger, ce n'est pas à raifon du peritoine, mais de la foudaine & abondante effufion des eauës, cômè donne à entendre le mefme Hippocrates au x x v i i. Aphor. du v i. liure: Avec quoy eft auffi le plus fouuent conjointe la vitieufe diathese du foye, laquelle frufte ce remede de fon bõ effect. Cela ne s'entreprend plus gueres au iourd'hui en nul; pour-ce qu'ores la pluspart n'en efchappe pas; & ce à raifon que fi quelquefois on l'ofe entreprendre, c'est trop tard, ayant le mal prins force indomtable, pèdant qu'on famuſe (comme la couſtume, & l'art commande) aux plus legers remedes; Et alors eft par calõie attribué le malheur, non à la caufe qui l'a fait, mais

au remede qu'on y a voulu apporter, comme c'est l'ingrate coustume des idiots: Nonobstât que quelques vns de ceux, que pour ceste crainte on laisse mourir, par faute de ce remede, soient quelquefois curables, & principalement si l'hydropisie est faicte (comme souuēt il aduient) de la corruation, esgoust, & amas de quelque vomique, ou aposteme interieur, lequel sestant rompu, enuoyé (comme il peut) ceste abondante descharge dans la cavitè du ventre, d'où elle ne peut autrement sortir, que par ceste punction; principalement si elle est de sanie quelque peu espoisse, qui est accident duquel la cause est mal-aisée à cognoistre, voire mesmes aux plus clair-voiâts; Et toutefois facile a y pourueoir sans grand danger, si l'origine en estoit descouuerte, & la punction de ceste membrane (après

les muscles ) bien administree, cōme bien souuent l'effect fortuit plus tost que artificiel l'a monstre . Car il me souuiēt qu'estant aux escoles de grammaire à Orleās, i'ay veu vn gros portefais(nōmé, va si tu peux) hydropique de long temps desesperé, auquel à S. Aignan vn autre semblable belistre luy trāsperça le ventre d'vn grād coup de cousteau, d'oū subitement fortit eauë pourrie à ruisseaux, lequel soudain après estant guarý se remit à trauailler cōme deuant, sans retóber.

Je propose encor' icy la brulure d'iceluy peritoine outre les muscles, (car autrement faire ne se pourroit) avec vn fer ardāt, en lieu fort suspect, aux anciēnes vstions des hepaticques suppurez : Aufquelles operatiōs aussi si quelqu'vn mouroit (cōme il est bien à croire que cela aduenoit souuent pour la noblesse de telle partie si offen-

fi offensée, à cause dequoy on a prins exemple à n'y retourner gueres volontiers) ce n'estoit pas pour l'offense du peritoine, mais pour la ruine du foye, quand la purulence estoit semblable à de la lye : les autres guarissoient, comme dit Hippocrates en l'Aphorif. xlv. du vii. liure.

Et outre cela encor' auōs nous pour exemple la fort grande incision d'iceluy, en la cure anciennement pratiquée, & n'agueres renouuelee, mais à present fort rare par l'ignorance des operateurs : (au dōmage mortel de plusieurs) c'est de la captiuité du boyau aux hernieux intestinaux, lors mesme qu'ils sont ja en iliaque, & prests à mourir, si on ne les incise avec soudaine amplification de l'ouverture du peritoine. Ce que n'agueres practiquoient les susdits Valles pere & fils, & feu Martineau de Mô-

targis, dit Borliuet; comme aussi m'a testifié feu monsieur Alexis Gaudin auoir esté fait à Blois (luy présent) en la personne d'un sien amy par Maupas chirurgien fameux; auquel aduis ils conclurent ensemble, n'ayans autre moyen de le sauuer: Car sont telles necessitez qui font trouuer les grâdes cures aux doctes, industrieux, & discrets, aydez en ces œuvres charitables de la faueur de Dieu. Il y a plusieurs autres tels ahurtemens, que sans grand dōmage portent ces deux parties de l'abdomen, l'une charneu-se aux muscles, l'autre membraneu-se audit peritoine; desquelles nous en traittons quelques vnes en un autre discours particulier, & en toucherōs aussi en bref icy quelques autres en ce traicté de la matrice, pour leur estre communs avec elle.



*De la matrice, par authoritez.*

**R**ESTE de considerer par production d'authoritez (s'il s'en trouue) quels autres pareils, ou pires dangers endure la matrice sans mort: Mais premier que de cōferer elle incisee avec elle mesme autrement interessee, nous parangonnerons avec son incision, celle de la vescie sa prochaine voyfine: Et ce en l'extraction du calcul, qui doit sembler pour plusieurs raisons estre vne operation infiniment plus dangereuse, que nostre incision Cæsarienne.

*Comparaison de la matrice incisee, à la section de la vescie des calculaires.*

**P**REMIEREMENT l'action ou vsage de la matrice n'est pas necessaire à la particuliere personne (qu'on nomme l'indiuidu) ains à la cōseruation de l'espece; encor' n'est

ce pas pour tousiours, mais seulement en quelque aage. Mais l'usage de la vescie est de si importante necessité, qu'elle ne peut estre oyfiue vn seul moment d'heure: Et pourtant y a il plus de consequence à l'offenser, que la matrice. Ce neantmoins on void que bien souuent on n'en meurt pas: qui donc à entēdre qu'encor' moins fera la fēme pour la matrice incisee.

Secondement, après la suffisante ouuerture Cæsarienne en l'epigastre, on peut veoir manier & inciser la matrice en telle partie qu'on veult, au choix de l'œil, & de la main pour trouuer, & tirer l'enfant à l'aïse du chirurgien, & en assurance pour la patiente; mais cela ne peut estre en la commune section de la vescie par le perinée; à laquelle on ne procede qu'à taton; soit à la couper, soit à trouuer le calcul, vn, ou plusieurs

fieurs, & encor' plus à les tirer: de mode, que souuent les plus habiles operateurs sçauēt bien eux mesmes, qu'ils ont (sans mal y penser) esté souuent cōtraincts de laisser l'œuure imparfait, ou de happer, arracher, & amener avec leurs ferremēs vne bonne partie de la vescie avec le calcul; donnants souuent à entendre pour excuse à ceux qui n'y cognoissent riē, que c'est vne taye, de laquelle la pierre est particulièrement enueloppée, & par l'attachement d'icelle, adhérante à la vescie. Ceste opinion est neātmoins mal-aisée à croire, quoy qu'on en die ou escriue; & ce pour grands raisons. Car si tel calcul estoit enueloppé d'une membrane, ou bourse particuliere, il ne deuroit point faire de douleur ny d'ennuy, ou empeschement d'vrine, dont on d'eust faire cas. Pourquoy dōc alors se sous-met-

troit on à ce danger d'incision sans  
besoing, comme de gayeté de cueur  
trop gras, à laquelle on ne se renga  
communément qu'en son corps de-  
fendant, & cōtraint à coups de pier-  
re? Car ceste enueloppe qui le reue-  
stiroit estant de soy insensile, polie &  
onctueuse, l'engarderoit de faire par  
son asperité attrition, qui causast vl-  
cere à la vescie, au lieu ou il sied; &  
n'y ayant point d'ulcere, il n'en forti-  
roit point de bouë, de laquelle vint  
mordication aux parties voyfines.  
Que si on réplique, que posé le cas  
qu'il soit ainsi (quant à ulcere, & dou-  
leur ulcereuse) encor' ne laisseroit il  
pas d'y auoir douleur pesante, pour  
la grosseur du calcul, & aussi douleur  
tensive pour l'estouppement qu'en  
auroit fait sa croissāce. Je demande  
cōment & de quelle matiere il pour-  
roit estre creu ainsi gros, estant enue-  
loppé

loppé de ceste robbe? Car si la taye a  
commencé de s'y faire, le calcul estant  
encor' petit, elle a deu deslors empes-  
cher que le phlegme de l'vrine ne luy  
touchast pour s'y agglutiner ( qui est  
la seule cause materielle de sa croif-  
sance) comme il a esté de sa genera-  
tion. Si on dit qu'elle s'y est faicte, &  
accreuë depuis qu'il est gros, ie de-  
mãde ou elle a cõmencé à naistre elle  
mesme. On ne dira pas que ce soit  
sur luy ny de luy, il faut donc que ce  
soit de quelque partie de la vescie. Et  
si ainsi est, comment auroit elle peu  
estât si petite, & naissante encor', en-  
uelopper ce grand calcul, ou mesme  
s'appliquer à luy qui ne fait que fuir,  
vaguer, se remuer, & iouïr en la ve-  
scie tousiours humide? Cela est si  
grossier qu'il ne merite d'estre refuté.  
Car encor' qu'en quelques autres en-  
droits il se face quelquefois extraor-

dinairement des calculs, cela n'est pas de mesme pour infinies raisons trop lógues à inferer en vn abrégé, & traitables plus à propos autre part. Et bié qu'ainsi fust, encor' apparoiestroit il que la suruenüe de ceste taye deuroit auoir apporté ce bien en lieu de mal, qu'ostant l'attrition, l'vlcération, & la douleur, elle osteroit aussi le besoing d'incisió; ce qui n'est pas, veu qu'on s'y expose par contraincte avec hazard merueilleux. Toutefois pour n'en entrer en querelle contre tel qui par vn préjugé favorisera ceux qui l'ont escrit, ou qui voudra couvrir telles fautes, sous l'ombre d'une opinion receüe, voulant favoriser quelque sien amy, i'en croiray moy-mesme, comme les autres, ce que ie pourray, attendant d'estre mieux informé de ce qui en est.

Tiercement, outre tout cela (pour  
reue-

reuenir à nostre comparaiſon ) il y a au perinœe pluſieurs notables venes, arteres, fibres, muſcles, nerfs, ſphinctres, voyſinages de vaiſſeaux ſpermatiques, tendons & ligamens dangereux à offeſſer en cherchant, inciſant, dilatant, ou pluſtoſt cruellemēt dilacerant avec pluſieurs faſcheux ferremens la veſcie par ledit perinœe: Et rien de tout cela ne ſe preſente par l'epigaſtre, en l'inciſiō matricale; qui pour tāt de raiſons la fait eſtre moins dāgereuſe, que la veſicale, de laquelle touteſois on eſchappe bien.

Quartemēt, la veſcie qu'on inciſe eſt (le plus ſouuent) grandement vlcerée: Et au contraire la matrice qu'on coupe eſt lors fort ſaine (quāt à ſoy) & conſequemment moins dāgereuſe à offeſſer, & plus habile à guārir.

Quintemēt, ne pouuant eſtre qu'il

n'y ait en l'une, & en l'autre incision perte de sang, il apparoit par les raisons predictes, que celuy des Cæsariennes venât de la matrice entamee est impur, superflu, & nuisible fil estoit retenu, mais point dommageable fil se perd. Au contraire celuy de la vescie incisee aux calculaires est naturel, pur, vtile à retenir, mais dommageable à perdre; nonobstât quoy on en reschappe: ce qu'on pourra donc encor' mieux faire (quant à ce poinct) en nostre Cæsarienne necessité.

Finalemēt, & pour la sixiesme consideration, presque tousiours vne infinité d'accidens restent ineuitables de l'incisiō vesicale; qui la redent plus à craindre: Et entre les autres vn incurable degoust d'vrine par la playe, ne se pouuant bien souuent rejoindre; qui est (outré les douleurs acres,



& les puanteurs ordinaires) vne subjection ennuyeuse d'estre pour ceste cause banny de toute société, cōuersation, entreprinse, & maniment d'affaires à pied, ou acheual, couché, assis, ou debout, mais ( qui plus est ) bien souuent la mort s'en ensuit.

Au contraire, en la Cæsariēne rien de cela ne suruiēt, ny de pareil, sinon vne tolerable hargne, aisee toutefois à entretenir (comme sont ordinairement toutes les autres sublimes & hautes) mais euitable par bonne gastroraphie, qui voudra, & scaura bien l'administrer : laquelle neantmoins n'est pas necessaire, mais au contraire, il est quelquefois souhaitable & vtile à l'aduenir, que la hargne demeure, cōme est predict. Nonobstant toutes lesquelles considerations, encor' void on (à raison d'une coustume qui s'en fait) que ceste incisio vesicale

si difficile, douloureuse, dangereuse, ne laisse pas d'estre recerchee, combien que le plus souuent on s'en puisse long temps exempter, voire totalement passer sans grand mal sentir, (ien'entéds de tous) ou pour le moins sans mourir. Car tel a porté quarante ans le calcul, qui n'en est pas mort, de mode que si tels personnages vôt à ce remede, ils ressemblét lors à ceux, qui sans cōtrainte vôt de sang froid à quelque mortel supplice. Pourquoi donc ceste matricale, plus seure, plus aisee, plus vtile, plus necessaire, & plus pressiue; voire sur peine de double mort piteuse, & apparente sur l'heure mesme (si on ne se depesche) n'est elle cerchee, receuë, bien venuë, quand il en est si grand besoing?

*Discours par occasion sur l'extraction du calcul par l'hypogastre ou petit vêtre.*

**S**I tant de facilité, ou profit nous doit recommander la section Cæsarienne par l'epigastre, certes autant, & encor' plus de difficiles & ineuitables accidens, nous doiuent avec vn horreur plus grand destourner de la vesicale par le perincee, ou pour encor' mieux faire nous doiuent inciter à inuenter quelque bon moyen de la changer en mieux, comme est de la faire passer du perincee en l'epigastre, ainsi qu'est nostre Cæsariene. Chose que lors pourra aisément administrer vn chacun vray chirurgiẽ, ne luy ayant par cy deuant esté permise par Hippocrates mesme en son Iuremẽt, quand on y besongnoit seulement par le perincee, & à l'antique, avec tels dāgers qu'il est predict. Ainsi le peuple en fera pour infinies raisons mieux secouru en tous lieux, par plusieurs doctes, & habiles chirur-

giens, qu'il n'a esté par cy auant par quelque peu de coureurs, impudens, hazardeux, & ignares, lesquels (sauf l'honneur des bons & sçauans) ont par vn monopole inhumain tyrānisé, & tyrānisent les corps & les bourses des grands & des petits, cōtraints à passer par leurs mains, à quelque prix que ce soit, & à les payer auant la main : Et ce par la nonchalance de ceux qui le d'eussent mieux faire que tels insuffisans : car des autres ie ne parle point. Ce chāgemēt nouueau, que ie propose ne se feroit sans grandissime raison, & exemple mesme de nos predecesseurs modernes, veu que celle des anciens qu'on peut nōmer Celsiste, est à présent changée & pratiquée à la Mariane. Ledit Celse ne permet pas qu'on y vienne auāt neuf ans, ny après quatorze, mais la Mariane fauorise toutes aages, avec l'industrie

duſtrie de ſes nouueaux ferremens. Aucuns avec quelques raiſons interpretent le dire de Celfe en ſi peu d'eſpace pour n'eſtre pas poſſible en ce bas aage, que le petit ſiege de l'enfant puiſſe ſans danger receuoir les deux doigts d'un fort operateur, pour amener avec iceux le calcul au perinée ; Et pour eſtre après quatorze ans les calculaires ja ſi grãds & eſpais, que les doigts de l'operateur ne peuvent atteindre au calcul, pour l'amener, ranger, & tenir fermement ſubject au lieu du perinée, où il faut ſur luy faire inciſiõ. Laquelle operation de Celfe on nomme vulgairement Guidoniſte, eſtant faiçte avec les inſtrumẽs ſpecialiſez par Guidon, lors ſeuls en vſage pour ceſte operation, laquelle il tient ſuſpecte auſſi en tout autre aage, que de quatorze ans ; ſuiuant comme par aquit l'authorité du

Brun, auquel (ainſi comme aux cou-  
reurs maîtres de ce meſtier) il ſe rap-  
porte du tout, comme faiſoit de ſon  
temps Hippocrates. Et toutefois il  
n'eſt pas, que du temps de Guidó on  
n'ait beſongné à la Celiſte en toutes  
aages, veu que non ſeulement du der-  
nier temps de nos peres, mais encor  
à preſent en infinis lieux on l'a prati-  
qué en vieux & ieunes, avec auſſi bõ  
ſuccez és champs, bourgades, & vil-  
les champeſtres, qu'on fait és grandes  
citez la Mariane. Qui m'a fait quel-  
quefois conjecturer, que les premiers  
caracteres des nombres aux deux  
aages exprimees par Celiſe, ont eſté  
changez aux exẽplaires trãſcripts du  
premier original. Qui a eſté choſe  
auſſi facile à l'ignorance des libraires,  
que paiſiblement enduree par les le-  
cteurs, veu que les medecins & chi-  
rurgiens doctes, liſants Celiſe, & ſe la-  
uants

uants les mains de ceste operation, ont passé par dessus sans y prendre garde, comme si fust chose par la permissiõ, voire defense d'Hippocrates, ne leur appartenante en rien : Et qui plus est tel homme se trouue à vingt, trête, & quarãte ans estre plus court, & moins espais qu'un autre ieune de quatorze ans ; & cõsequemmẽt plus aisé à luy tenir par le siege le calcul subject au perinœe. Or soit ainsi, ou non ; il est bien tousiours certain en quelque sorte qu'on y besongne, que tout ainsi que les trop ieunes enfans, pour leur delicate molesse, ne sçau- roient sans grand danger venir à ce- ste incision vesicale, aussi ne peuuent les trop vieux, pour leur foiblesse, & decadence ; qui sont (à mon aduis) les deux raisons qui ont induit Celse à faire prescription sur les aages : sui- uant quoy, il doit auoir escrit depuis

neuf, ou dix iufques à cinquante, ou foixāte, comme il nous faut auffi iuger de la Mariane, & de toutes autres qui fe pourront inuenter. Nous pouuons veoir par la diuerfité des dofes, tāt aux autres celebres antidotes des anciens, qu'en la theriaque mefme fi exquife, & vſitee: Cōbien a eſté touſiours commun l'erreur de ſubſtitution aux nombres. Tant y a que ſoit l'vn ou l'autre, il apparoiſt touſiours par là, quel hazard il y a en ceſt œuvre, & le tout ou pour la plus part, à raiſon du lieu incifible, pour lequel moins dangereuſement, & plus amplement ouurir, & plus aiſémēt donner ſecours aux perſonnes des aages ſuſdictes, on ſ'eſt aduiſé d'inuenter ceſte Mariane, touſiours neātmoins auffi hazardeuſe que l'autre, & quelquefois encor' plus, pour la peine d'aller en icelle chercher à taſtons les  
pierres



pierres après la section, laceration & dilatation : lesquelles on tiét de plus prés subiectes à la Celsiste ou Guidoniane, ny ayant pas aussi danger de prendre la vescie avec le calcul, comme en celle du haut appareil.

*Exemple historial sur ceste proposition de conseil nouveau.*

**C**E que nous proposons icy, l'ayāt de long temps auparauāt diligēment considéré auant que d'en auoir rien ouy, ny veu, ne leu, me semble de nouveau estre plus raisonnable à proposer, comme chose fort vtile, qu'il ne fut onc; d'autāt qu'il se trouue exemple de telle operation heureusement executee, après auoir en vain tenté tous autres moiens, quoy que ce fust possible la premiere de ce nom, & faicte à la desesperade, moitié par hazard, moitié par artifice, par Franco mesme, l'un des pri-

mes operateurs de nostre temps, en vn ieune enfant, à l'instance priere du pere, comme il escrit luy mesme, defendant toute fois (de quoy ie m'esbahis) d'y besongner ainsi. Peut estre qu'il craignoit d'ofenser la cōfrairie, ou d'estre atteint de temerité par les communes objectiōs cy après ensuiuant, si pour quelque raison telle, ou autre aucū mal fust suruenū à son patient en acte si nouueau, & non accoustumé.

A cecy peut on encor' rapporter l'histoire du Frac-archer de Meudon calculeux, d'escripte par Monstrelet, lequel estant ja condamné à mort, fut par permission de iustice (à l'instance poursuite des medecins de Paris) ouuert le ventre pour chercher, & voir le lieu de la pierre; & puis les boyaux estants remis, la playe fut recousue avec recouurement de sa san-

té, remission de la sentence, & bien fait à luy ottroyé pour ceste patience forcée. Monsieur Paré (qui l'allegue comme chose monstrueuse, au xvi. chap. de son xxxiii. liure) ne spécifie pas (comme il eust bien peu faire) deux choses en chirurgie fort remarquables. Premièrement, siceste recherche de calcul fut par eux faicte interieurement au rognon, ou en la vescie. Secôdement, par quel endroit extérieur peut auoir esté cōmentee ceste ouuerture; sçauoir est par les lombes (dits le fillet des reins) ou par quelque autre lieu de l'epigastre vers les flans. Quant au premier, il est plus vray semblable que ce fut au rognon, qu'en la vescie; non seulement pour-ce qu'il est là fait mention de nephritique, & douleur de costé (qui n'auient pas pour le calcul vesical, ains pour le renal,) mais aussi pour-ce que

ceste perquisition estoit expressement ordonnee pour faire vn nouveau, & solénel essay, de chose lors non veüe; comme est la perscrutation des pierres aux reins en vn homme viuant, & la curation tentatiue d'iceux par incision non accoustumee. Mais quāt à celles de la vescie, il est bien à presumer, que tels personnages n'en auoiēt que faire, ne doutants pas du lieu, ny de la guarison d'icelles; estant de long temps au parauant fort pratiquee l'operation Celsiste, ou Guidoniane par le perinœe aux viuāts, & la coustume de les trouuer dans les vescies des calculaires trespassez. Quāt au second, il faut coniecturer que ceste section exterieure ait esté faicte par autre lieu, que les lombes; obstant à cela plusieurs empeschements. Premièrement la spissitude du lieu, auquel se coupperoient ( avec grand danger

danger) plusieurs muscles interieurs, & exterieurs trop près de leur principe. Secondement la proximité, non seulement de l'espine, & de ses apophyses: Mais aussi de la grosse veine caue, & de l'artere Aorte, avec leurs notables ramifications, ensemble du mesentere, & panchreas proches de ce lieu. Ce doit donc auoir esté par le costé du ventre, au lieu dit en Grec *νεφρών*, en Latin *ilia*, en François le flan; entre lesdits lombes, & le lieu ou on ouure nos Cæsariènes; quelque peu plus haut, que celuy qu'on doit inciser pour tirer le calcul vessical par l'epigastre, comme nous auons proposé. Cela apparoit assez, par-ce qu'il est dit les boyaux auoir esté remis, & là playe recousüe: ce qui n'eust peu estre fait aux lombes, à l'endroit du rein dōlent.

Or sur le subiect d'incision renale,

posons le cas, que experience n'en ait onc esté faicte: encor' y a il dequoy probablement discourir par raison médicale, & analogique, qu'il se peut faire au besoing, sans en mourir nécessairement. Vray est que (outre quelques objections desia aucunement soluës sur l'hæmorrhagie du rein incisé, & sur la dangereuse retention de la sanie, qui en pourroit decouler) on peut encor' faire instance sur le danger, qui peut venir pour les deux parties offensées de ceste incisioñ, sçauoir est le flan taillé, & le rein entame, mais quant au flan, il apparroist par les raisons ja deduiçtes, que rien n'y est nécessairement mortel. Outre lesquelles, encor' peut on argumenter par analogie, que quelquefois en aussi mauuais, voyre pire lieu que n'est le flan, il se fait bien (voyre naturellement) ouuerture suffisante pour

en sortir la pierre, non seulement vesficale ( qui se fait par le perinœe ) ou l'vreterique ( qui se fait par l'hypogastre, iuxte layne ) mais aussi la renale ( qui se fait accidentairement par les lombes mesmes ) & le tout sans mort: qui demonstre, qu'autant s'en fera il bien au flan ( lieu plus à propos à la tirer ) avec plus grande sureté. Car c'est bien chose assuree, non seulement par-ce, que plusieurs en ont escrit, & entre autres monsieur d'Allechamp; mais aussi par la testificatiõ de plusieurs medecins, & chirurgiens dignes de foy, qu'on a veu à des calculeux nephritiques sortir par les lombes ( lieu fort incommode ) de grosses pierres venantes des reins, avec apostemes faictes en ce lieu tres-suspect, & ouuertes tantost artificiellement, tantost de par foy, à cet endroit mesme. Auquel cas il failloit

bien, qu'avec le rein d'eussent grandement auoir esté offesees plusieurs parties au dehors, & au dedans du corps, autant (voyre beaucoup plus) subiectes à dāger, que n'est ledit flan; voyre presque tout le reste de l'epigastre, qu'on ne doit pour ceste cause si fort craindre d'entamer, nō seulement en nos Cæsariēnes, mais aussi aux lapidaires de la vessie, comme nous proposons. En autre assez fāscheux lieu dudit epigastre, aduiant biē aussi mauuais accidēt sans mort. Cōme ce qui aduint en l'an mil cinq cēs cinquāte sept, au village de Han, pays d'Auge en Normandie: ou vn nommé Charles Trahardy nephritique de long temps, eut vne transmutation de ses douleurs vers le deuant, sur la region de l'vretère, dont il fut pensé comme de colique par frequēs clysteres, desquels par la force du mal

il en



il en vomit aucuns. En fin se presenta entre laine, & le flan vne grosse tumeur, que perça maistre Iacques le Duc chirurgien fort experimenté, dont il tira avec pus meſlé d'vrine vne pierre grosse comme vne febue. La ſituation vers le deuant moſtroit cela ne venir pas du rein, qui eſt ſur le derriere; il reſtoit donc (veu que l'vrine en a touſiours depuis diſtillé) que fuſt de l'vretere, près du lieu ou il ſe ioinct à la veſſie; n'eſtât vray ſemblable que fuſt de la veſſie meſme, tant pour-ce qu'elle eſt ſituee en autre endroit (ſçauoir eſt au bas du milieu du petit ventre) que pour-ce que elle ſe dechargeoit à la volonté du patient, par la verge, de ceſte portion d'vrine, que l'autre vretere luy apportoit, ne laiſſant pour cela ladicte ouuerture de touſiours piſſer vrine, pour laquelle receuoir ledit chirur-

gien luy accommoda vne esponge, comme est lart, hors laquelle subjection, il vescu quatre ans depuis en bonne santé, en fin desquels il mourut d'une esquinancie. M<sup>o</sup>sieur Belanger medecin du Roy, en a veu autant en l'hostesse de la hotte, près S. Paul à Paris, qui iecta pareille pierre, d'une pareille aposteme, venue en pareil lieu, avec pareille subjection d'urine par vingt ans après, & plus. Et quant au rognon (seconde partie estimée fort suspecte à inciser) il semble (sauf meilleur iugement) que la playe n'en est pas nécessairement mortelle; soit à cause de son actiō, & utilité (pourueu toutefois qu'il ait son compagnon sain, libre, & entier, qui le secōde) soit à cause de luy mesme, attendu qu'aussi bien est il alors desia maleficié, voire souuēt plus qu'à demy pourry, & consequemment pres-  
que

que, ou totalement inutile, tellemēt qu'un bon & ſçauant anatomifte, habile & ſeur de la main, expert en ſemblables operations, peut eſperer de facilement en venir à ſon honneur, en vn corps robuſte, ſe contentant d'incifer diſcretement le lieu, où il aperçoit la pierre, eſpargnant au poſſible l'implantation de la veine emulgente, & l'explantation de l'vretère, laiſſant au reſte à nature de parfaire la reconſolidation, comme il n'eſt hors de raiſon, que faire ne le puiſſe. Feu madame de Ferrare ſubjecte (par interualles) à la nephritique, avec emiſſion de ſang au travail, & vrines purulētes après auoir chāgé ſes pourmenades en exercice plus repoſé, & dreſſé ſon regime cōtre le mal, vſant quelquefois de petits aydes contre le grauiér, ceſſa en fin d'auoir telles excretions; au rein de laquelle (treſpaſ-

see d'autre maladie) fut trouué vn petit calcul, & enuiron iceluy, vn demy doigt de cicatrice belle, saine, & nette; faisant foy avec la cessation, tant desdits excrements d'vrines, que de leurs nephritiques acoustumees, que ce calcul auoit esté beaucoup plus grand, y faisant vlcere, duquel auparauant sortoit sang, & bouë, lequel estoit cōsolidé en cicatrice, cōme aussi il aduient au foye, aux poulmōs, & autres parties principales. Mais pourquoy au corps du rein vne simple incision ne se fera elle surement par bō artifice pour en tirer le calcul, veu qu'estât iceluy fort interessé, purulent, & presque tout pourry, il se decharge encor' bien de telles pierres, par plus grandes, & sordides solutions de cōtinuité, que ne sçauroit estre ceste simple incision, voyre avec si grande consommation de sa propre  
sub-

substāce interieure, que souuent il ne luy reste que la seule tunique, contenant vn grād, ou plusieurs mediocres calculs y craquetants comme monnoye en vne bourse. Puis (dis-ie) que de ce rein estant si mal affecté, quelquefois le calcul vient trouuer son issuë par les lombes (côme est predict) ainsi que fait en aucuns l'vretérique par l'vn des costés de l'hypogastre, & le vessical de mesme par le perinœe; pourquoy n'insistera lon par les plus commodes de ces voyes là, à chercher remedes à maladies si desespérées? Aux vns, & autres de ces diuers lieux se fait l'expulsiō de tels calculs; mais plus souuent du vessical par le perinœe, à cause du lieu plus decliue, ou tout corps pesant tombe de son naturel plus tost: Et est (à mon aduis) ce qui a plus que nul autre occasion induit les premiers operateurs, & à leur

exéple leurs successeurs, d'ouurir en l'extraction du calcul vefſical plus toſt le perinœe que l'epigaſtre, ſe fantaſiās que c'eſtoit ſuyure les mouuements de nature, comme doit faire l'art : combien qu'à vray dire cet enuoy la ſoit plus toſt fait ſymptomatiquement, & par voyes à ce mal non conuenables, que par legitime excretion de la veſſie, qui n'euacue rien naturellement par le perinœe.

Or ne doit eſtre eſtimee choſe incroyable à celuy qui ne l'a veu, ou leu, que par les lombes apoſtemez le calcul renal puiſſe ſortir, cōme l'vretérique par le bas du flan, ainſi qu'il eſt predict : veu que le rognon encor qu'il ne ſoit pas pierreux, mais ſeulement vlceré, & qu'il ait voye à ſe purger naturellement par ſon vretère, ne laiſſe pas neātmoins de ſe deſcharger de ſa purulence par leſdits lom-

bes au dehors. Ce qui aduient souuēt après lōgues douleurs renales, & vrines bourbeuses, faifans aux dits lieux fistules souuent incurables, mais toutefois tolerables, voyre souhaittables pour euitier pis. Ce que i'ay diligemment obserué en deux malades entre les aures. A Chastillon sur Loin, après vne lōgue nephritique suruint à vne femme replete vn gros abscez à l'endroit exterieur des reins, qui en ma presence fut ouuert par cautere actuel, par maistre Girard chirurgien du Roy Henry, dont il ne sortit que purulence, & point de calcul : elle a entretenu par canule creuse d'argēt, & par vne chādelette lōgue de cinq à six doigts, ceste ouuerture par xxvi. ans, & plus, deschargeant aussi ses vrines de bouë, & ses reins de douleur : lesquels deux accidents retournoient si tost, que cet emissaire se

vouloit fermer . Pareil mal, estant venu en tumeur apostemeuse, & par mon ordonnance ouuert, & de pareille mode long temps entretenu, deliura à Guignonuille en Beauffe, vn ieune homme de x x. à x x i. an, nommé Paillet, de telles douleurs renales, & vrines auparauant fort boueuses ; se portant fort bien depuis, tāt qu'estant prest à marier, il mourut subit de la cheutte d'vne charrette à gerbes en moissons. Donc pour conclurre ce propos , reste à resouldre pour les raisons predites, qu'à ce Frac archer on recercha par le flan aussi ouuert, & non par les lombes, la pierre dās le rein mesme, qu'il pleignoit, & non en la vessie : qui ne laisse toutefois de faire pour nous, soit pour l'extraction du calcul vessical par le bas du flan à la Franconniane, soit pour la probation de nostre section



Cæsariène. Mais quant à l'imitation de cet exemple, ie ne pretends pour tout cet allegué de conseiller à la volée telle section de rein, auant que d'en auoir fait d'autres pareilles pratiques. Car comme vne arondelle seule n'assure pas du printemps, ny vn beau iour de l'Esté, aussi vne experience n'est pas suffisante de resoudre telles difficultés: Et puis vn lapidaire inciseur iamais n'operera, qu'il n'ait avec sa sonde tasté, & fait parler la pierre, en quelque lieu qu'elle puisse estre, combiẽ que plusieurs autres signes (voyre vniuoques) y attestent, ce qu'il ne peut faire au rein, comme en la vessie. Et posé le cas, qu'on en fust assuré, toute fois l'extraction de ce calcul renal, est pour la plus part, ou superflue, ou suspecte, ou peu souvent necessaire. I'entends superflue, si son compagnon est sain, faisant as-

sez pour eux deux de deuoir à le secourir, cōme souuent apparoist estre aduenu, quād l'vn ayant de long tēps esté pourry (tesmoing le pus qui en descendoit abondamment avec l'vrine) l'autre n'a pas laissé pourtant d'attirer, couler, & vuidier suffisamment l'vrine. I'entends aussi suspecte, comme fils sont tous deux pareillement maleficiés, car adonc incisant l'vn, on profiteroit peu, qui n'inciserait l'autre : qui seroit chose impossible sans mourir. Peu necessaire ; car pour vn seul rein maleficié d'vlcere, ou autrement, on ne laisse pas de viure, si l'autre est sain & libre. Vray est, que si les deux ensemble sont totalement estouppés de calculs si gros, qu'ils ne puissent deualer aux vretes, ou d'iceux entrer en la vessie (cōme il apparoist alors par la vacuité de ladiete vessie) adóc ce remede se peut

avec

avec raison non impertinente proposer par faute d'autre, par l'incision del'vn des deux ; cōme nous faisons nostre Cæsarienne section, en defaut d'autre secours aux enfentemens. Ce qui ne seroit mal-aise d'obtenir des pauvres malades, adonc si bourrelez par la pierre, qu'ils demandent eux mesmes qu'on les ouure au hazard d'en mourir.

En fin duquel propos ( plus long que ie ne l'auois projecté ) encores m'eschappa il d'accuser de negligence ceux, qui executerent à Paris si hureusement vne entreprise si hazardeuse, & de telle consequence, pour ne l'auoir pas mise eux mesmes par escrit, voyre fait engrauer en table d'arain, la consacrant à la memoire, & la dressant publiquement en leurs escholes, comme chose admirable, voyre quelquefois imitable. Tel mo-

nument vaudroit bien les tableaux, qu'on dit estre en Alemagne, testificatifs de quelques grāds miracles de Paracelse, qui neantmoins a emporté avec soy la plus belle & meilleure part de toutes ses receptes, & secrets, n'ayant de tous ces beaux feux laissé gueres autre chose à ses sectateurs, que les cendres toutes froides.

*Responſe aux cōmunes obiections contre l'incisiō de la vessie, en sa partie membraneuse par l'epigastre.*

**I**E n'ignore pas qu'il ne semble de prime face fort estrange, d'accorder que la vessie se puisse inciser sans mort, en sa partie membraneuse; cōme il semble qu'il faudroit, si cela estoit vray, que nous proposons, & prouuōs par autorité auoir esté fait par le petit ventre : car telle est la cōmune opinion, pour sauuer par ceste  
inter-

interpretation la sentence d'Hippocrates, qui tiét en l'Aphorif. x v i i i. du v i i. liure, fans l'auoir nullement distingué ( comme font tous les interpretes, le cuidants officieusement fauorifer ) sa blessure y estre irreconciliable, & mortelle; ce qu'il doit au vray luy mesme auoir entendu, n'ignorant pas qu'on l'incisoit de son temps en la cure des calculaires, laquelle il admet en son iuremēt, n'en entreprenant l'executiō toutefois: on fait dōc (le supplé) en la partie membraneuse, nonobstant qu'elle ne soit pas vraye, & pure membrane, estant dans le corps, ny approchante d'estre vrayement telle, comme elle apparoist, quand elle a esté de long temps sechee, estendue, & enflée, ains est plustost reduisible à l'vne des chairs, que Galen diuise en diuerfes especes. Car ainsi qu'il dit au sixiesme com-

mentaire du sixiesme des Epidemies, Hippocrates appelle chair, non seulement celle des muscles, mais aussi des intestins, & de la vessie. Suyuant quoy luy mesme dit au V I I. des administrations anatomiques. La chair n'a pas par tout mesme figure: car celle des muscles est plus rouge, & molle, que celle du ventricule, de la vessie, de la matrice, & de tous les intestins.

Je pose encor' qu'elle soit fort membraneuse, voire membrane mesme, & vrayement spermatique: aussi est bien le peritoine, & les periostes, la cornee de l'œil, & les meninges du cerueau qui se reconsolident, voire mesme le cerueau: ce qu'on n'auoit pas encor' obserué du temps d'Hippocrates, comme on a fait depuis.

Or de la facile consolidation d'icelle en sa partie membraneuse, font  
foy

foy beaucoup d'expériēces en la per-  
curation des playes receües au ven-  
tre, par lesquelles l'vrine pure failloit.  
Et pourquoy cela ne luy aduiēdra il,  
comme il fait aux intestins tant gres-  
les que gros, voire mesme au ventri-  
cule, comme testifie souuēt, non seu-  
lement le chyle, mais aussi la recente  
viande solide soudain sortant par la  
playe, sans qu'on en meure? Ce neāt-  
moins Hippocrates a deploré toutes  
ces grādes playes là, aussi biē que celle  
de la vessie: & faut par necessité que le  
ἐπὶ τῷ πλεῖστον de Galen y besongne.

*Autre exemple confirmatif.*

**D**E tout cela fait encor' particu-  
liere foy, avec l'exemple de Frā-  
co, ce qui aduint à Cueur de chesne,  
hoste de là fleur de liz à Orleans, bles-  
sé d'une d'ague iouxte le nombril, le  
x. iour de Feurier M. D. L X. auquel  
après n'auoir par XIX. iours pissé

que par la playe ( signe manifeste de la partie superieure & membraneuse offensee ) maistre Florent Philippes mit , & entretint quelque peu de iours vne algalie en la vessie par la verge, & soudain la parfaite guarison s'en ensuiuit, dequoy messieurs Race, & Paré mesmes peuuēt testifier : qui sont œuures si frequents qu'on n'en doit douter.

#### QUATRIEME SECTION.

*Production tenāt lieu d'autorité d'autres pires dangers de ceste mesme partie offensee, que n'est la section Casarienne.*



LISSANS ceste partie vesficale (pour ne sortir point de la matricale) nous confererons avec ceste incisiō icy quelques autres plus hazardeuses operations en elle mesme, lesquelles  
neant-



neantmoins ne sont pas de soy mortelles : ce que nous disposerons par ordre en cinq particules.

La premiere fera de femmes grosses, ne le pensans pas estre, esquelles l'enfant mort & pourri, fit pourrir la matrice au dedās, & par faute d'estre ouuertes moururent par vn traict de tēps, qui eussent vescu, si le mal estant cogneu on les eust incisees d'heure.

La seconde de femmes, les vnes en gesine, les autres non; toutes apostemees en la matrice, & ouuertes nō à la Cæsarienne, mais avec cauteres actuels par le ventre, sans mort, ny perte de la conception, qui est operation pire que la Cæsarienne.

La tierce de maladies aussi de matrices pourries au dedās, vers le fond d'icelles, voyre si amplement, que les enfans morts estās sortis de la cavitē vers les intestins, furent de là tirez par

l'epigastre, ou on pësoit n'y auoir que quelque grande aposteme, sans que la mere en mourust, ou laissast de porter enfant après, la matrice estant de foy guärie.

La quatriesme de femmes, auxquelles la matrice toute precipitee & pourrie a esté totalement extirpee sans mourir, & ce par section & vñtion, ou par ligature.

La cinquieme de femmes, auf-  
quelles eſtât icelle for-iffue, & pour-  
rie, eſt en fin tombee d'elle meſme  
ſans mort, ny maladie ſuiuante.

PREMIERE PARTIE  
cule contenant trois histoires.

*Première histoire.*

LOÿSE Pouppard, femme de maître Nicolas Seuin, dit Champgasté d'Orleans, p̄sant que ses mois ne fussent retardez, que pour vne fièvre quarte ( comme il aduient ordinaire-

nairement que lors ils cessent) elle auoit neantmoins conceu, mais ne se doutant pas d'estre grosse, ne laissa d'vser de telles medecines, saignees, & autres applicatiōs qu'on a accoustumé d'vser, tant pour ladiēte quarte, que pour les duretez du foye, & rate, suruenantes à ce mal; lesquelles on prenoit lors pour l'enfant estant au ventre, sans qu'on le recogneust pour-ce qu'il estoit, mais plustost pour quelque scirrhe, ou autre amas fait de la pretendue retention symptomatique du mēstrual. En fin l'enfant mort, & les parties d'iceluy plus molles estants pourries, sans y auoir apparence d'enfantement, les os se desnuerent là dedans avec le temps, & percerent la matrice sur le derriere vers le gros intestin, de mode qu'elle commença peu à peu à les vuider par le siege allant à ses affaires, & entre les

autres vn os entier de la iambe. Ayāt ainsi long temps languie, elle mourut, & fut ouuerte le vi. Feurier mil cinq cens soixante cinq, par maistres Florent Philippes, & Michel Pichard, lesquels ne trouuerent leans qu'ossements pourris, & principalemēt ceux de la teste, avec admiration d'auoir peu tant subsister en ce borbier matricial. Ceste femme semble, quant à cela, y auoir esté curable par la gastrotomie, si le mal eust esté cogneu d'heure, & ledit remede receu en vſage, & administré discrettement.

*Seconde histoire.*

CATHERINE des Fiefs, dame de Oncy près Milly, deuint en secondes nopces malade, & grosse en mēſme temps, ne pensant pas estre enceinte, & fut à Paris pensée malade, cōme l'autre auoit esté à Orleans, par vne infinité d'aydes, voire iusques à la

à la diete sudatoire; nonobstant que quelque sage-femme de la Royne la iugeast grosse, par tous les accidens de grossesse, remarquez par elle, selõ leur ordre depuis l'arrest des mois, iusques au laiçt des mammelles, & de là au ix. mois, auquel temps tous cesserent, avec le mouuement libre de l'enfant, suruenants adonc douleurs d'enfantemēt sans effect, & incontinent après suiuant tous signes d'enfant mort, à quoy encor' ne prenoit on garde. Ainsi retournée de Paris en sa maison, porta tousiours depuis l'enfant esteinct, qui fut pour tout de compte fait, iusques au iour de son decez, quinze mois, outre les neuf precedents qu'il estoit vif. Les parties molles s'en allants en pourriture par en bas, furent (non sans quelque raison) estimees par monsieur Ponet, docte medecin de Melun

pour bouë sortant d'vlcere matrical,  
& les os y restans pour scirrhe de ratte. En fin estant morte, & ouuerte le  
III. d'Octobre M. D. LXX. par Luc  
Champenois, & Jacques Dazier bar-  
biers à Milly, és presences des sieurs  
de Vertau, & la Gainiere, avec plu-  
sieurs autres, fut trouuee en icelle en-  
cor' force bouë, point de matrice, &  
tous les os d'un enfant, quelques vns  
pourris, les autres entiers; & entre  
iceux l'un des deux clauicules ayant  
desia percé le peritoine, & les muscles  
de labdomen, n'y restant plus que le  
cuir, qu'il ne parust dehors par le co-  
sté senextre desia tout liuide, lequel  
auoit desia long temps au parauant  
esté prins pour vn scirrhe de ratte. Je  
demande si le mal eust esté (sans opi-  
niastrer sur le premier aduis legere-  
ment donné) bien recherché par la con-  
currence, & suite des signes en la  
grosse

grosseſſe de l'enfant mort, & autres coincidéces bien remarquées par ordre, & reconnu pour tel qu'il eſtoit, ſ'il n'y auoit pas eſperāce (lors qu'elle ne pouuoit accoucher) de ſauuer elle, & ſon fruit par ceſte ſection, ou bien encor' après l'enfant mort (qui fut vn long trait de temps) de ſauuer pour le moins la mere, par le moien de ceſte meſme ſection, lors ſeul & neceſſaire remede?

*Troisiefme hiftoire.*

**P**AREIL & auſſi triſte effect eſt bien enſuyuy de pareille cauſe en la femme d'vn chirurgien meſme, voyre de Montpellier, nommé Aufme, gratifié (cōme il eſt bien à croire) des plus fameux medecins de ce venerable college: laquelle (comme recite monſieur Rondelet, au L X V. chap. de ſa methode curatiue) ayant vn enfant pourri en la matrice, en

ietta partie par morçeaux, les grands os restants à vuider : de façon que long temps après elle en mourut. Encor' que la cause de telle mort d'eust à bon droit estre tenuë indubitable, par l'eiection precedente & manifeste de quelque partie de l'enfant, & par la retention du reste, qui n'auoit pas fuiuy, mais estoit demouré illec embourbé; toutefois c'estoit bië fait au mary, d'en vouloir estre encor' plus assuré, par l'ouuerture qui en fut faicte; mais il eust esté plus vtile (cela estant au parauant assez cogneu) d'extraire leſdits os par la bouche de la matrice, ſil eust esté possible, ou bien à faute de cela, par ceste ſection Cæſarienne, ſi la force y estant ceste nouuelle curation eust alors esté receuë, comme elle doit estre en telles neceſſités, ceſſants tous empeschemës, & de faillās tous autres moyës.



*Seconde particule.*

**E**T DE peur qu'on doute si telles matrices si fort interessees eussent peu estre incisees avec hureux succez pour la mere, pour en tirer l'enfant mort, (qui estoit la cause conioincte de tels vlceres) ie reciteray en ceste secóde particule quelques vrayes histoires de pareil danger venuës à bon port par l'incision du ventre, retirees de deux notables medecins, combien que telles femmes ne fussent pas grosses, mais grandemét apostemees en la matrice, qui valoit beaucoup pis; la suffisance desquels encor' viuant vult tesmoignage, & autorité: l'un est mōsieur Aliboux de Sens, (la bonne & ample renommee, duquel m'oste des mains l'occasió d'en dire plus:) l'autre est mōsieur de Villeneufue, le pere, demourant à Vaulreas en Prouence, mon premier con-

ducteur à la pratique, après mes études & degré: Les epistres desquels extraictes par eux des registres de leurs curationes plus signalees, (comme doiuent faire tous vrais medecins) & à moy par eux enuoyees, ie infereray icy, les ayant par abregé translatees de leur plus copieux & beau latin, en François.

*Aliboux à Rouffet Salut.*

**I**C y prés mon logis est aduenu vn cas aussi estrange, que vostre section Cæsarienne. Vne femme grosse, & pour estre ja aagee, ou autrement n'ayât peu accoucher sinon par morceaux, auoit l'vn, & l'autre costé du petit vêtre fort enflé, à cause des violences des ferremēs, avec tous signes d'aposteme, lesquels se communiquoient aussi aux voyes de la nature. De ce lieu du vêtre amplement ouuert par cautere, sortit grande quantité de bouë,

bouë, & encor' autāt de pareille substance, & couleur par les parties basses. Elle ne voulut souffrir que ie la fisse sonder avec le specule, pour iuger à l'œil le fonds de la sinuosité, mais sans cela il apparoissoit assez, que l'aposteme, & l'ouuerture d'icelle penetrait iusques dedans la matrice, par les communs accidēs estimez selon l'ordre des temps, & par les excremens semblables; estant la guarrison de l'une, & l'autre partie par mesme moyen venuë à pareille fin, & en mesme temps. Puis qu'ainsi est (comme i'ay veu) ce n'est merueille de ce que vous traictez en vostre gastrotomie; estant plus mal-aisé que vn tel vlcere guarisse qu'une simple playe en pareil lieu. A Dieu.

*Seconde histoire de pareil subiect  
dudit Aliboux.*

**A**YANT à vne Collette Symon

boulangere de ceste ville de Sens, esté avec fer violement tiré vn enfant mort sans la suite des vuidanges, & sans la secundine, il luy suruint en cinq iours au bas du ventre d'un costé, & d'autre vne fort grosse tumeur, avec manifestes signes d'aposteme: & fut par cautere actuel ouuerte profondément d'un desdits costez: d'où le chirurgien tira avec la main quantité de sang caillé, pourri, & puant, sans que l'autre costé s'abaissast, ne que ledit chirurgien peust rien amener de la secundine: qui luy fut cause de faire nouvelle ouuerture de l'autre part, d'où il tira ladicte secundine. Ce ne fut sans extremes douleurs en tel hazard, & desespoir: car elle en resta comme à demy morte, & garda trois ans le liét, & deux ans après elle alla à potées, puis à vn baston, après quoy redeuint peu à peu en telle santé,

té, qu'elle eut depuis plusieurs enfans, & entre les autres vn nommé Sebastien, viuant, & demeurant en ceste ville. A Dieu.

*Deux autres histoires de pareil subiect.*

NICOLAS de Villeneuve à Rouffet salut. Je suis infiniment, &c. Mais pour venir au poinct, ie confesse en ce lóg temps que. i'ay vescu n'auoir onc veu ceste pratique, que m'escriuez de femme accouchee par le costé qui soit restee viue. Bien ay-ie souuenance que tout le bas du ventre estât tres-fort tumefié à madame de Piles nonies, ie luy feis par maistre Maurace chirurgien de ceste ville de Vaulreas faire ouuerture en l'abdomen, par cautere actuel profondant iusques à la cavité de la matrice, d'où fortit tant par le bas que par le lieu ainsi ouuert, plus de sept liures de bouë, pareille l'vne à l'autre, & pour

estre à l'œil plus certiffiez du lieu, nous dilataſmes le bas avec le ſpeculum, ou nous veîſmes la grandeur de l'vlcere matricial, que nous guarîſmes dâs le v. i. mois : depuis lequel temps elle eût vne fille encor' à preſent vi- uante. Ce fut l'an M. D. X. X. X. I. I.

*Autre hiſtoire de luy.*

**I**E vous aſſure auſſi à la verité d'une autre pareille maladie, & curation en la femme de Briſſet apoticaire de Montelmar; que ie feis outre l'opinion de deux medecins, qui la trait- toient, avec le conſentement de ſon mary, par ſemblable cauteriſation de l'hypogaſtre, profondant iuſques à l'interieur de la matrice, de laquelle là bouë iallit outre les pieds du liêt: & en meſme inſtant ſortit quantité merueilleuſe de pareille ordure par en bas. Elle fut guarie en trois mois, & ſoudain après conceut, car depuis  
lors

lors elle a enfanté trois fils, & vne fille : ce fut l'an M. D. L V I I I. Je rends graces à Dieu, que surpassant ores L X X X V ans de ma peregrination, i'ay ( de sa benignité ) telle santé, que pour l'exercice que m'auiez iadis icy veu faire, ie suis iournellement tant à cheual dehors, qu'à pied en la ville, en aussi bonne disposition, selon vostre bon souhait enuers moy, que de ma part ie desire mutuellemēt vous estre de luy donnee en aussi bon & plus vieil aage. A Dieu.

*Troisiesme particule.*

**M**AIS pour-ce qu'en toutes les histoires precedētes, il n'est encor point fait precisēmēt mentiō de femmes qui ayent eu les deux ensemble, sçauoir est grossesse, & sectiō (car d'icelles les enceintes n'ont pas esté incisees, leurs enfants s'estans fait voye tous morts qu'ils estoient par autre

lieu, que par le ventre incisé) Celles aussi qui ont esté incisees n'estoient pas grosses, cōbiē qu'elles fussent pis, sçauoir est apostemees en la matrice. Il fera plus à propos d'en produire d'autres, qui ayent eu les deux ensemble, sçauoir est grossesse, & incision ventrale, encor' qu'elle n'ait pas esté (comme nous demandons) à la Cæsarienne, pour enfant tirer, mais administree en intention de vuidier aposteme, y ayant neantmoins autre chose avec aposteme, sçauoir est vn enfant entier, ou la carguasse des ossemens d'un enfant de long temps mort, auquel cas (aussi bien comme les autres) il y a plus eu de danger (à cause de l'ulcere matrical, & autres raisons) qu'il n'y a en l'ouuerture de nos Cæsariennes: & toutefois nulle n'en est morte, mais (qui plus est) la plus part d'icelles ont cōceu depuis,  
& por-



& porté enfant à terme. Or pour-ce que de plusieurs histoires suyuanes, les trois sont imprimees en vn opusculé de Mathias Cornax, medecin Imperial à Viéne d'Austriche; & vne autre au second liure de la chirurgie d'Albucasis, ie laisseray vne infinité de circonstances de lieu, an, iour, personnages, tesmoins qu'ils alleguent, à cause de briefueté; le sommaire est tel.

*Histoire premiere.*

L'H O S T E S S E du Cancre rouge de Vienne en Austriche, n'ayant peu enfanter; porta quatre ans son fruiet mort, estât passé (côme en fin il apparut) de la cauité de la matrice pourrie par au trauers du corps vlcéré d'icelle, vers les intestins: & là representant au ventre vne grãde tumeur, fut ouuerte au milieu de l'epigastre, comme pour vider vn abscez, d'où

fut tiré vn enfant non encor si pourri (choſe admirable) qu'il ne fuſt reconnu pour maſle. Eſtât icelle guarie conceut, & porta à terme vn autre enfant: mais par faute de l'ouurir (ſuyuant le bon conſeil dudit Cornax) elle mourut ſans enfanter: & fut après ſa mort tiré vn bel enfant fort viable, ſi on l'eut ſecouru avec ſa mere par ſection Cæſarienne.

*Histoire ſeconde.*

**E**N CE meſme Opuſcule y a vne epiſtre audit Cornax, d'vn Achilles Gaſſarus (docte medecin d'Augſpurg) contenant pareille hiſtoire en meſmes circonſtances, d'vne femme, à laquelle prés d'vn an après auoir failli d'accoucher en ſon temps, l'enfant qui (ainſi que l'autre) eſtoit paſſé de la cavité de la matrice vlcerée vers les inteſtins (comme il apparoïſſoit euidentement, par-ce qu'il auoit

fait

fait apparéce d'aposteme en l'abdomen, & principalemēt au costé gauche) fut tiré par le chirurgien os après os; laquelle guarie eut encor' enfant naturellement depuis.

*Histoire troiefme.*

ENCORE y a audit liure de Cornax, vne epistre à luy enuoyée par vn Gilles de Hertoge (celebre medecin à Bruxelles) d'une femme; laquelle aussi n'ayāt peu accoucher, les chairs & parties molles de l'enfant estant vuidees en forme de pourriture par en bas, les os se sentoient craqueter, (qu'on remarquoit à la main) sous l'epigastre, sans pour-ce gueres empescher les actions de la femme, pour y estre desia la treziefme annee, qui ne pouuoit estre sans auoir percé la matrice; laquelle neantmoins estoit guarie, comme il falloit bien, par-ce qu'il n'en distilloit point de bouë par

en bas, comme autrement il eust fait,  
& aussi qu'elle auoit ses besongnes  
reglees.

*Probation sur l'incrédulité de  
l'histoire sus alleguee.*

**P**OVR prouuer ce merueilleux cas  
pouuoir aduenir ( encor' que les  
sens en feissent foy à la verité fust-ce  
à vn de la confrairie, ou parenté de  
sainct Thomas ) Ce n'est sans occa-  
sion qu'on peut alleguer la fort lon-  
gue demeure d'orde pululence, non  
seulement dans les reins, vessie, me-  
sentere, longanon, sans en mourir,  
mais aussi en la ratte & au foye, les-  
quelles parties on a en quelques vns  
trouuees fort suppurees de long tēps,  
& aux autres, tant hommes que be-  
stes cicatrisees, & guaries. On dit que  
la ratte a esté à quelques vns trouuee  
si consommee au dedans, qu'il n'y re-  
stoit que la peau : comme i'ay souuēt  
remar-

remarqué aux reins vlcerez par calculs qui y restoiét seuls & vagues, cōme monnoye en vne bourse. Monsieur Viard docte chirurgien en nōme deux, auxquels deuant plusieurs ayant esté playes receuës au costé fenestre, il trouua les rattes offensees, & en partie alterees, en partie retraittes: il se dit les auoir extirpees par incision, comme ie tiēs de mōsieur Petit docte medecin à Gian, auoir esté heureusement fait par vn chirurgien dudit lieu, en vn hōme blessé qu'il pensoit, & toutefois les innumerables arteres de sa textine, monstrent assez de quelle importance est son action à l'indiuidu. De l'vsage de laquelle nous disputerons autre part, ayāt pris de ce occasion sur la docte dispute que fait Vlmus sur icelle, contre les anciens & modernes auteurs, ledit nombre presque infini de veines &

arteres, n'empesche qu'on ne coupe sans necessaire danger de mort, bõne partie de l'omentum sortant par les playes, comme on pratique tous les iours heureusement, les poulmõs proches voisins & euentaux du cueur, sont bien souuent farcis de telle or-  
dure par plusieurs annees, principale-  
ment, si d'une des feuilles est saine, &  
que le crachemẽt viẽne assez aisemẽt:  
mais qui plus est cela s'est veu (com-  
me encor peut yeoir) au cueur mes-  
me, par ledit Cornax en vn libraire  
de Vienne, long temps auparauant  
subject pour tout cela seulement à  
quelque legere syncope; auquel fi-  
nalement decedẽ il trouua en presen-  
ce de plusieurs vne grãde aposteme,  
comprenant presque la moytiẽ du  
cueur, qui ne pouuoit (estant si gran-  
de) estre venuẽ en vn moment. Com-  
me aussi Nicolas Massa (l'un des plus  
fameux

fameux medecins de son temps) testifie en son anatomie, disant auoir trouué en vn Venitië (tué d'un coup receu en la teste) vne aposteme de la grosseur d'un demy œuf, en l'oreille & substance du cueur; qui ne pouuoit estre en ceste partie fibreuse, & solide venuë que de long tēps, ce qui peut aduenir, pourueu que la playe, ou vlcere ne penetre dans les ventres d'iceluy. Tel se trouue de nouveau auoir vescu plus de dixhuit iours ayāt le cueur blessé près de deux doigts profond en sa chair seulemēt. Chose aduenüë aussi au cerueau (i'entends en la substance, & non aux ventres) comme nous prouuerōs ailleurs estre possible par histoire verifiable par tesmoings non suspects, euitants icy prolixité ennuyeuse en vn abregé.

*Histoire quatriesme de mesme subiect.*

SI CES nouueaux auteurs ne cō-

tentēt quelque delicat, ou desgouſté  
lecteur, ne faiſant cas que d'antiquité,  
& autremēt mal-aiſé à perſuader, ſi eſt  
ce que ce doctē, & iadis tant celebré  
medecin & chirurgiē Arabe Albuca-  
ſis leur doit eſtre irreprochable. Au  
liure ſecond de ſa chirurgie, il eſcrit  
ainſi; J'ay veu vne femme, au ventre  
de laquelle eſtant mort vn enfant, re-  
deuint groſſe d'un autre, qui auſſi y  
mourut. Long temps après ſ'enleua  
vne enflure au nombril, qui fut ou-  
uerte, & rendit matiere; i'y fus appe-  
lé, & la penſay long temps ne ſe pou-  
uant conſolider: parquoy i'y appli-  
quay de forts attractifs, & ſortirent  
plusieurs os l'un après l'autre; qui  
m'eſtonna, ſachant qu'il n'y a point  
d'os au ventre. Parquoy faiſant recer-  
che de tout, ie cogneus que c'eſtoient  
oſſements d'enfant mort, de ſorte,  
qu'après en auoir tiré plusieus, ie la  
rendy



rendy guarie , touteſois il reſudoit  
touſiours quelque choſe de l'vlcere.  
Que ſi quelqu'un reſte encor' ſi mal-  
aiſé à ſatisfaire pour deteſter (comme  
choſe barbare) tout ce qui vient de  
l'Arabifme, ie les renuoye à vne autre  
pareille hiſtoire d'Alexãder Benedi-  
ctus, en ſon œuure de pratique, au  
traicté de la difficulté des enfante-  
ments.

*Hiſtoire cinquieſme.*

**M**AIS afin que toutes ces eſtran-  
geres allegations ne ſoiēt ſuſpe-  
ctes, cōme ſont les contes d'un loing-  
tain voyageur, qu'il faut croire mal-  
gré ſoy, ou ſe trauailler d'aller ſur les  
lieux, ie m'arreſteray à quelques pa-  
reilles hiſtoires de noſtre pays meſ-  
me, auſſi hureux en loüables exem-  
ples, qui les ſçaura bien obſeruer, que  
nul autre.

Au fauxbourg de Sully ſur Loyre,

Marguerite Preuost, femme de Pierre Dorét musnier, estant manifestement grosse, & venu le terme n'ayāt peu accoucher, quelque ayde qu'elle eust des matrones, deuint peu à peu extrememēt malade, & en fin si tendue, pour l'enfant, & les enueloppes se putrefiāts, qu'outre la generale enflure de tout le ventre, il luy suruint le huiēt ou neufiesme mois, vne particuliere tumeur fort esleuee enuiron le nombril, representant aposteme molle, rōge, preste à percer, ce que fit maistre Itier Gallemet chirurgien dudit lieu, l'an M.D.L. le iour de Noël, avec vñ cautere actuel, qui tira escuellee après autrē vñ incroyable quantité de bouë: le lendemain au secōd appareil, voulāt sçauoir que pouuoÿēt estre quelques poils se representans à l'ouuerture, trouua que c'estoit la teste d'vñ enfant ja pourrissante, qu'il tira

tira par l'orifice amplifié de ladicte ouuerture, avec le reste du corps reconnu pour vne fille; elle en guarit en assez peu de téps: & après la mort dudit Doret, se remaria, & vescu depuis lors bié saine enuiron xxvii. ans; trespassee dernièrement d'un flux de ventre, l'an M. D. LXXVII: elle n'auoit eu auparauāt aucuns enfans, & n'a eu encorés depuis. De tout ceci y a suffisans tesmoings audit lieu, & nommément Graciene Thibaut, femme dudit Gallemet chirurgien: Que si quelqu'un desdaigne l'allegation d'un chirurgien à luy incogneu, quoy qu'il fust illec bien renommé, encor' faut-il qu'il aquiesse à ce que en a succinctement (comme est sa mode) escrit le docte Hollier precepteur mien, sur la fin du premier tome de son liure, intitulé des maladies interieures: Il dit vne femme auoir

eu enfant à Paris, lequel par quinze iours auāt que naistre eut le bras hors d'elle par le nombril, qui neātmoins resta viue comme l'enfant aussi. Il ne specialise pas comment elle enfanta, ne par ou, ne si elle eut encor' enfant depuis: qui eust bien meritē d'estre recherché & mis en histoire, veu que c'estoit à sa porte, consideree la grande importance de cela, tant pour la theorique que pour la pratique: tant y a que cela ne pouuoit estre sans biē grand vlcere matrical, encor' que l'enfant se fust depuis retiré par en bas. C'est d'autre part chose fort esmerueillable, qu'vn enfant ait peu tant estre vif en cest estat, ayant fait vn tel mesnage en la matrice, & en ses enueloppes, laquelle il auoit par le haut trauersee avec le bras, car autrement ne pouuoit il estre. Je reciteray encor' icy la testification irrefragable d'vne

d'une pareille histoire asseuree par le recit de ceste illustre, & vertueuse Princesse, de la maison & nom de Bourbon, douairiere de Guise, restât en ce vieil aage, en integrité de corps, & d'esprit, comme vn admirable spectacle d'ancienne perfection, pour servir d'exemple en toutes vertus heroïques aux Princeses de nostre tēps. I'ay obtenu par le moyen de mōsieur Bunot sien doctissime medecin, ce qu'elle mesme luy en a de nouveau ratifié, ainsi qu'il m'a escrit suyuant de mot à mot ce qu'elle luy a bien voulu specifier.

*Histoire.*

**E**STANT son excellence quelque temps avant son mariage desia aagee de vingt ans, & encor' nourrie sous la mere, à la Fere en Picardie, veid estant à l'Eglise qu'on presenta à sadicte mere vne ieune malade deco-

loree, foible, enflee, & si estrangemēt  
tourmentee de douleurs, qu'on n'y  
cognoissoit & esperoit rien. Ceste pi-  
toyable Princesse l'ayant par sages-  
femmes fait visiter, descouurit ce qui  
en estoit : sçauoir est, que ceste mala-  
de qu'on pensoit estre fille & pucelle  
auoit en elle vn enfant conceu, & ja  
grand, qui estoit de long temps mort  
& pourri dans le ventre, de sorte que  
les ossements ayant percé la matrice  
se presentoient à costé du nombril,  
par ou ladicte Princesse en veid elle  
mesme tirer quelques vns, & sortir  
abondance de trespuantes pourritu-  
res, dequoy neantmoins en bref elle  
guarit. Et la veid ladicte dame lon-  
gue espace de temps estre tressaine:  
mais ne sçait en fin qu'il en aduint  
depuis, quant à autre chose, ny si elle  
fut mariee, ou grosse, ou non, car peu  
de tēps après ayant espousé feu mon-  
seigneur,

seigneur, elle changea de demeure, & ne s'en est depuis enquisse.

*Quatriesme particule.*

**C**OMBIEN que telles maladies de la matrice estant encor' dans le corps, & aussi les cruels remedes y appliquez soient merueilleux pour en estre à si bon marché eschappees les patientes, si est-ce qu'encor' y en a il de plus estranges, dequoy les femmes ne meurent pas; combien qu'elles en restēt sterilles par après. Comme est la totale amputation d'icelle, si fort precipitee, qu'il la faut extirper; ce qui aduiant neantmoins sans qu'elles en soient gueres malades.

Cela toutefois, quant à sa totale precipitation, ne croient encor' quelques medecins, & chirurgiens, voyre bien doctes, à ce induits par l'autorité d'Æginete, & d'Ætius, lesquels semblent n'accorder sinon mal-aisé-

mēt, qu'elle puisse si fort sortir, non-  
obstant que pour la reduction d'icel-  
le ils escriuent les aydes & receptes  
de leurs predecesseurs, & que finale-  
ment ils confessent (pour l'auoir ouy  
dire) en auoir esté extirpees quelques  
vnes à femmes suruiuâtes. Mais l'au-  
thorité d'Hippocrates (au traicté des  
maladies feminines) semble leur estre  
contraire, & l'experiēce oculaire aus-  
si: par-ce que ledit Hippocrates escrit  
qu'on la void sortir hors du corps  
grandement & souuent iusques aux  
cuisses, voyre selon ledit *Ætius* aussi  
grosse qu'un œuf d'austrie, qui ne  
peut estre du seul col matrical, sans  
que tout le corps vterin y soit deual-  
lé. Et outre cela, nous voyons à l'œil  
qu'elle a lors la cauité de dedans ren-  
uersee au dehors, & le dessus qui e-  
stoit interieur estre abatu en bas, fai-  
sant lors l'exterieur, dequoy font ma-  
nifeste-



nifestement foy trois choses, outre l'authorité d'Auicenne, au v. chapit. du I I I I. traicté du fen x x I. du I I I. liure. Premieremēt la sensible issue, & lente resudation du sang mēstrual, fortant par toute l'estendue de la superficie d'icelle, acheuee de precipiter au temps des mois; qui est argument infailible, qu'il vient du corps interieur, & cavitē de l'amarris, non du col matricā seulement, comme quelques vns ont voulu songer contre l'opinion qu'en a Galen mēme. En quoy n'est hors de propos, mais bien à noter, que si le seul col sort dehors, le fond restant encor' à sortir, lors on void au bas d'iceluy (n'estant encor' gueres plus gros qu'environ vn œuf de poulle) vn trou; qui est la bouche matricale attirée en bas vers cedit col, & deprimée par le fond, ou corps de la matrice: par lequel trou

le menstrual est veu descendre en son tēps, aux fēmes ieunes qui ont ce mal: & lors ceste descēte est encor' d'assēs facile reduction. Mais quand par ceste bōuche pōur plusieurs causes fort relaxee, le fond interieur vient à sortir dehors en telle enormité, qu'on void iournellement, adonc ce trou n'apparoist plus, ains finalement aduient que tout cela ressemble à vne grosse gourde à vin, ayant à son haut vne grosseur oualle moindre que la basse, & au bas vne autre rōde beaucoup plus grosse que la haute, sans aucun trou en bas: à l'entre-millieu desquelles y a vne estroisseur remarquable, les separant aucunement, qui est la bouche matricale dilatee: lors aduient que par tout ce corps inferieur est veu sortir aux ieunes (comme par resudation) le menstrual au tēps ordinaire. Ceste espace destroisseur

seur entremoyenne est le lieu qu'il faut lier alors qu'on veut extirper la matrice precipitee, & gangrenee, car rarement aduient il, que celuy d'en haut commence à se putrefier. Ainsi ceste grosseur moindre & superieure se pourra remettre, si l'inferieure estât ostee, elle n'est plus foulée comme auant la cheute, ny tiree en bas, comme après la totale precipitation: autrement il y a violente douleur, & danger si on la lie au dessus de ceste estroisseur separante (comme il est quelques fois aduenü.) Secondemēt le fort peu, ou point de douleur, que ceste masse de chair precipitee ressent lors, qu'on la maine assez rudement pour la reduire. Car c'est (à vray dire) la bouche, & les attaches, dont elle pend, qui sont fort sensiles, & nō pas le corps interieur, duquel nous parlons icy, & aussi que nous incisons à

la Cafarienne, côme nous prouuons  
autre part. Tiercement les remedes  
qu'on y fait ; & notamment après  
tous autres l'insertion penitine d'un  
pessaire de liege ciré, ou autre, duquel  
nous traictons cy après autre part,  
pour n'empescher ce propos : Pour  
auquel entrer auât qu'alleguer les au-  
thoritez d'autrui, ie reciteray en bref  
deux histoires de ce que i'ay oculai-  
rement veu.

*Histoire.*

**I'**A Y assisté à Lunel à l'extirpation  
d'une matrice, qui fut incisée par  
l'ordonnance de feu messieurs Sapor-  
te (mon hôte & Meccenas) & Ron-  
delet (mon president) par un maistre  
Barthelemy, dissecteur public, depuis  
mort phtisicq : & ce après y auoir  
pour-neant fait à Montpellier tout  
ce qu'on auoit peu.

Depuis i'en ay fait couper une  
par

par Ambroïse le Noir, & Cópagnet de la Tour chirurgiens de Pithuiers, à vne Damoiselle en Gastinois, que ie ne dois nommer; laquelle estoit autrement incurable, tédante à gangrene, & ne tenant plus qu'à vn peu de peau, estant le bas pendant, gros côme les deux poings, ja tout liuide.

*Autre histoire.*

**L**E fufdit sieur de Villeneuve, quelque temps auant que i'eusse frequentation avec luy, en auoit faict couper vne par maistre Pierre Maurace de Vaulreas, à la femme d'vn Pierre Coste texier de draps, laquelle luy estoit soudain precipitee au releuer d'vne gesine, après vn difficile enfantement, ou elle auoit esté tellemēt blessée, qu'on ne la pouuoit remettre: l'ayant liee, coupee, & puis cauterisée, le tout sans le sceu de son mary mesme lors absent, avec lequel elle

ne laissa pas depuis de conuerſer, ſans toutefois qu'elle y euſt plaſiſir, ce qu'il m'a de nouueau encor' ratifié par miſſiue expreſſe auoir fait faire; en l'an M. D. XXXIII.

*Autre hiſtoire.*

**A**VEGA auteur Eſpagnol au traité de la cheute matricale, ſe dit en auoir dix ans auparauant fait couper vne à vne femme, lors encor' viuante.

*Autres hiſtoires.*

**C**ARPVS en ſon Anatomie parlant de cela; dit en auoir veu extirper vne par ſon pere; luy en auoir coupé vne autre; & depuis encor' fait couper vne autre par vn ſien nepueu, es preſences de pluſieurs medecins; allegant quelques obſeruations eſtranges, deſquelles conſiderables & problematiques; nous auons fait quelque diſcuſſiõ en vn bref traité ſur ces matieres.

*Autre*

*Autre histoire nouvelle.*

**C**EST E precipitation totale de matrice ne pouuāt plus estre remise, ne se guarit pas seulement par section & ystion, mais aussi par ligature, cōme ceste annee mesme nous en auons veu la pratique, de laquelle s'ensuit l'histoire.

Philleberte Louyson, femme de Jean Baugin vigneron, demourant à la Nœufville, entre Pithuiers & Puy-seaux, ayant eu vne grande, & assidue vuidage de sang matrical, par l'espace de xviij. mois, avec vne pesanteur vers le col de la matrice, sentit en sa maison tomber subitement (chose esmerueillable) sa matrice iusques sur les cuisses, en telle grosseur, que ne la pouuant remettre, appela pour secours, après trois ou quatre iours M. Bonaueture de la Tour, & M. Blayse Berte, chirurgiens dudit

Pithuiers, avec lesquels i'ay communiqué souuēt de ces matieres, n'osans seuls venir à l'incision, se cōtenterent en m'attendant de la lier, qui fut le **x x v.** de Feurier **M. D. L x x x.** ce qu'ils firent fort estroittemēt, n'ayans peu la remettre, & ce non à l'endroit de l'estroisseur (qui estoit entre le col & le corps vterin precipités, duquel nous auons parlé) & ou plus suremēt se peut faire l'extirpation, mais au col mesme d'icelle, estant fort issu; de façon que la ligature estoit fort proche de l'vretre, ou canal de la vessie. Et y fut ceste premiere ligature par huit iours sans changer: en fin desquels y estant avec eux arriué pour l'inciser, vstuler, & extirper, & voyant que la dite ligature estoit si haute, qu'on n'y pouuoit faire sure incision, & nullement vstion, considérant aussi que la patiēte estoit trop foible, ie me contentay



rentay de leur faire faire au lieu mesme nouuelle, & encor' plus serrée ligature que la premiere, laquelle ayãt desia coupé bone partie du lieu qu'elle ferroit, estoit fort lasche. Quoy faisant (non sans douleur) ceste dicte seconde, & plus forte ligature coupa quelque partie du lieu: & vint ceste coupure par deuãt, à l'endroit ou se faisoit le nœud, iusques au canal moyen, par lequel la matrice renuersee auoit coulé du haut en bas: Duquel lieu sortit grande quantité de bouë venãt de la cavitè du corps qui pendoit sur les cuisses, estant desia noir & en gangraine. Depuis lors après auoir de iour à autre par dix fois pour tout fait ceste dicte ligature en serrant de plus en plus, comme il auoit entre nous esté resolu, finalement ladicte matrice tomba d'elle mesme, le xx. de Mars: & est la patiente à

present guarie, vaquant à ses affaires, plus dispoſtement qu'elle ne fit onc.

*Cinquiesme particule.*

**C**es hystoires de l'amputation de matrice precipitee & pourrie en femme ſuruiuante ne doiuent eſtre trouuees eſtrâges, veu que ne ſe pouuant icelle remettre, elle ſe ſepare biẽ, & totalement extirpe d'elle meſme, (ſi on ne preuient ſa reſection par artifice de chirurgien) ſans mort, voire meſme ſans maladie, cõme teſtificent ces deux hystoires.

*Premiere hystoire.*

**F**EV madame de Blancafort ( l'aïſnee ) ayant de long temps de peu à peu l'amarris ſi precipitee, que finalement elle ne la pouuoit plus remettre ny ſupporter, voyãt qu'elle cõmeẽçoit à ſe pourrir , me venoit trouuer à Montargis pour illec la penſer , ou conduire à Paris : mais elle luy tõba  
en

en chemin : ne laissa neantmoins de passer outre, & ne luy fut pour cela fait autre chose, qu'un lauement de vin, & roses par Felles chirurgien; qui a son dire n'apperceut au lieu ou fouloit estre la matrice, qu'une vacuité. Ce fut en Esté M. D. LXXI. & vescu depuis assez saine, quant à cela pour son aage: En fin mourut soudain de la cheute d'un degré, ou échelle sans estre ouuerte, pour veoir le lieu d'où l'amarris estoit tombee, cōme fut celle dont ensuit l'histoire.

*Histoire seconde.*

**P**ERRINE Boucher, desia vieille chambriere chez maistre François Quarre, Aduocat à Montargis, pour auoir eü plusieurs accouchemens forcés, auoit de long temps vne precipitation de matrice, qui peu à peu creut tant, qu'elle ne la pouuoit plus remettre, en fin se gangrena, pourrit, &

tomba d'elle meſme, l'an mil cinq cēs  
ſeptante quatre, en cuidant rendre de  
l'eauë (dequoy ſont ſuffiſants teſ-  
moings monſieur Côtuge medecin,  
& maĩſtre Iean Beauuais chirurgien  
à Môtargis) dont elle ne daigna gar-  
der le liēt. Elle veſcut trois ans après  
bien ſaine quant à cela, ſinon que de-  
puis lors elle eſtoit, à ſon dire, plus  
ſubjecte que deuant à ſe tenir fort  
couuerte par en bas, ou bien endurer  
douleurs de colique. Finalement  
(moy abſent) eſtāt icelle morte de fie-  
ure continuë, & ayāt deſia eſté inhu-  
mée; fut à mon retour deterree par  
permiſſiō de iuſtice à ma ſolicitatiō,  
& ouuerte par Felles chirurgien, le  
XXII. de Nouēbre M. D. LXXVII.  
és preſences dudit ſieur Côtuge me-  
decin de la ſage-femme, & autres. Et  
n'apparut entre la veſſie & le gros  
boyau (au lieu ou deuoit eſtre la ma-  
trice)

boyau (au lieu ou deuoit estre la matrice) rien qu'un lieu vuide, d'où passoit & repassoit aisément, & sans rencontre le mâche d'un gros rasoir: qui estoit à la verité l'ouuerture par ou elle prenoit froid, & la vraye cause de sa colique: estant toute ceste partie là cicatrisee és enuirs: car il n'en auoit onc depuis son amputatiō, forti bouë, ou purulēce aucune. Je pourrois icy adiouster ce qui est coupé en Turquie à ceux qu'on fait Eunuques pour le ferrail de leur grād Seigneur, non pas comme iadis on faisoit par attrition, ou extirpation des seuls testicules, mais par excision totale, tant desdits testicules, que de toute la verge, & la bourse: ceste cy respondante à la matrice renuersee, & l'autre au col matrical, lequel col toutefois on n'incise pas en la section Cæsarienne, ny quelquefois en l'amputation de la

matrice precipitee. Que si on me dit n'estre pas de mesme, tant par-ce que cela se fait seulement en iceux fort ieunes, & la Cæsarienne incision en grandes femmes, que pour-ce qu'on tiét là des remedes exquis tous prests à cela: ie responds, qu'aussi peut, & doit on faire en cet œuure icy; & d'auātage, que l'aage tendret ny fait rien contre nous, mais au contraire est pour nous; par-ce qu'il deuoit estre iugé moins capable de telle amputation en ces ieunes enfans qu'on chastre, qu'en aage plus tardif, à l'exēple des calculaires, qui trop ieunes portent mal la section vessicale: Mais bien que l'aage d'eust fauoriser ces ieunes chapponneaux Turquois; si voyons nous que plusieurs ja grands & vieux, estans deuenus maniaques, melancholiques, & insensés, se sont d'eux mesmes tranché tout ce mesnage,

nage; comme estant encor' grammairien à Orleans, i'ay veu estre aduenu à vn maistre d'hostel de l'Euesque de Nātes, lors escholier à Orleans, s'estāt par furie d'amour ietté en vn profond priué, & là dedās coupé toute la cause instrumētale de son amoureuse maladie, avec telle hemorrhagie, qu'on peut pēser auoir continué tāt qu'on l'eust peu tirer de tel lieu, & toutefois il n'en mourut pas; ce qui mesme s'est fait à plusieurs fort aagés surpris en adultere, sans qu'on leur appliquast prōptement aucū secours, cōme on peut faire aux Cæsariēnes. Or chacū anatomiste scait assez, quels harfards il y a en ces parties là de tels Eunuques, autant ou plus suspectes à mort en telles prisons, que sçauroit estre l'endroit de la matrice Cæsariēne qu'on diuise seulement, sans rien extirper de sa substance, combien que

l'epigastre ny soit pas touché comme en la Cæsarienne.

*Epilogue des precedentes histoires.*

**P**V I S donc, pour conclusion, que ladiète matrice se peut si fort apostemer dās le corps, qu'il la faille ouvrir quelquefois par le ventre inferieur (lieu plus dāgereux que s'il estoit plus haut, & à l'endroit ou nous faisons l'incision Cæsariēne) voyre avec fer ardent; puis aussi qu'elle se peut vlcérer si amplement, qu'un enfant mort passe tout entier, ou bien toute sa carquasse au trauers d'elle, iusques sur les intestins, & de là encor' dehors avecques pourriture, ou incision de l'abdomen, & neantmoins se guarit sans perdre la conception; puis que elle peut estre extirpee par section, vstion, ou ligature, sans mort de la femme; Puis qu'après longue precipitation, corruptio, & gangrene, elle se de-




se destache & ruine d'elle mesme, sans mort ne maladie de la femme, pourquoy ne se pourra elle, avec pareilles, & plus grandes suretez artificiellemēt inciser en telles necessitez, & se guarir avec ayde qu'on y fera, & encor' après concevoir, porter à terme, & rendre le fruit par enfante-ment naturel? Si toutefois quelque embouclure n'aissante de l'une des causes predictes ne l'empeschoit, qui la fist reuenir à ceste necessité de l'ou-urir encor' à la Cæsarienne, mais plus facilement que deuant. Il semble au vray que nature ait grandement à se complaindre de sa seruante chirurgie, & des grāds maistres qui la tiennent en tutelle, veu que leur montrant à l'œil & au doigt, tāt d'exemples en cet endroit pour secourir le genre humain ( dont il font profession ) & les poussant par force, cōme

par l'espaule à ce faire surement, & avec si hureux succez, ils n'en veulēt toutefois, ou n'en osent approcher, mais au contraire empeschēt, ou defendent (en tant qu'il est en eux) telle operation à ceux, ausquels experiance (mere des arts) a communiqué ceste industrie par l'observation des effects si euidens.

## CINQVIEME SECTION.

### *Autres probations plus populaires.*

 R si quelque esprit de contradiction, ou ennemy iuré de verité est si hors des gonds, qu'il ne vueille riē croire de tous les narrez, par opinia-  
streté, n'y aussi y aller veoir, par belle paresse qui est en luy, ny aquiesser à la force des argumens cy dessus proposez; Je luy confronteray de beaux chasteux

chastreux en barbe, qui me feruiront contre luy d'aduocats sous l'orme, & à luy de *magistrorum de villagio*, suffisans à le faire victus sans repliche. Ces maistres là quand ils chastrent bestes cheualines, truyes, & chiènes, ils leurs tirent ( quand elles sont ieunes ) les vns seulement les vaisseaux spermatiques ( qu'ils nomment les amours ) quelques vns les testicules feminins ( qu'ils appellēt les boutons ) les autres qui sont graduez nommez, extirpent la matrice ( qu'ils appellent la porture. ) Mais si telles bestes sont grandes, ils aimēt mieux les chastrer, estās pleines de petits, qu'autrement, tant pour-ce qu'ils en trouuent plus facilement la matrice, que pour-ce qu'ils en tiennēt la chastrure plus sure : aufquelles neantmoins quelques vns des moins habiles, se contentent de couper lesdicts amours, f'asseurās

qu'elles ietterōs hors leur fruiēt trois iours après, comme il aduiēt. Les autres tirent les petits (comme i'ay veu) pour en desieuner leur chien, chose qui ne se peut faire qu'avec incisiō de la matrice: Mais les grands docteurs en ceste faculté, coupent la matrice en bonne partie, ou toute; car autrement quelquefois auient, qu'elles ne laissent pas d'entrer en amours, & faire rager les masles après elles; qui est mauuais en bestes cheualines. Et après tout cela, ils n'y font que quelque poinct d'aiguille, graissans le lieu avec oingt de porc, huile de noix, cendre de foyer, & quelquefois vn peu de fuye de peur des mouches, ou des vers. I'ay fait tirer les petits, & la porture par vn Gasset, expert chasteur à deux grādes chiennes prestes à chienner, d'ont l'vne trainant les boyaux (pour s'estre avec les dens arrachee

rachée la cousture) mourut à quelques iour delà: mais l'autre à qui cela n'aduint pas, n'en perdit onc vn coup de dent, à laquelle on auoit tiré cinq petis, avec la matrice qu'il lia par en bas, car autrement mal en succederoit, estant leur matrice fort longue, & plusieurs diuers endroits d'icelle, lors coupés, ausquels sont particulièrement attachees les secondines de chacun petit chienneau. I'ay veu vn vieil berger, lequel sur la fin de l'automne, ne faisoit que le cerf d'ainsi chastrer ses vieilles brebis meres, quelque pleines qu'elles fussent, tant pour-ce que mal aisément eussent elles passé l'hyuer autrement, que afin de les mieux, & pluystost, & à moindre coust engraisser, & rédre tendres, sauoureuses, & de meilleur goust que n'est aucune chair de franc mouton, sans que nulle en mourust, ou fust

desgoustee, c'est chose qui se void d'un chacun, & qui peut estre experimentee sans danger, & à peu de frais, par chirurgiens mesmes, attendant d'en faire experience en femmes enceintes, condamnées par iustice à mort, leur impetrant, si est possible, grace, & la vie si elles en reschappent, comme elles feront infailliblement, si estans prestes d'accoucher, on les ouvre dextrement, & qu'elles soient bien gouvernees; car lors (& non plustost) se destache la secondine d'avec la matrice naturellemēt, sans laquelle dissociation, l'operation en seroit plus difficile & dangereuse, ioint que alors plustost qu'au parauant, s'ouvre le bas de la matrice, pour donner egoust au sang, sanie, & bouë qui pourroit estre au dedans.

*Autre probation vulgaire.*

**I**ALLEGVERAY encor' à ce propos,

pos, ce que les femmelettes de village font elles mesmes en pareil cas, non seulement en chapponnant leurs petits cochets, ou grands cocqs, par l'extraction apparente des testicules; mais aussi à leurs poules, leur ostât la matrice, ou ce que nature leur donne pour matrice, à quoy est attaché, avec quoy est fomété, de quoy est entretenu & nourri l'œuf fait de la geniture du coq, & de la poule ensemble (fil est fécond) ou de la poule seule, fil est sterile, & inutile à couuer, qu'on nomme subuentance, & toutefois la playe estant telle, qu'on y met le doigt bien auant, est fort grande à proportiō de celle de la femme incisée. Que si cecy est indigne (comme la susdicte allegatiō des bestes de mestairie) à faire venir des estables, & poulailliers de village, és sacrees escholes de medecine (nōob-

stant que Cato, Varro, Palladius, & autres doctes auteurs ne l'ayēt desdaigné) pour le moins il seruira au chirurgien, pour donner courage à nos pauuretés Cæsariennes, à bien esperer d'elles, en ceste necessité, par la proposition de ce, qu'elles mesmes font en ce petit bestial, sans qu'il en ait pis. Je fineray donc icy la conclusion affirmatiue du propos tiré en doute, pensant auoir bien satisfait à ce que i'ay promis touchant la possibilité, verité, sureté, facilité, vtilité, & frequentissime necessité de l'enfancement Cæsarien, bien & discrettement administré en temps & lieu.

*De quelques accidens qu'on peut alleguer aduenir dangereusement en ceste section Cæsarienne.*

**L**es symptomes, qu'on peut dire estre icy à craindre, sont principalement



lement syncope, & conuulsion. Sçauoir est le premier pour la grande perte du sang, auquel git la force de la personne, & la vigueur: tefmoing la foiblesse qui en succede quand on le perd, mais ayant esté prouué qu'il n'y a pas grande perte de bon, & vtile humeur en ceste operation, il s'ensuit de mesme, qu'il ne vient pas de ce costé là grand defastre pour les synco-  
pes, ou lipothymies, qu'on nomme plus vulgairement euanoüissons.

Reste donc du spasme ou conuulsion, qui est vne retraction des parties nerueuses à leurs cōmencemens. Accident de fascheux effect, & souvent mortel; mais icy peu ou point à craindre: lequel comme il a ja esté dit pour iceluy au traitté du peritoine, vient de causes interieures, ou exterieures. Quant aux interieures, qui sont en general deux, sçauoir est ina-

nitiō & repletion. La premiere, pour le regard de la matrice incisee n'y est pas plus qu'elle doit estre, & qu'elle se trouue es accouchemens naturels; veu que la vuidage du sang, qui presque seule la pourroit faire, n'est pas icy excessiue, comme est predict. La seconde cause, qui est repletion, y est encores moins, estant ostee en ceste section (si elle y deuoit estre) par l'hæ-morrhagie, qui est la guarison de plectoire, consideree l'inutilité de ce sang vuidé. Entre les exterieures, la surprise du froid entrant aux parties intérieures de la femme incisee, ou offensant les parties bleessee exterieures se peut cōpter, mais la vigilāce de l'habile & prudēt chirurgiē y sçaura bien mettre ordre. Reste la douleur qui semble tenir de la moyēne nature, & participer de ces deux causes, qu'on pourra reduire à laquelle on voudra.

*Que*

*Que la douleur pour l'incision de la matrice ne peut apporter spasme, & qu'elle est au lieu de son incision fort peu sensible.*

**O**N allegue pour ce poinct à l'encontre de nostre assertion, le triste effect de douleur, qui semble à plusieurs ne pouuoir estre que tres-grand en vne partie estimee si nerveuse, & consequemment sensile; à quoy y a responce cōme deuant, qu'il n'y a pas nerf en icelle, qui soit fort notable, & grandement sensitif au lieu profond, & bien interieur de l'amarris, ou nous l'incisons, que si quelqu'un y en a, il est fort confus, en mode de membrane à demy charneuse, entremeslé de diuerses fibres insensiles, & vaisseaux, le tout fort imbu d'humeurs, qui encor' plus que tout assopissent l'acuité du sentimēt, qui y pourroit estre: & semble le nerf

qui y viẽt seruir plus à la matrice particulièrement, en faueur de l'enfant, qu'à la mere pour y porter aussi bien l'esprit animal pour luy, comme les veines font le naturel, & les arteres le vital, si toutefois cet esprit animal a besoing de canal, ou conducteur (cõme on peut avec raison ambiguemẽt opiner) nonobstãt qu'il semble à aucuns y pouuoir venir sans cet ayde, comme par irradiation par les autres parties, qui est philosophie plus haute que ce traitté ne porte. La femme donc n'ayant, pour elle seule, & toute, que faire de ce sentiment & mouuement, qu'un tel nerf porte à sa matrice, le laisse (comme par indulgence de nature) tout à ladicte matrice, tant pour elle en particulier, que pour le communiquer (entant qu'il est besoing) à son fruct. Et de là peut estre que ladicte matrice a ses mouuemẽs,

&amp; à

& à proportion de cela son espece particuliere de sentimens propres, voyre estans hors la volonté de la femme: de mode qu'on la dit estre vn autre, & secód, ou double animal. A cause dequoy elle se dilate, & accourcit plus, ou moins, selon qu'il est besoing, sans molester la mere, si cela se fait naturellemét, mais si c'est pour cause contre nature, l'offense se ressent plus aux autres parties du corps, qu'en icelle matrice, quant à douleur, soit au corps, soit à l'esprit: car souuent aux plus raffises elle fait perdre patience, cōtenance, & toute raison, soit à discourir, soit à se mouuoir, ou à autres comportemēs. Ceste obscurité de sentiment n'estát en ceste partie là, que pour ceste fin, & aussi pour discerner les choses attristantes, est illec obtuse par prouidence naturelle; comme il en aduient aussi à l'intel-

rieure substance d'autres parties plus principales qu'elle n'est; comme à la ratte, aux reins, au foye, au cerueau, à la medulle spinale, voyre mesme au cueur, comme il apparoiſt par-ce qui est sus allegué de Cornax, & de Maffa, à celle fin que ie laisse les poulmôs, veines, arteres, ossemens. Mais (dira quelqu'un) encor' y sent on douleur manifestemēt, comme és inflammations, erysipeles, &c. A quoy ie respôs que c'est la bouche, & appendices d'icelle, qui sont à douleur, ou à volupté fort prompts, & sensiles, ausquelles parties nous ne touchons pas en nostre section. De tout cela fait appertement foy (comme est predict) le peu ou poinct de douleur que sentēt, non seulemēt les Cæsariennes, quād on les coupe en ceste partie haute, mais aussi les femmes rompuës par precipitation vterine, ne sentans pas  
gueres

guerres de mal, & souuent point, quād on leur manie (voire bien rudement) ces parties deualees, pour remettre ladicte matrice, qui est le lieu qu'on coupe en l'operatiō Cæsariēne dont est question.

*Histoire.*

**E**N quoy ie me confirme encor plus par l'histoire d'vne femme, laquelle depuis quelque tēps i'ay, avec plusieurs autres medecins, veuë & pēsee malade, & après sa mort fait ouvrir en presence de fideles tesmoings, ayant en la solide corpulence de sa matrice (non pas en la concauité, ny en la superficie, ou bosse exterieure) vn entassement si estrange de tant d'humeurs, & carnositez excrementeuses, membranes, tendrons, forme d'osselets, de gōmes, louppes, & autres corps de diuerses substāces, couleur, odeur, & toute autre qualité,

qu'elle emportoit au poix de la balā-  
ce quarante liures marchandes, sans  
y auoir senti par trois ans, & plus  
(que tout ce menasge s'y estoit em-  
prisonné) douleur dōt on d'eust faire  
cas, pour telle impurité, & si lourd  
fardeau, ayant au demourant tout ce  
temps là heu toutes ses actions natu-  
relles, vitales, animales, libres, saines,  
& entieres.


Or posé encor' le cas, que pour la  
lesion de telle partie membraneuse,  
il y d'eust venir spasme (qui n'aduiant  
gueres que par ponction, laquelle se  
guarit par section de la partie poin-  
cte) alors ce que nous y faisons en  
incisant le deuroit empescher, voyre  
guarir. Dauātage encor', que l'vn, ou  
l'autre symptome (sçauoir est cōuul-  
sion, ou syncope) y d'eust suruenir  
pour la sectiō, ou quelque autre cau-  
se (qui les fait biē aduenir aux accou-  
chemens



chemens naturels, ou on ne coupe rien) si est-ce encor' qu'on y pourra lors remedier, par tels aides en cestui-cy, comme en l'autre accouchement naturel, sçauoir est par diuers restaurans en la syncope, & par fomentations conuenables en la conuulsion: la matiere, composition, & administration desquels se doit traiter autre part.

## SIXIESME SECTION.

*De la fœcondité qui reste après la section Cæsarienne.*

N C O R' qu'un bon nombre des histoires precedentes de femmes, diuersement offesees en la matrice, tant par section Cæsarienne, que par autre plus cruelle façon testifient assez (pour auoir enfaté depuis) que la fœ-

condité est reſeruee entiere après telles operations; ce nonobſtant ie preuoy que quelques vns ne ſ'en contenteront pas, allegants cela ne pouuoir eſtre, pour deux raiſons non impertinentes. La premiere eſt vne intempérature de matrice preſuppoſee prouenir de la grande effuſion de ſang prealleguee. Mais il y eſt ja reſpódu, eſtant monſtré encor' que l'hæmorrhagie fuſt grande ( ce qu'elle n'eſt ) touteſois tel ſang eſt inutile; & par conſequét ſa preſence onereuſe a vn naturel bien temperé, comme la detraction en eſt fort fauorable. Quant à la ſolution de continuité ( ſeconde cauſe ) il eſt auſſi monſtré, qu'elle eſt petite après la retraction de la matrice, l'enfant eſtant mis hors.

*Pour la cicatrice, qu'elle n'empêche pas la fœcondité.*

**M**AIS ſur ce poinct reſpondu, on peut

peut contre-alleguer que ce lieu incisé s'estât appetissé si court, comme nous disons, aura aussi sa cicatrice fort courte, & avec cela bien grosse, dure, & mal obeissante, pour la multiplicité des fibres vnes, & autres, qui obscurémēt par diuers discours s'entrelaissent: toutes lesquelles sont liees & fermement nouées par ceste cicatrice: à cause dequoy, la matrice ne se pourra (disent ils) en ce lieu assez estēdre, pour y loger au large, & également cōprendre l'enfant à son aise; & conséquemment pourra (à leur dire) empescher, ou la conception, ou la portee, ou la croissance de l'enfant, ou la force de la matrice en l'accouchemēt pour l'explosion empeschee, qui lors de tous costez doit estre egale: Mais encor' (qui pis est) pourra ladiēte cicatrice (diront ils) causer à perpetuité le mal, qu'Hippocrates au

second liure des maladies feminines, appelle contortion matricale, la presence duquel induit necessairement sterilité: mais il y a responce quāt au premier, que si la consolidation est faicte par premiere intention (cōme problematiquement il est autre part disputé) il n'y aura point de cicatrice, qui doiue retenir court ce lieu plus que les autres: Ou si c'est par secōde intention, & qu'il y ait cicatrice, l'amarris s'estendra encor' assez, pour y bien loger l'enfant, à cause de la facile extension du reste d'icelle. Que si on replique que combien qu'ainsi soit, toutefois la matrice estant tousiours amenee d'un costé, plus que d'autre par sa dure cicatrice, l'enfant aussi sera contraint de venir avec elle, & par ceste cōtraincte y prendra difformité: ie leur nye, que pour cela il en vienne peine à la mere, ne contrefacture  
à l'en-

à l'enfant ; veu que nul de tous les deffusdits conceuz & naiz après telle section n'a esté bossu, boiteux, manchot, ou autrement contrefait : car la hargne, qui leur reste ( de bonne fortune ) sert bien à l'enfant pour sy loger, eslargir, & encliner : n'y estant pour cela en rien contraint, comme il est aduenü en tous, sans aussi que de la part des meres, nulle en ait enduré aucun ennuy: Ioinct à tout cela que l'enfant ne prend pas sa figure, & conformation de la matrice, comme d'un moule (quoy qu'il en soit autrement disputé par quelques vns) mais elle luy sert seulement de logis conuenable, d'estuue, & gardemanger; comme fait la terre au grain de bled, & autres semences; le sauuageon, ou autre arbre, à la greffe qu'on y ente; la chaleur fomentatrice, à l'œuf pour la production du blanc d'iceluy en

membres . Car la vertu informatiue du fruit matricial est enclose, tacitement insite, & cachee en la geniture tāt masculine que feminine (comme il est plus exactemēt par nous disputé en quelque autre lieu) nonobstant qu'elle y ayde beaucoup, quāt à quelques qualités, sil est vray (selon Hippocrates) les masses estre faits plus ordinairement en la dextre partie d'icelle, & les femelles en la fenestre. Et pourquoy lors n'y en tiendra il bien à laise vn, puis que deux y peuuent tenir; ou bien deux, veu que souuent trois y logent: voyre considéré que sans cōpagnie de freres bessons, quelquefois il s'y trouue avec l'enfant des moles, ou fardeaux beaucoup plus gros que n'est ledit enfant, avec toutes ses enueloppes, sans qu'il apparaisse qu'il en ait esté incommodé, n'y la mere fort empeschée. Et quant

au dernier argument, qui est prins de l'autorité d'Hippocrate, pour la cōtortion vterine prouenante ( pour la plus part ) de la meurtrisseure és accouchements, ou cheuttés, ou de la naturelle, ou accidentale debilité, & resolution de l'un des costez d'icelle, ou bien de la conuulsion plenitudinaire de l'autre partie, il est tout clair, qu'elle n'a rien de commun avec cecy, car pour la cicatrice elle n'est de ceste part en rien debilitée, ny relaxée, (mais au contraire en deuroit estre renforcée, & rafermée) ny aussi tirée en cōuulsion de l'autre costé ( cōme est ja predict ) parquoy il n'y a en cet argument que tenir.

*Autre probation de la fœcondité non empeschée par la cicatrice: par l'argumentatiō du fort au foible, consistāt en l'assertion d'un paradoxe nouveau, prou-*

*ué estre vray par experience, & raison medicale.*

**C**ES arguments estans d'experience & raison, deuroient bien suffire : mais i'adjousteray cecy dauantage, que puis qu'un pessaire (mesme d'assez bonne grandeur, largeur, & espaisseur) peut estre inseré, & retenu au profond de la matrice restituee de sa precipitation (pour la soustenir en son lieu dedans le corps) n'empesche ny la cōception, ne la portee, ne l'accouchement (comme ie pretends bien prouuer par histoire, & raison) la cicatrice aussi ne doit riē empescher de tout cela. Ce que ie te prie, amy lecteur, de prendre en bōne part; ne te scandalisant pas de prime face, pour ce que cela semble estre contre l'opinion de tous, & signāment des plus respectez auteurs vieux, & nouueaux, au moindre disciple, desquels ie ne



me veux parangonner, pour fauoriser mes conceptions, sinon entant qu'elles sont par l'adueu d'experience, & par le secours de raison, armées de verité inexpugnable. En quoy me cōfiant, i'ay après long refus osé mettre en auant ce propos, tant pour la confirmation du precedēt, que pour le respect que chacun vray medecin doit auoir à rapporter fidelement en cōmun, ce qu'il a peu pratiquer nouuellement de verité asseuree, en administrant les aydes, qui luy ont esté avec ferment solennel mis és mains pour le bien public. Telles additions ont mené les arts à telle perfection qu'elles ont. Premièrement donc, il est bien à remarquer par les susdictes histoires, raisons, & authoritez, que la matrice chet plus, ou moins, tant par causes exterieures, & violentes, qu'interieures humorales, ou sans

humeur, imbecillant, ou resoluât les attaches, ou dilatant l'orifice, & le col d'icelle, car cela n'aduient pas simplement pour tumeur, ou plénitude du corps solide d'icelle, qui au contraire plustost la tiendroît subiecte au dedans, qu'elle ne la poulsferoit au dehors : côme il apparroist par-ce, qu'en tous ces cas on void qu'elle tombe moins, quand le temps des moys approche (estât toutefois lors bien succulête, pleine, & pesante) ou au temps de la grossesse, qu'elle ne fait après lesdits moys, ou après la gesine, à cause que le menstrual qui la tumesie auant qu'il forte, ou l'enfant qui l'emplit auant que naistre, l'engarde de glisser par la voye de son orifice, & de son col lors trop estroits pour ce corps ainsi amplifié : de mode que lors la femme semble comme guarie, mais cela n'estant pas de duree, l'artifice

tifice du medecin y suruiuent, comme enseigne Hippocr. au liure des maladies des femmes, mais encor' experience nouuelle mōstre, que plus que tous autres remedes y vaut vne certaine insertion de pessaire, inuentee possible par hazard, ou pluystost (à mō aduis) par quelque industrieux medecin, imitant ce que nature fait audit temps de grossesse, ou à l'instance des moys; & ce pour engarder que ceste maison ne sorte par la porte mesme.

Ce pessaire n'est pas tel, que ceux qu'on infere seulement au col yterin pour plusieurs autres maladies de matrice, que quelques vns ont voulu particulieremēt nōmer lemnisques: mais commode & idoyne, pour mettre & entretenir dans la cavitē mesme d'icelle.

Nous luy attribuons ce mot de

pesse, ou pessaire, ou bien de *emmo-  
tum* par emprunt ( n'en ayant point  
d'autre) pour n'en auoir onc rien esté  
escrit en particulier par les anciens:  
Qui voudra le pourra nommer vne  
soupape (autrement soupompe) à la  
similitude de ceste partie des instru-  
ments hydroulques, qu'on nomme  
pompes, avec laquelle il a quelque  
conuenance en vsage, soustenant la  
matrice dans le corps, comme l'autre  
fait l'eauë dans la pompe.

*De l'inuention de ce pessaire, &  
diuersitez d'iceluy.*

**O**R n'est il de merueille s'il n'en a  
iamais esté par les anciens rien  
parfaictement escrit, car il y a vne in-  
finité de petits, & gentils aydes expe-  
rimentez par les femmes, aussi indu-  
strieuses à se secourir en telles mala-  
dies & necessités d'elles mesmes, cõ-  
me de leur nature verecondes à s'en  
descou-

descouurir aux hōmes, lesquels sont secrets entre elles: de sorte que la plus part de leurs medecins mesmes ne les sçauent pas, & croy que cestuy en a esté l'vn pour long temps: Mais auiourdhuy quelques chirurgiens en font liures, & leçons, & ce diuersement: sçauoir est, quant à la matrice, dequoy ils sont faits, quāt à la figure, & quant à l'vsage: car les vns le font de seule cire, quelques vns d'argent, ou d'or creux & pertuisé, les autres de liege ciré. Itē les vns le figurent rond, les autres en ouale, les autres triāgle, ou quadrangle inequilateral, à angles obtus: les vns en forme de cœur applati: quelques vns de rondeur oblongue, & tronquee: les autres rond en plat, pertuisé au milieu, ou non: Aussi plusieurs l'appliquent avec vne cordette pour l'attirer mieux dehors, quand ils veulent: les autres seul, sans

qu'on soit gueres empesché de l'oster, qui voudra, aussi bien que si l'y auoit vn cordon: les autres ne l'ostét nullement, comme est celuy duquel nous escriuons, & lequel estant interieurement dans la cavité de la matrice, les femmes ne laissent pas de conuerser avec leurs maris, sans qu'ils en sachent rien, si elles ne veulent; considéré non seulement le lieu laxé & spacieux ou il est, mais aussi la figure égale & polie, comme il est agencé; ne laissant aussi pour cela de concevoir, retenir, porter, enfanter; qui est vn ayde merueilleux, & seur pour les supporter en ce fascheux mal de precipitation matricale, & souuent les guarir absolument, après l'auoir porté quelque tēps, sans en auoir après affaire: voyre mesme fort vtile à cōcevoir, si elles en estoient auparauant empeschees pour telle precipitation.

Car

Car si l'epiploon tombant sur icelle (comme dit Hippocr. en l'Aphorisme LVI. du liure v.) empesche la cõception, que doit faire au pris ceste cheute d'amarris, qui se relasche sur elle mesme, comme si elle se vouloit accabler de son fais si on n'y pouruoyoit par ce relief en celles cy, cõme on fait es autres en les emaciant, cõme souuent nous faisons par conuenables dietes?

## HISTOIRES SVR CE- STE PROPOSITION.

*Paradoxe de conception, & portee entiere sur ce pessaire matrical.*

**M**'AYANT esté fait iadis recit d'une femme en Puifaye, ayant eu plusieurs enfans en le portant, & depuis ayât encor' esté battu de pareils propos par vne sage-femme picarde

dicte Preignon, fort recerchee és grâdes maisons pour sa lógue experiance, & dexterité en son estat, ie ne le voulus onc croire, non plus que les autres : ie n'ay ce-pendant laissé d'en faire en plusieurs lieux si songneuse recerche, que ie m'en suis par occasion satisfait ; veus de nouveau par experience les effects de cet ayde, au parauant aussi peu à moy croyable, que iadis estoit à tous les plus scauâts l'habitation sous la zone torride, descouuerte neantmoins & aueree depuis peu par l'experience des simples matelots, contre les escrits tenus généralement pour irrefragables des plus celebres Mathematiciens, & signalez Cosmographes qui ayent iamais esté. Pourquoy faire ces iours passez à Verneul près Senlis, & és environs, i'ay en l'an M. D. LXXIX. tant fait par moyës, & pratiques, que  
i'ay



i'ay veu, parlé, & familieremēt communiqué avec plusieurs femmes, qui en ont vſé, & encor' vſent; la plus part deſquelles ne veulēt eſtre nommees: celles qui enſuiuent ne le celent pas, pour eſtre cela cognu de toutes leurs voiſines: quelques ynes ſont, deſquelles les maris meſmes n'en ſçauēt rien, le nom deſquelles doit pour ceſte raiſon eſtre eſpargné. Clemēce Herauldié dicté Finet, femme de Geruais du Mont manœuvre ( de long temps venuë de Giſors demourer audit Verneul ) fille de Ioannet Herauldié dit Finet, iadis barbier audit Giſors, mariée fort ieune, eut enfant auant treize ans : qui peut eſtre cauſé que la matrice luy cheut : veu que ſelō Galen au liure des facultez naturelles, elle chet ſouuēt en la forte extruſion de l'enfantement, & ne ſe pouuant icelle bien tenir quand on la luy re-

mettoit, son pere estant chirurgien, luy accommoda vn pessaire tel cōme elle en fait, & administre à present à celles qui en ont besoing : pourquoy faire elle est souuent recerchee de prés & de loing. Elle cōceut, porta enfant, & accoucha par trois fois, le portant tousiours : & le remettoit incontinent qu'elle estoit deliuree, ne le faisant qu'essuier, & refrotter de beurre, sans en changer d'vn autre: tellement qu'il y a à present quarantē ans & plus, qu'elle porte encōre celui mēme, sans nulle offense d'elle, n'y putrefaction du liege, reuestu, & accommodé comme il est.

Item les sages-femmes de ce lieu, & enuiron ( & nommément vne dictē la Mineuse ) m'ont constamment assuré auoir iadis receu les enfans de plusieurs autres femmes, ausquelles icelle en auoit baillé, & specialement  
d'vne

d'une dicte la Nurette, accouchante d'un fils, qui m'a esté monstre, aagé à present de neuf ans. Ce pessaire mesme estant lors forty avant l'enfant, luy fut remis le quatriesme iour d'après, par-ce que la matrice estoit retombée, & l'a tousiours depuis porté sans nuisance iusques à la mort.

Item cela fut par elle mesme administré à vne autre dudit Verneul, dicte Geneuiefue Salantin, à laquelle en son premier mariage, ceste precipitation estoit aduenüe pour vn difficile enfantement. Elle le porta quatre ans, & deuint grosse en le portât, comme elle continua de faire tout le reste de sa grossesse, sinon qu'il luy fortit de soy mesme trois semaines avant son accouchement (qui est autre cas fort remarquable, pour la dispute qui s'en suit en après, touchant la probatio de l'ouverture de la bou-

che vterine en grosseſſe) ſans toute-  
 fois qu'elle en auançast d'accoucher  
 plus que de ſon temps. L'enfant eſt à  
 preſent aagé de 111. ans : & n'a ladite  
 mere depuis lors eu que faire de le re-  
 mettre, eſtât bien guarie de ceſte pre-  
 cipitation; combien que de nouveau  
 elle ait geu de deux gros beſſons maſ-  
 les encor viuants : qui eſt choſe fort  
 memorable, pour pluſieurs confide-  
 rations que ie laiſſe à deduire pour  
 cauſe de briefueté.

*Confirmation de ce que deſſus eſt dit, &  
 ce par raiſons ſolutiues de quelques ar-  
 gumens à ce contraires.*

**M**AIS pour-ce qu'eſcriuât ce peſ-  
 faire deuoit eſtre inferé dedans  
 l'interieure caulté de la matrice, quel-  
 ques doctes me contrariant ſouſte-  
 nants, qu'il n'eſt que dans le col d'i-  
 celle, & qu'il ne peut paſſer outre la  
 bouche

bouche interieure ; Il faut respondre à leurs obiections, estans fondees sur quelques authoritez, & prejugees plus tost, que sur raison pertinente, & les ayant soluës, môstrer euidemmēt estre non seulement possible, mais necessaire, que pour cet effect ladicte bouche s'ouure pour y inserer le pessaire : ce que nous pourrions faire en deux fortes. Premieremēt par vn probleme, iadis proposé en dispute par quelques doctes escholiers, sur la fin d'une anatonie, & depuis publiquemēt en vne quodlibetaire à Môtpeulier. Duquel propos nonobstant qu'il soit inuincible par raison (hors mis tout preiugé) toutefois pour n'offenser les oreilles mollestes d'aucun lecteur, ie le garderay pour vne autre dispute latine, plus propre à deduire és escholiers, & notammēt des anatomistes, veu la nature du subiet,

& les termes vn peu trop gras, dont il faudroit vser. Je viendray donc à l'autre raison plus serieuse & moins vrgente, qui est telle.

Si toute la matrice renuersee à la mode d'vn sac retourné, & mis à l'enuers (comme nous auons prouué par les Arabes cōtre les Grecs.) peut bien tomber du dedās du corps au dehors; voire souuēt outre le milieu des cuisses, & en grosseur beaucoup plus que les deux poings: il faut biē par necessité, que ce grand, gros, & long corps matrical, ait lors passé par ceste bouche, & encore qu'il y repasse, nō trop mal-aisément, quand on le remet, auant que d'y fourrer le pessaire dont nous parlons, qui n'est de beaucoup si gros que ce corps là. Pourquoy donc soudain, & à lors mesme qu'elle est encor' fraichement eslargie, n'y passera fort à l'aise ledit pessaire: lequel

quel y estant vne fois, f'y agence de telle situation luy mesme, qu'il ne tōbe, ny luy, ny la matrice, i'entends estant fait comme il doit estre.

Je ne m'esbahis donc plus, si les femmes se seruās de ces pessaires, que plusieurs chirurgiens n'y entendants rien leurs administrent, façonnez cōme il les font, & mis au col, & non en la cavitē vterine, n'en sentent que peu, ou totalemēt point d'ayde: mais au contraire souuent plus d'offense que deuant, tant en douleur, qu'empeschement de leurs actions: ioint à cela qu'ils aydent plus à faire cheoir la matrice, qu'à l'arrester, veu qu'il entretient le chemin en largeur, par ou elle doit passer en tombant.

*Solution par corollaire d'une autre instance, sur ce qui est predict de l'ouuerture de la bouche matricale en femmes grosses.*

○ R pour ce que nous auōs tiré ce-

ste dispute de l'ouuerture de la bouche matricale iusques aux femmes enceintes (propos auiourdhuy paradoxe comme les autres) nous adiousteros en bref pour la probation ce qui s'ensuit : qui est raison conforme à l'opinion d'Hippocrates, nonobstant que l'Aphorisme L. I. du liure v. semble estre contre nous : où il dit par paroles expresses, que la bouche matricale des enceintes est resserree, ce qui ne doit sembler du tout de si exacte & rigoureuse perpetuité, cōme semble l'entendre Galen, disant que depuis la conception iusques à l'accouchemēt, la poincte d'un poinçon ny peut entrer. Laquelle opinion a esté mise en auāt & receuë de main en main, pour-ce qu'il semble de prime face, que si autrement estoit, la geniture en d'eust incontinent decouler : laquelle toutefois y est sans ceste exacte



exacte compression desirée, bien reçue, attachée, & retenue; si quelque violent esbranlement ne l'en secoue, comme à celle seruante, dont parle Hippocrates. Ce mot Grec *σύνληψις*, ou le Latin *conceptio*, en peuuēt auoir donné occasion, comme signifians la matrice deuoir de tous costez nécessairement apprehender la geniture: mais Galen au commentaire sur le premier Aphorisme du vi. liure montre bien par le mot de *lienteria*, que souuent la chose n'est pas ce que le vocable reçu en vsage denote. Or outre l'instance oculaire de ce pessaire icy, encor' peut on veoir le cōtraire de ceste opiniō par plusieurs effets de nature, à laquelle nuls decretis de lart ne peuuent donner loy, entre lesquels sont,

Premierement les superfoetations, desquelles il est tant escrit; & ce tant

naturelles, ſçauoir eſt d'enfant ſur enfant ( comme nous prouuerons ) que non naturelles, ſous leſquelles ie cõprends fardeaux, moles, faux germes: nulles de toutes leſquelles ſuperfœtations n'aduiendroit, ſi iamais ceſte bouche ne ſ'ouuroit, cõme quelques vns tiennẽt pour reſolu. Vray eſt que la plus receuë opinion de telles ſurcharges eſt, qu'elles ne ſe font que de la ſeule geniture maternelle; à cauſe dequoy noſtre argumẽt n'auroit icy lieu par icelles. C'eſt pour-ce qu'on les compare aux œufs ſubuentanees de poule ſans coq, leſquels ſont ſteriles, mais pourtant ils ne laiſſent pas d'eſtre de forme, figure, & gouſt pareil aux autres: ce que n'a pas de ſemblable vn faux germe conferé avec vn vray embryõ, ou enfanton. Mais voyant que cela n'aduiẽt gueres que aux femmes mariees, ou cõuerſantes

avec

avec les hōmes, soyent grosses d'enfant, ou non : plusieurs sont d'opiniō contraire, disants que la geniture virile imparfaicte, & impuissante a la formation d'un enfant y a concurrēce avec celuy de la femme : à cause dequoy elle y est apprehendee de la matrice, qui la tiēt, & nourrit du sang menstrual, ce qu'elle ne feroit pas s'il n'y auoit que la geniture feminine, & non la virile, de laquelle elle est amoureuse. Ceux qui ainsi le croient, sont peu respectueux de l'honneur de quelques filles, ou nonnains, ou femmes vefues, auxquelles ces fardeaux aduiennent ie ne sçay cōment : parquoy ie suis content de n'estre pas de leurs aduis, & pour l'amour d'elles me deporter (pour le présent) de mon argument. Quant est aux naturelles, il est certain que deux enfans cōceuz par long interualle de temps l'un sur

l'autre declarent assez cela : ce que (long temps y a) i'ay remarqué vne fois à Pithuiers le vieil en vne femme, qui accoucha d'un second enfant trois semaines après vn autre enfantement, dont elle estoit ja releuee: de cela mesme fait foy l'histoire à tous cogneuë de madamoyelle de Malortie, qui est telle.

*Histoire concernant ce propos.*

**D**A ME Marie de Neuchastel, ayāt eu du Baron de Cremaille neuf enfans, deuint en secondes nopces avec le seigneur de Malortie grosse de trois fils ensemble, duquel nombre, petite comme elle est, mais bien fertile, elle estoit si chargée, qu'environ le v. mois elle en accoucha d'un seulement: Et cuidant comme elle aussi maistre thibaut celebre medecin à Chasteautierry, que les deux autres ne fussent que quelques vuidanges re-

ges retenuës, ou moles de fausse geniture; qu'on nomme fardeaux; luy ordōna huiſt iours après ledit auortement vne forte purgation propre à vuider ces choses; laquelle abbatit deux autres enfans si entiers & viua-ces, que ledit medecin mesme se repentant de son ordonnance, disoit qu'ils estoient indubitablemēt pour venir à terme, nonobstant l'auortement de l'autre, si la purgatiō ne leur eust fait tort. Depuis lors elle eut plusieurs grossesses, & presque toutes de ieumeaux, tantost males, tantost femelles; en l'vne desquelles elle fut par le violent aheurtemēt d'un chien tellement blecee, qu'incontinent se trouuāt fort mal, elle ne douta point que son fruiſt ne fust mort; de façon que quinze iours après, elle accoucha de deux enfans, l'un desquels estoit mort, & manifestement reco-

gnoiffable d'auoir esté lōg temps au parauāt esteint: l'autre estoit vif, mais si debile pour la communication du mal de son frere compaignon & voyfin, que par trois iours il ne peut tetter: neantmoins il fut si bien sollicité qu'il reuint, & maintenant aagé de dix & huiēt ans, est page chez le Roy à la grande escurie. Lesquelles histoires j'ay retirees d'vne lettre que ie garde, laquelle ledit seigneur de Malortie en escrit par le menu, signee de sa main à madame de Beauuais de Nangi, à la sollicitation de monsieur Seure docte & experimenté medecin à Melun, requis par moy de me faire cet office d'amy, pour l'vtilité du public.

Des enfans naissans en ceste sorte le dernier a pour ceste cause esté par les anciēs Romains surnommé Vopisque, à ce que dit Pline: qui est à

mon interpretation venu du Grec  
 ὅς ὅτις κούμπος, enfant depuis né à  
 nostre propos, seruent tels enfante-  
 ments de superfoetation, non seule-  
 ment si les enfans sont engēdrez l'un  
 après l'autre, mais aussi s'ils sont en-  
 gendrez ensemble, naissants chacun  
 à diuers temps, selon qu'on peut ap-  
 prendre des Aphorismes x x x v i i.  
 & x x x v i i i. du v. liure d'Hipp. au  
 premier desquels il dit, si les māmél-  
 les d'une enceinte flaistrissent, sou-  
 dain elle auorte. Et au suyuant, si estāt  
 grosse de deux iumeaux, la māmelle  
 destre flaistrit, elle auorte de celuy  
 qui est masle: si c'est la fenestre, elle  
 disperd de celuy qui est femelle. De  
 là il appert euidemmēt, que l'un en-  
 tretenant la mere en grossesse pour  
 n'auorter pas, l'autre ne laisse pas de  
 sortir par auortemēt, & consequem-  
 mēt selon son opinion mesme, que la

bouche de la matrice d'une enceinte  
fouure, voire bien large, pour ietter  
lors le fruit mort, comme chose ja  
luy estant onereuse & estrange, sans  
que le fruit vif, qui n'en sort pas, mais  
y tient bon, en ait à souffrir.

Secôdemēt plusieurs femmes gros-  
ses ont sans incôuenient d'elles & de  
leur fruit des rheumatismes de me-  
re, des vuidanges phlegmatiques, des  
besongnes blâches en abondâce: qui  
ne peuuēt sortir que de la cavitê ma-  
tricale, quoy qu'on tergiuerse: car en-  
cor' qu'il fallust cōceder (ce qui n'est  
de besoing) que le sang mēstrual aux  
femmes enceintes vient des veines  
crurales, & de celles du col de la ma-  
trice, lesquelles ne contiennent que  
du sang; si est-ce que l'on ne peut dire,  
que tels phlegmes, & excremens nul-  
lemēt saigneux, mais cruds, visqueux,  
crasses, & quelques fois putrides, pal-  
les,



les, verds, mais plus souuent decolorer, puissent venir en telle quantité d'autre lieu, que d'une cavitè spacieuse, & retiree à part; non d'un lieu exposé perpetuellemēt à degoust, comme est ledit col matrical, ayant en celà pareil office à receuoir, & incontinent ietter hors les excemens de la matrice, comme les nareaux ont à promptemēt vuider le gros, ou copieux mōrueau, qui s'est premiere-ment amassé, & long temps crouppi-és cavités superieures, estant sur les os ethmoides. Car il faut necessairement, que cesdits excemens vterins (estants tels qu'on les voit sortir du col matrical) ayent premierement estez receus, ou nés, & longuemēt retenus en quelque cauerneuse sinuosité de ces parties là, qui ne peut estre que le creux de la matrice, de laquelle puis qu'elles sortēt, il faut bien que

la bouche s'ouure pour les mettre hors, soit la femme grosse, ou non.

Or soit que telles vuidanges de superfoetatiō vne, ou autre; ou de rheumatismes matricaux, ayent precedé la conception, ou luy soient suruenus, tousiours cela fait pour nous: Car si c'est deuāt, on pourra aussi biē s'esbahir commēt la conception s'est peu faire là dessus, comme on trouue estrange, qu'elle se face par dessus vne cicatrice, ou vn pessaire de liege ciré, & bien agencé, comme nous soustennons aduenir. Au contraire si lesdictes moles, ou blāches descentes, cōme aussi les superfoetations, sont venues après la conception, il faut bien que la bouche de la matrice de la femme enceinte s'ouure pour laisser sortir ce flux humoral; comme aussi pour receuoir nouuelle geniture sur la vieille.

Tiercement cela appert suyuant l'opinion plus vray-semblable de plusieurs, par l'emission genitale des enceintes, cōuersantes avec leurs maris, auxquelles lors spermatizantes, la geniture vient comme en autre tēps de dedans l'amarris à lubrifier le col vterin, qui ne peut estre que par l'ouerture de la bouche de la matrice.

Quartement il est à noter, que quelques vnes d'icelles (principalement les fort sanguines) comme on voit iournellemēt, & qu'en ont escrit plusieurs, ont leurs moys ordinaires, voire assez abondannmēt, sans dommage de leur fruct, lequel a plus de nourriture qu'il ne luy en faut: à cause dequoy nous les saignons auourd'hui pour eiter les symptômes facheux, non seulement de plethorie, mais aussi de cacochymie, qui en brief, s'en ensuit: Ce qu'on craignoit,

neantmoins au temps d'Hippocrates, auquel les saignees estoient plus amples que les nostres. C'est pourquoy il deffend de les saigner en l'Aphorisme x x x i. du v. liure: Or est il que ce sang menstrual des enceintes viét aussi du dedans de la matrice, comme nous auons ailleurs môstré, & ce par l'ouuerture de quelqu'une des veines acetabulaires, auxquelles l'enfant n'est pas attaché par sa secodine: car s'il venoit par icelles mesmes, il s'en ensuyuroit auortement, ce qui ne fait: & n'offense ce sang passager, nō plus l'enfant enuelpé de ses secodines, que font les matieres susdictes blanches, ou putrides: toutefois peut estre (& non necessairement) que lors nature se descharge immediatement par quelques veines du col vterin, comme elle fait aussi quelquefois par le nez & par les hemorrhoydes, lieux plus

plus mal à propos que le col vterin, voire mesme comme i'ay souuēt obserué par vomissement de sang au temps prefix à ces flueurs, cas admirable en telles diuersions naturelles & non imitable par artifice medical.

100 Pour la cinquiesme raison fera l'analogie, & similitude de la retenüe naturelle, & guarison temporelle de ce mal, avec cet artificiel que nous y appliquons: car la femme, qui en estoit vexée seulement après ses moys, & hors le tēps de sa grossesse, s'en ressent guarie, ou soulagée en sa grossesse, ou quād le temps des moys approche. Au premier desquels deux cas l'enfant, qui l'engarde de tomber (cōme fait aussi le pessaire) est non au col, mais en la cavitē de la matrice. Et pour le second, il est certain que le sang mēstrual, enflant ladicte matrice (cōme fait le pessaire en l'esslargis-

fant) l'engarde par semblable moyen de tóber, estant imbibé dans le corps interieur de l'amarris, & non au col d'icelle.

En sixiesme lieu cela apparoist encor' mieux, par-ce que les maris de telles femmes ne laissent pour cet assez grand pessaire (estant vne fois logé là dedans & non retiré) de conuerfer ordinairement avec leurs femmes, sans offense, ou rencontre, voire mesmes sans qu'ils en sachent rien, si elles le veulent celer; ce qu'ils feroient infalliblement, si il n'estoit que au col matricial, veu la grádeur. Il faut donc de necessité qu'il soit retenu en ceste sinuosité yterine.

*Que le pessaire n'empesche pas la geniture d'estre aptement receüe, & bien affichee à la matrice.*

**O**R n'est il à craindre, que ledit pessaire (i'entends estant figuré

& poli comme il doit) empesche la geniture virile, & fœminine d'estre bien receuë, affichee, & adherente és parois interieurs de l'amarris, qui semble estre vn autre paradoxe en medecine, toute fois ayāt le sens conforme à la doctrine Hippocratique; car c'est bien assez qu'icelle semēce illec receuë s'attache, & prēne nourriture à vne partie seulemēt de ladicte matrice, pourueu qu'il y ait assez de veines acetabulaires, pour l'y entretenir, & alimenter, n'ayant besoing pour cela de toutes ensemble, nō plus qu'vn nourrisson de deux māmelles, si vne luy peut suffire, comme souuēt il aduient. Dequoy cedit liege n'est pour l'empescher, estant mediocre, leger, & poli, & par consequent hors de dāger de presser, abbatre, ou esgratigner l'embryon, cela se voit à l'œil és bestes polytoques, notamment és

chiennes peluës dans la matrice, desquelles les secondines d'un chacun des petis sont attachees à part, assez loing les vnes des autres. Ceste raison est receuable, non seulement pour la declaration de ce doute, mais pour seruir d'un nouveau, vray, & necessaire intellect de l'Aphorisme LVIII. du v. liure d'Hippocrat. où il dit, les masses estre au costé dextre de l'amaris, & les femelles au fenestre, qui se doit estendre par adhesion, & affiche, ce que les femmes mesmes ressentent en elles par quelque signe de pesanteur, ou ressentiment de l'embryon en un costé plus qu'en autre: qui est leur ordinaire, & plus seur secret à prejurer du sexe de l'enfant. Ceste mesme interpretation coupe plusieurs autres obiections cõtre ledit auteur, & notamment esclarcit l'Aphorisme XXXVIII. du v. liure, auquel



auquel lieu il parle comme est predit de deux enfans en vne portee, desquels si l'un auortant d'un costé, l'autre doit venir à terme, il faut bien par necessité, qu'ils ne soyēt pas attachez ensemble à mesmes vaisseaux: car ils viendroiēt l'un avec l'autre, mais chacun particulieremēt en son endroit.

*Solution de quelques autres obiections, & que l'usage de ce pessaire n'est nouveau, combien que l'affertion de concevoir sur iceluy soit de nouvelle obseruation.*

**C**EST, amy lecteur, ce que i'ay au vray descouuert & voulu inferer en ce traitté, comme chose y estant conforme quant à la nature du subiect, & à l'estrange & paradoxe affirmation d'iceluy, & neantmoins de tref-necessaire verité, ou les sentimēs, non pas d'un seul, mais de tous sont menteurs, sur lesquels neātmoins est

fondé le commencement d'examiner le vray contre le faux; ioint le profit qui en reuiet, voire mesme la necessité d'en bien vser, tant pour l'aïse, & support de la mere, que pour ne perdre pas l'esperance d'auoir encor' enfant en le portant, ce qui n'aduientroit autrement. Je t'en ay sans enuie esclarci la verité, par l'expression des lieux, & personnages; afin que là & autre part tu en sois satisfait par discrete inquisition comme moy, en attendant encor' plus ample attestation pour l'aduénir. Je sçay que tu me diras n'en auoir onc esté rié escrit pour precepte par les anciës, ou modernes en toutes autres considerations tres-diligens, ny aussi receu en vsage; ou obserué par vne infinité de chirurgiens fort clair-voyãs; ce que franchement ie confesse, pour n'en entrer en querelle contre les querelleux,

leux, comme aussi fais-ie de nostre Cæsarienne section, mais nonobstât tu vois de quoy. Tout ce qui s'est iadis fait, n'a pas esté escrit : & tout ce qui l'a esté de choses rares, & secrètes, n'est pas venu iusques à nous. Il ya tousiours eu quelque pratique, principalement entre les secrets des femmes, venant à leur particulier vsage, comme de main en main ; ainsi que iadis il se faisoit és secrets mesmes des medecins, voire Asclepiades, ne reuelants plusieurs de leurs secrets que aux leurs, comme par succession ; & ce avec serment solennel de ne le reueler, comme on peut conjecturer par le iurement d'Hippocrat. Ce qui est plus vray semblable aux femmes, notamment touchant les parties que nature leur donne pour nous mettre au mode, veu que les homes mesmes moins vergongneux, & pudiques en

sont honteux, ne se descouurans que le plus tard qu'ils peuuent à leurs plus familiers. Ce que Plutarque a escrit en son liure de la curiosité, disant : Si Herophilus, ou Erasistrate, ou Esculape mesme, estâts hommes comme iadis, ayants les remedes de maladies, & instrumés de santé en main se presentoient iusques à la maison, demandants si quelque homme malade au siege, ou quelque femme chancreuse en ses parties basses, a besoing d'eulx, on les chasseroit, comme gens s'enquestants du secret d'autrui.

Or ces petits (mais importâs) seuls, & leurs remedes sont mieux conseruez, & retenus au vulgaire, se cōtentant de sa telle quelle experience, que és lieux celebres, ou souuent le fastueux mespris de quelque docte, mais peu experimenté medecin, pensant commander (comme vn legislateur)

teur) à nature, & nō la seruir au doigt & à l'œil (comme il doit) ne sert bien souuent d'autre chose, que d'engarder par enuie, ou desdaing qu'un autre de moindre estime ne face mieux que luy. Voila l'erreur qui nous aueugle, & oste souuent, au prejudice des plus grāds, l'occasion de receuoir plusieurs bons aydes, que quelques vns veulent qu'on espere pour neant de nos rheubarbarismes & saignees, bien souuent aussi barbares, que sanguinaires, si elles ne sont moderees par cōmunicatiue deliberation plus tost, que par imperieuse tyrannie, cōme sçauēt bien faire les doctes, bons, modestes, & experimentez dispensateurs de santé.

Or posé le cas qu'il n'en ayt encor' par cy deuant esté rien pratiqué iusques à ce iour, auquel quelque esprit de nature industrieux l'ait in-

uenté à la suruenue des necessitez ordinaires, ou extraordinaires des dames (comme aussi est aduenue en ceste Cæsarienne section, encor' qu'on me die que ce soit possible par quelque temeraire hazard) neantmoins c'est sacrilège de laisser perdre vn biē quel qu'il soit, quād Dieu le reuele par tels moyens, & ministres qu'il luy plaist, en quelque temps que cela aduiēne.

Toutefois ie penserois cela (quant au supportement de la matrice seulement, & non quant à la faculté de la conception) auoir esté touché par Hippoc, en l'Aphor. X L V I I I. du V. liure, cōmençant. *Si uterus,* &c. s'il en auoit fait quelque mention en quelque autre endroit, où il a traitté particulièrement de la curation de ceste chute matricale, ou si autre des anciens avec luy en auoit onc écrit, & que l'interpretation de Galen sur ce lieu

lieu ne tendist à autre fin, l'arrestât sur le mot *ἡγεμονίῃ*, qui des lors possible auoit esté substitué pour *Ἀγμένην*, ou *ἡγεσίῃ*, afin que le sens en fust tel. *Si uterus intra coxas situs deciderit, ou defilierit, necessariū est emmotum fieri.* Si la matrice qui a son lieu entre les hanches dechet, ou tressaut, il y faut mettre compresse, ou arrest. Cōtre quoy ne feroit d'alleguer l'emphase de *emmotum*, ou *linamentum*, veu qu'un mesme ayde se peut faire de diuerses matieres.

Mais soit ainsi, ou non, ie me deporté de controller l'autorité de si excellens interpretes qu'il a euz, lesquels ie reuere, & veux imiter, tous lesquels bien souuent n'ayant point craint de modestemēt apporter leurs inuentions au bureau des deuanciers en faueur de leur posterité, nous ont tacitement enseigné (comme ie pre-

tends icy) faire de meſme pour la noſtre; & notamment, quand il eſt queſtion de verité, laquelle eſtant fille du temps, a aprins de ſon pere de ne produire pas tout en vne ſaiſon, mais quoy qu'il en ſoit, il la faut comme toute autre bonne choſe receuoir, & cueillir de main non ingrate, quād en ſa maturité elle ſ'offre à nous, ſelon & par tels moyens qu'il plaist à Dieu, l'ancien des tēps, & le pere des ſiecles nous l'enuoyer, Auquel ſoit gloire, honneur, & action de graces à touſiours. Ainſi ſoit il.

**PETIT**





# PETIT ADVERTISSEMENT

AV CHIRURGIEN SVR

*l'administration de cet œu-  
re Cæsarien.*



JE PENSE estre quitte de  
ma promesse, ayant suffi-  
samment prouué ceste se-  
ction pouuoir estre sure-  
ment faicte sans craindre d'estre ca-  
lónié d'auoir hazardé l'vne vie pour  
sauuer l'autre: combien qu'autremēt  
toutes deux estoiet ja trop hazardees,  
quand elles estoiet hors d'esperance.  
Parquoy ie feray icy fin, en te laissant  
(amy Chirurgien) avec l'execution,  
prendre aussi la charge d'en dresser  
methodiques preceptes, après en a-  
uoir par occasion fait hureuses expe-  
riences, estant l'vn & l'autre d'autant

plus de ton deuoir, que tu as d'industrie & de bon sçauoir aquis: Ce que n'auoyent plusieurs de ceux qui l'ont fait, comme ils ont peu, encor' que soit hureusement graces à celuy, duquel seul procede tout bõ heur: Toutefois pour encor' te gratifier, & ayder de quelque chose à ceux qui ne sont des premiers, attendant qu'après experience faicte tu leur en dresseras quelque meilleure institution, cõme merité bien ce subiect, i'en toucheray comme par conference deliberatiue quelques poincts en general, & non trop curieusement, cõme fait le trop phantastique peintre, qui ne pouuāt oster la main du tableau, en cuidant tousiours mieux faire, ce qui est desia assez bien, ne fait rien que broüiller, & gaster tout.

En premier lieu voy s'il y a espoir d'auoir l'enfant par moyen plus facile.

le. Secondement si la patiēte est forte, & exempte de signes mortels, & notamment si elle n'a point esté trop meurtrie par les sages-femmes, ou par les violēts efforts, cruels arrachements, & bourrelleries de quelques barbiers : ce qui aduiēt plus souuent de leur part, que des matrones : Car lors on attriburoit le defastre mortel à ta section, & non à leur faute. Ainsi ayāt, après l'inuocatiō du nom de Dieu, fait par qui te semblera bon preparer ta patiente à bien esperer de Dieu premierement, & puis de tes aydes, tu dois tenir à couuert, & hors de sa veüe, ce peu d'attirail prest qui est necessaire à cecy, comme rasoir à poincte, rasoir à bouton, quarrelet enfilé, esponge douce, linge mollet, vſé, ployé, cousu, & trempant desia en la chaude decoction cy après suy- uāte, ou autre pareille, pour estāt fort

espreinte seruir ( encor' mieux que d'esponge ) tant à en boire , & essuier le sang , qu'à faire fomentations restreintifues sur les incisiōs, avec chaleur douce, & soüefue : Item linges à mettre sous, & enuirō elle, pour couvrir le sang, qui pourra sortir, duquel petite quantité fait grand monstre, & estonne tant la patiente, que les assistants. Semblablement, bandes, charpis, compresses, estouppades garnies, plumaceaux couuerts de tes restreintifs, & digestifs accoustumez, les tenant chacun à part pour le premier appareil, ou les mēlant comme bon te semblera. Puis l'ayant fait vriner s'il est possible ( afin que la vessie euacuee tombe en bas, & empesche moins, combien qu'icelle ne monte pas iusques au lieu de l'incision ) il la faut ( si elle est forte ) situer sur la riue du liēt, vn peu réuersee en arriere, les iambes

aucu-

aucunemēt pendantes, & tenuës ensemble fermes, eſtāt icelle ſouſtenuë doucement par gens familiers, forts & courageux : Ou bien ſi elle eſt foible, la faut faire tenir à demy couchée : ( car telle ſituation eſt preſervative de ſyncope, comme nous pratiquons en la phlebotomie de ceux qui ſont ſubiets à lipothymie ) & ce en pendant vn peu vers les pieds, & ayant les iambes enſemblément allongees.

Lors il faut eſlire l'vn ou l'autre des coſtez que tu voudras, eſtāt cela indifferent, comme il a apparū par les hiſtoires ſuſdictes: Toutefois y ayant durté de foye, ou de ratte, ſemble eſtre bon d'incifer à l'opposite, pour pluſieurs raiſons traittables autrepart.

S'il y a hargne auparauant au coſté qu'on veut incifer, & qu'on iuge que

l'intestin ne soit pas lors à l'endroit d'icelle, sçauoir est entre le peritoine & la matrice (comme il est mal-aisé qu'il y soit, pour-ce qu'icelle matrice se presente premiere que luy, quand la femme est fort grosse) on y pourra bien faire l'incision; car en icelle se renge plustost, que de l'autre costé la matrice. Et ainsi aduiédra que la patiente n'aura pas après deux hargnes pour vne, encor' que toutefois l'intestin sy trouuast (ce qu'il ne peut) il n'y auroit point de danger pour cela, pourueu qu'on tint la main haute, prenant garde de le bleffer: car iadis à la curation des hernies, on y faisoit bien vne ample incisió sur icelle hargne, sans l'offenser, comme monstrét Celse, & Æginete.

Aprés cela, faut marquer avec de bõne encre sur l'abdomen, le lieu incisable d'une longue ligne droite, qu'il

qu'il faudra laisser secher (pour ne s'effacer point) afin de conduire le trait de l'ouuerture, & ce depuis l'endroit d'entre le nombril & le flanc, iusques vers trois ou quatre doigts près de l'ayne, tirât vn peu vers le penil, ayant tousiours costoyé de loing le muscle droit, sans y toucher, ny en haut, ny en bas. Et faut icy noter, que l'incision est icy meilleure, & plus sûre contre le flux de sang, & moins ennuieuse s'il en reste hernie, quand on la fera vn peu plus haute, que trop basse, & avec tout cela moins douloureuse. De ce mesme encre, faudra aussi marquer, & laisser secher en quatre ou cinq endroits distants egalemēt l'vn de l'autre quatre ou cinq petites lignes trauersantes droicte-ment en croix, sur ceste longue descente, auxquels il faudra asseoir les poincts iustemēt vis à vis l'vn de l'au-

tre, afin que la gastroraphie soit egale.

Il vient après de faire d'extremement l'incision sur ladicte ligne au cuir, en profondant cautelement vers les graisses. La longueur sera d'enuiron demy pied plus, ou moins selon le corps de la femme. Puis, selon le duit de ceste section, fauldra prudemmēt aller par pareils traiçts longs faire incisiō aux muscles epigastriques, & au peritoine, besongnant dis-ie là discrettemēt: Car sous iceluy immediatement se trouue le grand corps de la matrice, lors bien pleine, gisante sur les intestins cachez sous elle. Fauldra lors (inuoquāt l'ayde de Dieu) inciser ceste matrice, soustenant legerement la main, de peur d'offēser l'enfant s'il est vif (Car estant mort on peut plus diligemment expedier, n'ayant soing que d'espargner la mere) & faut commencer du haut d'icelle venant vers  
le



le bas, entre le costé, & le deuant, eui-  
tant les lieux ou sont les epidydymes,  
vaisseaux spermatiques, & testicules  
foeminins.

Mais pour ce faire plus surement,  
seroit bon auoir alors tout prest vn  
second rasoir à gros dos, bien affilé  
au tranchant, mais armé fermement  
par la poincte d'un boutté de plomb,  
ou de quelque petite boulette de  
buys, à la façon d'un cousteau de tri-  
piere, afin que la poincte n'offense  
pas le petit en se remuât, ou autrement.

L'enfant & sa secóndine estãs tirez,  
faut en diligéce doulcemēt essuier ce  
qui y peut estre de sang, avec vn lin-  
ge, ou seruiette deliée, mollette, doul-  
ce, & vsee, ployee court en huit ou  
dix doubles, abbreuee de la decoctiō  
cy après escrite, & fort espreinte pour  
seruir d'esponge; & ce avec douce  
chaleur, tendant à deux indications,

voire contraires, & ce en mesme tēps par la cōtraincte du brief espace, auquel cela se peut appliquer.

Fay boüillir en deux pintes de gros vin rude, & austere, iusques à cōsomp-  
tion du tiers, armoise, aluyné, aigre-  
moine, betoine, fueilles de guimaul-  
ues, fleurs de rozes tremieres s'il s'en  
trouue, fueilles ou fleurs de grena-  
dier, d'esglantier, rozes rouges sei-  
ches, de chacun vne poignée, aristo-  
lochie longue, & ronde, fouchet, pas  
de chameau dit *squinanti*, de chacun  
enuiron demy once; coulez le, & y  
mettez demy chopine d'eau de ma-  
reschal boüillirauec (si bō vous sem-  
ble) & en cela estant de foüefue cha-  
leur, trépez vostre linge, puis l'esprei-  
gnez, il seruira tout d'vne main à ef-  
fuer l'ordure, fomentier la partie of-  
fensee, restraindre le sang fluāt, con-  
forter la partie lasse, prouoquer le  
sang

sang de la gesine, qui doit venir : mais il faut icy pratiquer le *festina lente*.

Cela fait à la matrice, & icelle doucement régee en son lieu, sans y rien couldre (par-ce que sa retraction luy vaut mieux que cousture) il faut incontinent gastroraphiser (sans precipitation) la playe du ventre extérieur, euitât l'entree du froid, & approcher chacun costé de la playe vis à vis l'un à l'autre, selon les marques croisees, comme est predict. En quoy est requis l'ayde d'un second, qui destourne les replis des boyaux (se venans lors presenter) à la playe qu'on recoust, de peur d'estre piquez ou enfermez entre les poincts, se remettans lors en la place, que parauant tenoit la matrice à présent retiree en bas.

Et ne faut pas trop s'amuser (comme est predict) à faire le maistre gastroraphiseur, ou s'y vouloir experi-

menter aux despens de la patiente, de peur de gaster tout, veu que par experience celles qui se sont mieux portees, n'auoyent gueres que le cuir recoufu, & point d'empeschement pour la hargne bien supportee, quoy qu'elle fust grande : car (comme on dit) il vaut mieux laisser l'enfant morueux, que luy arracher le nez.

Sur ladicte incision de l'abdomen, y faudra besongner comme aux autres playes recentes iusques à la cicatrisation, le tout sans actuele froideur, par onguents, cataplasmes, emplâtres, fomentations, plumaceaux, estoupades selon les temps, & indications propres.

Mais pour la matrice sera bon faire ces deux choses, pessaires, & injections vterines. Les pessaires seront en forme de tente grosse d'un poulce, ou quelque peu moindre, & assez longue  
pour

pour entrer iusques en la cavit   ma-  
tricale, sans l'offenser, faicte de linge,  
ou d'un cierge pertuis   au milieu, en  
fa  on de tente canulee, & garni par  
dehors de linge, ou cotton oinct de  
beurre frais, gresse de poule, huile ro-  
zat, iaune d'  uf, qu'il faudra souuent  
oster, & remettre. Il seruira au l  g, &  
au milieu de foy    donner passage     
la sanie,    munir le col, & bouche de  
la matrice c  tre l'acrimonie d'icelle,  
suiuant le conseil d'Hippocr. selon la  
commune interpretati  , *Si uterus ni-  
tra loxas iac  s suppuratur, necessarium est  
emmotum fieri* : Et en souuent l'ostant,  
il n'empeschera pas les purulences,  
phlegmes, ou grumeaux de sang de  
sortir, mais les amenera avec foy. A  
ce mesme vauldront les clysteres de  
mere, pour la fomentier, lauer, net-  
toyer, consoler, consolider, faicts de  
decocti   d'armoyse, aigremoine, ab-

synthe, bismaulue, plâtain, rozes rouges, fleur ou fueilles de rozes tremie-  
res, nepete, racine d'aristolochie, de  
falseparille, de fouchet dit cyperi, de  
pas de chameau dit squinantie, cuits  
en eauë ferree, y adioustant quelque  
peu de gros vin rude, & de bon hy-  
dromel.

Rien ou peu de tout cela, fut ob-  
serué aux histoires predictes, qui ne  
laisserét toutefois de biē & tost gua-  
rir. Parquoy si le tout ne se peut trou-  
uer, on ne laissera pour vn moine de  
faire vn Abbé.

Le regime soit de bonnes viandes,  
& sobre entant que la force le porte-  
ra: car en femmes accouchees, & tel-  
lement traittees, il faut restaurer. Et  
en playes ou apostemes internes, e-  
stroitement dieter, parquoy faut te-  
nir le moyen.

Si le ventre n'obeit, il faudra vser  
de

de clysteres faits de succe rouge, diaprunis simple, beurre frais, huile rozat, en bouillon de poule grasse, sans herbes, & sel : Le reste sera à la discretion du Chirurgien, & sage Medecin qui s'y pourra trouuer.

Or comme le docte Varron, l'un des premiers entre les Romains, escriuant de la philosophie, n'en a pas fait expressément estat, comme pour en dogmatizer, se cõtendant d'en donner le premier goust à la ieunesse ; Aussi pense, amy lecteur, que ie fay cecy, non pour te donner necessaires preceptes, mais pour t'aduertir de ce dont i'ay en partie fait obseruation en l'œuure d'aucuns, & en partie donné conseil aux autres, dont est bien succedé ; te monstrant au doigt ce que i'ay trouue, estat du gibier de tes garennes, afin que le recognoissant bien, & t'employât après à bon esciēt

à le vendiquer, & poursuiure, tu ne sois frustré de la proye que ton labeur aura poursuyue. Dequoy Dieu te face l'octroy à ton hureux contentement, à l'vtilité du genre humain, & à sa gloire: Auquel, & à son saint Esprit, soit honneur & action de graces par Iesuchrist son fils nostre Seigneur. Ainsi soit il.

Maronianum Authoris ad libellulum.

*Nunc te stramineum pro tempore fecimus, olim  
Si fœtura gregem suppleuerit, aureus ibis.*

**I**'A Y leu ce liure, duquel l'inuention touchant l'enfantement dit Cæsarien, m'a semblé si bien auerec par raison & experience, que ie l'ay iugé digne d'estre mis en publicq. Seulemēt le lecteur sera aduertī d'en vser és cas y allegués, avec grande discretion.

Henry de Monanthueil professeur du Roy és Mathematiques, & Doyen de la faculté de Medecine en l'vniuersité de Paris.

I'ateste ce que dessus.

A. Paré.  
I. Viard.



# TABLE DES PRINCIPALX POINCTS, ET choses plus remarquables, conte- nuës en ce present liure.

## PREMIERE SECTION.

D	Definition de l'enfantement Cæsarien.	1
	De l'vtilité, & necessité de ceste section Cæsarienne.	3
	Les causes d'impossibilité és accouchemens naturels, d'ou procède la necessité de cestuicy.	5
	Trois sortes de probations pour ce subiect.	10
	<i>Histoires du recit de gens fideles.</i>	
	Premiere histoire.	13
	Seconde histoire.	14
	Troisieme histoire.	ibidem.
	Quatrieme histoire.	16
	<i>Histoires oculaires.</i>	
	Premiere histoire.	17
	Seconde histoire.	18
	Troisieme histoire. 22	Quatrieme histoire. 24
	Cinquieme histoire.	26
	Sixieme histoire.	28

## SECONDE SECTION.

	Probation seconde par raison.	31
	<i>Des muscles de l'epigastre.</i>	
	Premiere partie à inciser, & premierement pour la playe, & grandeur d'icelle.	32
	Pour l'hæmorrhagie desdits muscles.	34
	Pour le lieu ou l'hæmorrhagie des muscles doit couler.	35
	<i>Du peritoine, seconde partie à inciser.</i>	
	De son incision, & de l'amplitude d'icelle.	37
	Pour la sùreté du spasme, en la section du peritoine.	39
	Pour l'accidët de hernie, qui reste de ceste partie incisee.	42
	Pour l'hæmorrhagie vterine, qu'elle n'est pas grande.	45
	Du lieu ou doit confluer le sang matrical.	48
	Que spasme n'est à craindre pour ceste section de ma-	

# T A B L E.

trice.

49

## T R O I S I E M E S E C T I O N.

Troisième espece de probation par autoritez.	51
Des muscles epigastriques, par autoritez historiques.	52
Du peritoine par autoritez.	55
De la matrice par autoritez.	61
Comparaison de la matrice incisée, à la section de la vessie des calculaires.	ibid.
Discours par occasion sur l'extraction du calcul par l'hypogastre, ou petit ventre.	71
Exemple historial sur ceste proposition de conseil nouveau.	77
Response aux communes objections contre l'incision de la vessie, en sa partie membraneuse par l'epigastre.	96
Autre exemple confirmatif.	99

## Q U A T R I E M E S E C T I O N.

Production tenant lieu d'autorité d'autres pires dangers de ceste mesme partie offensee, que n'est la section Cæsarienne.	100
---	-----

### *Premiere particule contenant trois histoires.*

Premiere histoire.	102
Seconde histoire.	104
Troisième histoire.	107

### *Seconde particule.*

Aliboux à Rouffet salut	110
Seconde histoire de pareil subiet dudit Aliboux.	111
Deux autres histoires de pareil subiet de Nicolas de Ville-neufue.	113
Autre histoire de luy.	114

### *Troisième particule.*

Histoire premiere.	117
Histoire seconde.	118
Histoire troisième.	119
Probation sur l'incredulité de l'histoire sus alleguee.	120
Histoire quatrième de mesme subiet.	123
Histoire cinquieme.	125
Histoire sixieme.	129

### *Quatrième particule.*

Histoire.	136
Autre histoire.	137

# T A B L E.

Autre histoire.	138	Autres histoires.	ibib.
Autre histoire nouvelle			139
<i>Cinquieme particule.</i>			
Premiere histoire.	142	Histoire seconde.	143
Epilogue des precedentes histoires.			148
C I N Q V E M E S E C T I O N.			
Autres probations pls populaires.			150
Autre probation vulgaire.			154
De quelques accideus qu'on peut alleguer aduenir dange- reusement en cete lection Cæsarienne.			156
Que la douleur pour l'incision de la matrice, ne peut ap- porter spasme, & qu'elle est au lieu de son incision fort peu sensible.			159
Histoire.			163
S I X I E M E S E C T I O N.			
De la fœcondité qui reste après la section Cæsarienne.			165
Pour la cicatrice, qu'elle n'empesche pas la fœcondité.			166
Autre probatio de la fœcondité non empeschee par la ci- catrice : par l'argumentation du fort au foible, consi- stant en l'assertiõ d'un paradoxe nouveau, prouué estre vray par experience & raison medecale.			172
De l'inuention du pessaire, & diuersitez d'iceluy.			176
<i>Histoires sur ceste proposition.</i>			
Paradoxe de conception, & portee entiere sur ce pessaire matricial.			179
Confirmation de ce que dessus est dit, & ce par raisons so- lutiues de quelques argumens à ce contraires.			184
Solution par corollaire d'une autre instance, sur ce qui est predit de l'ouuerture de la bouche matricale en fem- mes grosses.			187
Histoire consernante ce propos.			192
Que le pessaire n'empesche pas la geniture d'estre aperte- ment receüe, & bien affichee à la matrice.			202
Solution de quelques autres obiectiõs, & que l'usage de ce pessaire n'est nouveau, combien que l'assertion de con- cevoir sur iceluy, soit de nouvelle obseruation.			205
Petit aduertissement au lecteur sur l'administration de cet œuure Cæsarien.			213

F I N.

## Extrait du privilege du Roy.

**P**AR lettres patentes du Roy, il est permis Denys du Val Libraire, & maistre Imprimeur à Paris, d'imprimer & mettre en vente ce liure intitulé, *Traitté nouveau de L'Histérotomotomie, ou fantement Cesarien*, avec inhibitions & defences à tous autres marchans & imprimeurs de non imprimer, ou faire imprimer, vendre ou distribuer ledit liure en cestuy nostre Royaume durant le terme de dix ans, à commencer du iour & date que ledit liure sera acheué d'imprimer: sur peine de confiscation desdicts liures, qui seront trouvez d'autre impression quelcuduy du Val, & d'amende arbitraire: comme plus amplement est contenu & déclaré esdictes lettres. Voulés aussi qu'apposant l'extrait dudit privilege à la fin ou au commencement du liure, il soit tenu pour dûment signifié, car tel est nostre plaisir. Donné à Paris le vingtseptième iour d'Aoust mil cinq cens quatre vingts. Et de nostre regne le septième.

Par le Roy en son conseil.

Signé

BAVDV.

## FAUTES QUE LE LECTEUR CORRIGERA S'IL LUY PLAIST.

Av. fucillet 25 ligne 6 lisez, ainsi. 26 13 ainsi. 35 6 arteres. 50 7 aporte spasme &c. 60 16 desquels. *ibidem*. 17 vns. 62 26 perinac, & ainsi des autres. 76 2 soixante ans. *ibid*. 8 combien. 78 16 auquel. 88 5 & 6 douleurs. 91 19 ainsi. 92 15 ainsi. 95 13 m'eschappe il. 116 17 aux autres. 121 15 texture. *ibid*. 22. Ledit. 122 5. Les poulmons. 135 17 la manie. 145 ligne premiere doublee. *ibid*. 9 sa deperdition. 147 19 precisions. 150 16 ces narrez. 156 5 pourrettes. 174 1 imbecillant. 177 8 à la matiere. *ibid*. 18. trunquee. 185 18 modestes. *ibid*. 21 escholes. 195 2 né. A nostre. *ibid*. 15 dextre. 196 3 hors le. *ibid*. vient des. 203 10 ces ayde. 204 1 plaines. *ibid*. 12 entendre. 211 5 coxas. 216 2 a emboyre. 218 11 vne. Encor. 225 13 & 14 intra coxas.

